

Maaron Igham Mulin Yes Israela Pa Patanani Todi

Kisim Bek

Yes Israela to tizila Isip ne izadi

1 ¹⁻⁵ Yes Israela to yesja tamandi Yakop, ve ndizwadi ve ndinatudi tizila pa Isip ne izadi tovene: Ruben, Simeon, Levi, Yuda, Isakar, Zebulun, Benyamin, Dan, Naptali, Gat ve Aser. Yakop iza ite Israel. Papaghu toni to yesja tizila Isip, yes irau tamoot tol saangul (70). Ve natu Yosep, ye imuuŋ ila ineeŋ pataghaaŋ wa.^a

⁶Yosep imaat, ve tazi toman nditogha ve tamtoghon todi pida to yesja tizila Isip pa sawa tonenen, tineep tonowe le tisob timatmaat paam. ⁷Eemoghon yes Israela tipopoop, ve papaghu todi timasa le tinim ival kat ve taan to yes Isipa ivon padi. Tovenen tapiridi ighaze ilib padi.^b

Kinik paghu to Isip ighur patanani pa yes Israela

⁸Yes Israela tineep tonowe irau ndaman ndaman, ghoru kinik paghu eez ivot ve igham pooz izi Isip. Kinik paghu tonowen, ye iwataŋ Yosep uraat toni rita maau.^c

⁹Tovenen isaav pa yes Isipa ighaze: “O, aghita ghiit wa? Aazne, yes Israela timasa tinim naol ve paam tapiridi ilib pait. ¹⁰Tovenen iit irau tagham nŋar pooi, ve takaal ataam eta pa tatatan tapiridi. Pa vene, tivot tinim ival kat ve tilib pait. Ve ighaze malmal eta imundig, nene pale tila toman koiaad, ve tiparab toman ghiit ve tilib pait, ghoru tipul taan toit ve tighau tila.”^d

¹¹Tovenen yes Isipa tigham yes Israela tinim mbesooŋa sorok padi, ve tighur nŋiniŋa arianaŋadi pa tinŋin di. Yes nŋiniŋa tonowen tighur uraat patanani kat padi, leso titatan di. Tigham di tipamundigin ndug papaghu

a 1:1-5 Mbnp 46:8+ b 1:7 Mbaŋ 7:17 c 1:8 Mbaŋ 7:18 d 1:10 Mbaŋ 7:19

ru, lesu tilup aniiḡ toman mbeb pida to kinik tila tonowe. Ndug eez, iza Pitom, ve ite iza Ramses. ¹²Yes Isipa tigham samin yes Israela ve tighur uraat pataḡani naol padi. Lesu titatan di ve tapiridi isob. Eemoghon tiraua maau. Yes Israela tivotvot tinim naol le naol kat, ve tila tineep irau taan isob to yes Isipa. Tovenen yes Isipa timatughez padi. ¹³Tauto iḡgal matadi pa uraat pida paam to pataḡani le pataḡani kat. Lolodi isamin di rita maau.^e

¹⁴Tigham le yes Israela nepooḡadi isami kat. Pasa, tighurghur uraat pataḡani kat padi. Tigham di tigharaat brik ve tirei ruum, ve tigham uraat ariana pa uum paam. Ve sawa isob to yes Israela tighamgham uraat, yes Isipa lolodi isamin di rita maau.

¹⁵⁻¹⁶Ghoro kinik to Isip ipoi Hibru tidi ru tinim. Eez iza Sipra, ve ite iza Pua. Yesuru uraat todi to tipapopan ndiliva to yes Hibrua. Kinik isaav padi ighaze: “Alooḡ. Sawa to apapopan Hibru tidi, aghita ndinatudi. Ighaze nditamoot, arab di timaat. Ve ighaze ndiliva, ghoro apul di tineep.” ¹⁷Eemoghon ndiliva ru tonowen timatughez pa Maaron. Tovenen titaghon kinik aliḡa maau, ve tipul ndipain nditamoot tineep.^f

¹⁸Tovenen kinik ipoi yesuru timuul tinim, ve ighason di ighaze: “Pughu vena to yamru azoor aliḡag, ve apulpul ndipain nditamoot to yes Hibrua tineep?”

¹⁹Yesuru tipamuul aliḡa tighaze: “Wai, Hibru tidi, popaan todi, inimale Isip tidi maau. Pasa, yes ndiliva arianaḡadi, ve tipopoop rikia moghon. Sawa to yeru nilaghlaagh sone, yes tipoop wa!” ²⁰⁻²¹Ndiliva ru tononen timatughez pa Maaron ve titaghon ḡgar toni. Tovenen ye igham poian di, le anadi tipoop ledi ndinatudi paam. Ve yes Israela tivotvot le tinim ival le ival kat. Ve tapiridi paam ivot inim tiina kat.

²²Tovenen kinik^g

isaav ariana pa ival tiina to Isip ighaze: “N dipain nditamoot to Hibru tidi tipoop di, yam apiyaav di tisob tila ya Nil. Ve ighaze ndiliva, ghoro apul di tineep.”^h

Mose tina ipoopa

2 ¹Sawa tononen, tamoot eez ve liva eez to Israel, yesuru tivai. Pughudi ee moghon. Yesuru tivot ila to Levi. ²Liva apo, ve ipoop tamoot. Ye ighita natu poia kat. Tovenen iḡgooza ineep irau kaiyo tol le inim olman ris.ⁱ ³Ghoro irau iḡgooza muul maau. Tovenen igham ti to tivavaii pa mbeb inimale vivib, ve iḡgal mbeb inimale ndimir ma bagil ila ipoon ti

e 1:13 Mbnp 15:13 **f** 1:17 Mbaḡ 5:29 **g** 1:22 Yes Isipa tiwatwaat saveeḡ ‘kinik’ ila taudi aliḡadi tighaze ‘Paro.’ Tauto Baibol pida tiwaat kinik to Isip ‘Paro.’ ‘Paro’ nene kinik to Isip iza maau. Nene isavia uraat toni to ye kinik. Iḡgara katindi matadi iḡgal tighaze kinik to igham samin yes Israela ne, ye iza Ramses. **h** 1:22 Mbaḡ 7:19 **i** 2:2 Hib 11:23

tonowen sambudi, lesu ya ilooj ila sob. Ghoro ipagheen natu ilooj ila, ve ighami ila ighuri ila vivib lolo to titub titaghon ya Nil dige. ⁴Pain tonowen livu iyooj sagan, ve mata ilala pani ighaze ighita sa mbeb pale ivot pani.

⁵Sawa tonenen kat, kinik to Isip natu liva toman ndiliva mbesooja toni pida, tizila pa ya Nil, lesu kinik natu liva iririu. Tovenen ndiliva mbesooja toni tilaghlaagh taghon ya dige, ve ye iririu. Mata ila le ighita ti tonowen ipotpot ila vivib lolo. Tovenen imbaaj liva mbesooja toni eez ila ighami inim. ⁶Kinik natu liva ikaak ti avo, ve ighita pain kainanen ighengheen ve itanjan. Tovenen lolo isamini, ve isaav ighaze: “Alel, nene avaat Hibu tidi eta natu!”

⁷Rikia moghon ve pain kainanen livu inim peria todi, ve ighason kinik natu liva ighaze: “Vena? Irau nala nakaal liva eta to yes Hibrua, ve naghami inim? Lesu injin pain tonanan payom, ve igham payamyam pani.”

⁸Kinik natu liva iyok pa ngar toni ighaze: “Poia kat. Ula.”

⁹Tovenen ye ila igham pain tiina ve yesuru timuul tila to kinik natu liva. Ghoro kinik natu liva isaav pa pain kainanen tiina ighaze: “Ugham pain tonene ula, ve unjini payou ve ugham payamyam pani. Pale nagharaat ghom.” Tovenen pain kainanen tau tiina ighami ila, ve igham payamyam pani. ¹⁰Pain tonowen itub le inim olman ris, ghoro tiina ighuri imuul ila to kinik natu liva, ve ighami inim natu. Kinik natu liva iwaat pain tonenen iza Mose. Pasa, mata injal ighaze: “Pain tonene ineev ya dige, ve naghami iza.”^{j k}

Mose ighau ila ineev toman yes Midiana

¹¹Mose itub inim olman, ve sawa eez, ye ila ighaze ighita ndita Hibrua. Ila ivot todi ve ighita uraat patajani to tighamghami. Ve ighita ngeu eez to Isip irab tojvetaz toni eez to Hibu. ¹²Mose mata ines, le ighita tamtoohon eta maau. Tovenen ila ivool to ita ite, ve irab Isip taamdi tonowen imaat. Ghoro italaaz magargaar ve izeev paatu ila ve ilalai, lesu ingooza.

¹³Mboj ndugizau, ve ila ighaze injig ndita tonowen muul. Ilaghlaagh ila le ighita Hibrua ru tipaparab. Tovenen ighason ngeu to igham sosor ve ipamundigin malmal ighaze: “Wai, urab sorokin itam ite pasa?”

¹⁴Ye ipamuul aliija ighaze: “Yom sei ighur ghom unum tiina pa unjin ghei ve ugharaat patajani tiei? Ma vena? Yom ughaze urab ghou namaat nanimale Isip taamdi to noor urabi imaat ne?”

Mose ilooj saveej tonene, ve mata injal ighaze: “Wai, ngar to you naghami, tamtoohon avaat tiwatagi wa.” Tovenen imatughez ve ighau.

j 2:10 Ila Hibrua alijadi, tiwaat Mose iza ‘Moshe.’ Pisis tonene igharau pa saveej waaro ‘masha’ to pughu ‘ighami iza.’ k 2:10 Mbanj 7:21

¹⁵Sawa to kinik to Isip ilooŋ Mose varu pa ŋgar to ighami, ikaala ighaze irabi imaat. Eemoghon Mose ighau ila pa yes Midiana taan todi wa. Ila ivot tonowe, ve ate izi igharau ya taiŋ eez dige.^l

¹⁶Ndug tonowen, ŋgeu eez inepneep, iza Reguel. [Reguel iza ite Yetro.] Ye ighamgham uraat pa watoonrau to yes Midiana, ve ndinatu liva irau liim ve ru. Sawa to Mose ineeŋ igharau ya tonowen dige, Reguel ndinatu liva tinim tighaze titib ya ve tipaghun sipsip ve mekmek todi. ¹⁷Mala maau ve ŋginiinŋ ŋgaia pida tinim tivot, ve tighaze tizurun ndiliva tonowen tighau. Eemoghon Mose imundig ivool todi, ve ipaghun sipsip toman mekmek todi.

¹⁸Ghoro ndiliva tonowen timuul tila pa tamandi Reguel. Ye ighita di, ve ighason di ighaze: “Wai, pughu vena to ŋgaramus ala ve rikia moghon amuul anim?”

¹⁹Yes tipamuul aliŋa tighaze: “Yei nila nivot izi ya, ve ŋginiinŋ ŋgaia pida tinim tighaze tizurun ghei. Eemoghon ŋgeu eez to Isip ivool tiei, ve iuul ghei pa tibuunŋ ya, ve ipaghun sipsip ve mekmek toit paam.”

²⁰Tamandi ilooŋ saveeŋ todi, ve ighason di ighaze: “Wai, tau sine? Pughu vena to apuli ineeŋ? Aghami ve yamŋa anim maau? Rikia moghon amuul ala, ve aghami inim. Leso itiŋa taghan.” Tovenen tila tigham Mose, ve yesŋa timuul tinim.

²¹Reguel ighaze Mose ineeŋ toman di. Tovenen Mose iyok pa ŋgar toni, ve Reguel igham natu liva eez pa Mose ve ivaii. Iza Sipora. ²²Yesuru tineep le Sipora apo, ve ipoop natu tamoot. Mose iwaat iza Gersom. Pasa, mata inŋgal ighaze: “Muunŋ, naneep nanim loom tonowe.”^m

Maaron ighita pataŋani to yes Israela

²³Ndaman katindi inim ila, ghoro kinik to yes Isipa imaat. Eemoghon yes Isipa tighamgham samin yes Israela, ve tighurghur uraat pataŋani padi sone. Tigham le matadi siŋi iyaat. Tovenen yes Israela titanŋaŋ ve tikausim pa ledi ulaaŋ. ²⁴Maaron ilooŋ taŋiiz todi, ve mata inŋgal imuul ila pa saveeŋ to muunŋ ye imbua toman nditimbudi Abaram, Isak ve Yakop.ⁿ

²⁵Ye ighita yes Israela tineep ila pataŋani tiina lolo. Tovenen igham ŋgar tiina padi.

Maaron ivot to Mose ve ighur uraat pani

3 ¹Mose inŋinŋin sipsip ve mekmek to rawa Yetro. Yetro, ye ŋgeu to ighamgham uraat pa watoonrau to yes Midiana. Sawa eez, Mose igham sipsip ve mekmek to Yetro, ve ila pa ndug balim. Ipul ndug to

l 2:15 Mbaŋ 7:29 m 2:22 Ataam ite to tator saveeŋ waaro tonene, nene vene: “You naneep nanim loom.” n 2:24 Mbnp 15:13+, 26:24, 28:13

moghon moghon ilaghlaagh pani, ve isakia laghoonj ila ivot lolooz Orep pughu. Lolooz tonowen, nene lolooz patabuanj to Maaron. Iza ite Sinai.

²Mose inepneep tonowe, ve Mbanjoonja to Yoova^o ivot toni inimale yab ighan ila ai kainanjen eez. Mose ighita yab tonowen iyaryaar kat, eemoghon ighan ai maau.^p

³Tovenen igham ngar naol ighaze: “Wai, nowe sa? Mbeb tonowen, ghitoonja ite kat. Pughu vena to yab iyaryaar ila ai tonowen, eemoghon ighani maau? You pale nala nagharau, ve naghita poiiani.”

⁴Tovenen Mose ilaagh injarua ai tonowen ila ighaze ighita poiiani. Eemoghon Yoova inep ila ai tonowen, ve ighita Mose inim, ve ipoi ighaze: “Mose, Mose!”

Mose iyok pa aliija ighaze: “Taug nene.”

⁵Yoova isaav ila pani ighaze: “Unum ugharau malep! Uyoon tonanan, ve upas duduunja to aghem izi. Pasa, taan to yom uyondyood izala na, nanan patabuanj.^q

⁶You Maaron to tamam. Ve you Maaron to Abaram, Isak, ve Yakop.”^r

Mose iloonj saveen tonene, ve rikia moghon imbotoon nagho. Pasa, imatughez pa ighita Maaron. ⁷Yoova isaav pani muul ighaze: “Tamtoghon tiou to tineep izi Isip we, you naghita patanani todi wa. Yes daba to tingin di pa uraat, tinghamgham samin di, le matadi sinji iyaat ve titañ tiina. Eemoghon tanjiiz todi, you naloonja wa. Tovenen patanani todi, you nakankan panu maau. Nawatagi le isob.^s

⁸“Tauto aazne, nazi nanim naghaze naghama mulin di ila yes Isipa nimadi. You pale naghama di tipul Isip, ve tila tineep izi taan to yes Kanaana, Hita, Amora, Peresa, Hivia, ve Yebusa. Pasa, taan tonowen soso tiina, ve ngoreenja tiina kat. Ve igham mbeb naol titub pooi. ⁹Tovenen tanjiiz to yes Israela inim ivot tiou ve naloonja wa. Ve patanani to yes Isipa tighurghuri padi pa titatan di, you naghita wa. ¹⁰Tovenen aazne, you naghaze nambaanj ghom umuul ula pa Isip ve ughita kinik todi, leso ugham tamtoghon tiou Israela tipul taan Isip ve tinim.”

¹¹Eemoghon Mose isaav pa Maaron ighaze: “Wai! You sa ngeu, to irau nala nayoon ila kinik mata, ve naghama yes Israela tipul Isip? You irau naghama uraat tovene maau.”

¹²Maaron isaav panu muul ighaze: “You taug pale naneep toman ghom ve napalat ghom. Tovenen yom pale ughama tamtoghon tiou Israel tipul Isip, ve yamja anim avot sualen, ve asuj ve ambees payou izi lolooz

o 3:2 Mbanjoonja to Yoova ighama Yoova nagho ve ivotvot to tamtoghon. Baibol pida tiwaata tighaze ‘ensel bilong Bikpela,’ ma ‘angel of the LORD.’ Saveen to mbanjoonja tonowen, nene inimale Yoova tau isavsaav. Tovenen ngara pida matadi inggal tighaze mbanjoonja tonenen, nene Krisi. p 3:2 Mbanj 7:30+ q 3:5 Yos 5:15; Mbanj 7:33 r 3:6 Mt 22:32; Mk 12:26; Lu 20:37 s 3:7 Mbanj 7:34

tonene pughu. Sawa to mbeb tonenen ivot, ghoru uwatag ughaze you taug to nambaaj ghom.”

Maaron ivotia iza pa Mose

¹³Mose ipamuul Maaron aliņa ighaze: “Nene poia. Ve ighaze namuul nala, ve nasaav pa yes Israela naghaze: ‘Maaron to nditimbuud, to imbaaj ghou nanim tiam,’ yes pale tighason ghou tighaze: ‘Sa Maaron tonanan. Iza sei?’ Pale napamuul ghasoniņ todi vena?”

¹⁴Maaron isaav pani ighaze: “You Taug Nanepneep.^t Nene you izag ve gabuag. Tovenen usaav pa yes Israela ughaze: ‘YE TO INEPNEEP’ tauto imbaaj ghou nanim tiam.”^u

¹⁵Ve Maaron isaav pa Mose muul ighaze: “Usaav pa yes Israela tovene: ‘Yoova, Maaron to nditimbuud Abaram, Isak, ve Yakop, to imbaaj ghou nanim tiam. Ye iza “YOU TAUG NANEPNEEP.”’ Izag tonene pale ineeep le alok. Tovenen tamtoghon to muri pale tivot, irau matadi iņgal izag tonene itaghoni taghoni gha ila.

¹⁶“Tovenen yom ula ulup ndolman to yes Israela, ve usaav padi tovene: ‘Yoova, Maaron to nditimbuud Abaram, Isak, ve Yakop timbesmbees pani, tauto ivot tiou, ve aliņa ilat payam ighaze: Mata payam irau sawa isob. Tovenen njar samsamia naol to yes Isipa tighamgham di payam, ye ighita di wa. ¹⁷Ve ye isaav tovene: Taan Isip to aazne andeeņ patañani tiina pani, ye pale igham gham apuli, ve ala aneeep izi taan to yes Kanaana, Hita, Amora, Peresa, Hivia, ve Yebusa. Taan tonowen ngoreņņa tiina, ve igham mbeb naol titub pooi.’

¹⁸“Tovenen yom ula usavia aliņag tonene pa ndolman to yes Israela. Yes pale tilooņ ghom. Ghoru ugham di ve yamņa ala avot to kinik to yes Isipa, ve asaav pani aghaze: ‘Yoova, Maaron to yei Hibrua, ivot tiei wa. Tovenen nighaze uyok payei leso nila ndug balim, ve nigham watooņrau pani izi tonowe. Pale nilaagh irau mboņ tol, ghoru nila nivot.’

¹⁹“Eemoghon you nawatag: Kinik to Isipa, ye irau iyok payam sorok maau. You irau napatooņ tapirig pani le isob, ghoru iyok payam.

t 3:14 Maaron iza kat, nene yes Yuda timbooda tovene: YHWH. Tiwaat iza tonene tovene: ‘Yahweh.’ Eemoghon tiroron pa tiwaat Maaron iza kat. Tovenen tiwatwaat Maaron tighaze ‘Adonai.’ Saveeņ Adonai, pughu tovene: ‘Tiina’ ghoru ‘Iņgeu Tiina.’ Ila saveeņ English tighaze ‘Lord.’ Saveeņ ‘nanepneep,’ nene yes Israela tisavia ila taudi aliņadi tighaze: ‘Ehyeh.’ Tovenen igharau ris pa Maaron iza Yahweh. Ighaze uwaat Baibol ila English aliņadi, Baibol katindi titaghon njar to yes Yuda, ve tiwaat Maaron iza kat maau. Tighaze ‘LORD’ (timbood leta tintina). Tauto Tok Pisin Baibol paam iwaat Maaron ighaze ‘Bikpela.’ Eemoghon ‘Iņgeu Tiina’ nene Maaron iza kat maau. Nene isavia uraat toni, to ye tiina toit ve iņgin mbeb tisob. English Baibol munginadi pida tiwaat Maaron iza tighaze ‘Jehovah.’ Sawa pida, iit tawaat Maaron iza ila aliņaad taghaze ‘Yoova.’ Eemoghon iza kat, nene Yahweh. **u 3:14** Syg 1:4,8

²⁰Tovenen you pale napatoonj tapirig pa yes Isipa, ve naghham mbeg gharatoonjadi tintina to ite kat tivot ila lolodi. Leso natatan tapiridi, ve kinik todi ipul gham ala. ²¹Sawa to yam apamundigin laghoonj, you pale naghham yes Isipa lolodi payam, ve tirei lemim mbeg pida. Leso ala toman nimamim nginiņa sob. ²²Tovenen ndiliva tiam irau tisob tila ve tighason yes Isip tidi to tineep toman di ne, pa tigham ledi nonogiiņa popoiadi toman mbaliiņ todi pida to tigharaat di pa gol ve silva. Yes pale tigham payam. Mbeg todi tonowen pale tisob tinim ndinatunim ledi pa tindud di pani. Tovenen yam pale ayou mbeg todi le isob, ghorom amundig ala.”^v

Maaron ighur tapiri ila to Mose leso igham mbeg gharatoonjadi pida

4 ¹Yoova isavsav le isob, ve Mose isaav pani ighaze: “Poia. Eemoghon ighaze yes Israela tighur ila saveeņ tiou maau, ve tiloonj ghou maau, ve tisaav payou tighaze: “Waa, Yoova ivot tiom onoon, ma ugham kaarom?” Nene pale nasaav padi vena?”

²Tovenen Yoova ighasoni ighaze: “Yom ukiskis sa tonanan?”

Mose isaav pani ighaze: “Nene titi tiou.”

³Yoova isaav pani muul ighaze: “Upiyaava izi taan.” Tovenen Mose ipiyaav titi toni izi taan, le itoora inim moot. Mose ighita moot tonowen, le ruņa iza pani ve ighau ila sagan.

⁴Yoova isaav pani muul ighaze: “Nimam izi ukis uvu.” Sawa to Mose nima izi ikis moot uvu, nene itoora inim titi muul ila nima. ⁵Ghorom Yoova isaav pani ighaze: “Uloonj. Sawa to yom ula uvot to yes Israela, ugham tovene. Leso tighur ila tighaze you Yoova, Maaron to nditimumim Abaram, Isak ve Yakop, to navot tiom, ve tiloonj alijam.”

⁶Ve Yoova isaav pani muul ighaze: “Uzeev nimam iloonj ila nonogiiņa tiom.” Mose igham tovene, ve sawa to ipas nima ivot, ighita kolekole igham nima, le isami ve ipisosoņ. ⁷Yoova isaav pani muul ighaze: “Uzeev nimam imuul iloonj ila.” Tovenen Mose izeev nima iloonj ila nonogiiņa toni muul. Ve sawa to ipasi ivot, ighita nima poia muul.

⁸Ghorom Yoova isaav pani tovene: “Ighaze yes Israela tighur ila saveeņ tiom maau, ugham mbeg gharatoonja ivot pa titi muuņ, leso ipatoonj ghom ighaze you naneep toman ghom. Ve ighaze tighur ila sone, upatoonj mbeg ite tonanan padi, leso tighita ve tighur ila. ⁹Ve ighaze mbeg gharatoonjadi ru tonanan igham di tighur ila saveeņ tiom maau, ghorom utib ya Nil rita, ve uliņi izi taan mamaasa. Ya tonanan pale itoora inim siņ.”

¹⁰Ghorom Mose isaav pa Yoova ighaze: “O Tiina, you tonene, ŋgeu to savsaveeņ maau. Muuņ ve inim, avog ipataņan pa savsaveeņ. Ve aazne paam, yom uvot tiou ve usavsav toman ghou, eemoghon avog ipapataņan sone.”^w

¹¹Tovenen Yoova isaav pani ighaze: “Sei ighur tamtoghon avodi? Ve sei igham tamtoghon taliḡadi ipam ve avodi ivool? Ve sei igham tamtoghon matadi iyaryaar ve tighita ndug, ve igham matadi ipis? You Yoova moghon. Ite paam maau.”^x

¹²Tovenen aazne, umundig ve ula. You taug pale naneep toman ghom, ve napariaaḡ ghom pa savsaveeḡ, ve napatoonḡ ghom pa sa saveeḡ to naghaze usavia.”^y

¹³Eemoghon Mose ipamuul Maaron aliḡa ighaze: “Aa Tiina tiou, you naraua maau. Umbaan tamtoghon ite paam ila.”^z

¹⁴Tovenen Yoova ate yabyab pa Mose, ve isaav pani ighaze: “Ve vena pa togham Aron? Ye siḡ to Levi paam. You nawatagi: Ye ḡgeu to savsaveeḡ. Ulooḡ. Ye ilaagh itaghon ataam inim ighaze ighita ghom. Sawa to inim peria ve ighita ghom, ye pale lolo poia kat. ¹⁵Tovenen sa saveeḡ to nasavia payom, yom irau usavia pani ve ilooḡa. Ghoru ana igham avom, ve ivotia aliḡam pa tamtoghon. You taug pale napariaaḡ gham pa savsaveeḡ, ve napatoonḡ gham pa sa ḡgar to pale aghami.

¹⁶Tovenen Aron pale igham avom ve ivotia aliḡam pa ival tiina. Yamru pale ataghon ḡgar inimale you Maaron naghamaḡham pa yes propeta tiou. Pasa, yom pale usavia aliḡam ila toni, ghoru ana isavia ila pa ival tiina.

¹⁷“Ve matam iḡgal titi tiom paam. Ukisi ve ula. Pasa yom pale ugham mbeb gharatoonḡadi pida tivot pani. Mbeb tonanan pale tinim ghilalooḡ payom tighaze you naneep toman ghom.”

Mose imuul

¹⁸Mose yesuru Yoova tisavsav le isob, ghoru imuul ila to rawa Yetro, ve ighasoni ighaze: “Olman, naghaze namuul nala Isip ve nangig tonḡvetaz tiou. Tisob tinepneep, ma pida timatmaat wa?”

Rawa iyok pani ighaze: “Poia. Ula toman lolom poia.”

¹⁹Sawa to Mose ineep izi Midian, Yoova isaav pani ighaze: “Umuul ula pa Isip. Pasa, ndiran to muuḡ tighaze tirab ghom umaat, yes tisob timatmaat wa. ²⁰Tovenen Mose igham azuwa toman ndinatu, ighur di tizala esele, ve ikis titi to Maaron, ve tipamundigin laghoonḡ todi tighaze tizila pa Isip. ²¹Tilaghlaagh tila, ve Yoova isaav pani ighaze: “You naghur tapirig iza tiom, leso ugham mbeb gharatoonḡadi naol naol. Sawa to yom ula uvot Isip, ugham mbeb gharatoonḡadi tonanan tisob tivot ila kinik todi mata. Eemoghon you pale naghamaḡ ḡgar toni iyaryaaḡ kat. Leso ipul yam Israela ala rikia sob. ²²Ghoru uvotia aliḡaḡ pani ighaze: ‘Yoova isaav payom tovene: Tamtoghon to Israel, yes tinimale natug aidaba. ²³You nasaav payom wa naghaze upul ndinatug tinim,

leso timbees payou ve tisuŋ payou. Eemoghon yom uzoor aliŋag, ve uŋguruut di. Tovenen you pale narab natum aidaba imaat.’ ”^a

²⁴Mose yesuru azuwa ve ndinatu tilaghaaagh tila le mboŋ izi, ghoru tineep izi ndug eez ve atedi izi. Sawa tonenen, Yoova ivot to Mose, ve ighaze irabi imaat. ²⁵Eemoghon Mose azuwa Sipora rikia moghon igham gharghar ve ighorot natu waar toni uli, ve ighuri ila Mose aghe, ve isaav pani ighaze: “Yom azuwag kat. Pasa, siŋ izala poghom wa.”^b

²⁶Yoova ighita mbep tonenen, tauto irab Mose imaat maau, ve ipuli ineeep. [Ghoru tipamundigin laghoon todi muul ve tila.]

²⁷Mose togha Aron inepneep izi Isip, ve Yoova ila ivot toni, ve isaav pani ighaze: “Umundig ula pa ndug balim, ghoru ughita tazim Mose tonowe.” Tovenen Aron imundig ila, ve ivot to Mose izi lolooz to Maaron pughu. Ye ighita tazi Mose, le lolo poia kat ve iyaŋin pani. ²⁸Ghoru Mose ipaes pani pa saveeŋ isob to Yoova imbaaŋa pa ivotia. Ve ipaesia mbep gharatooŋadi to Yoova isaav pani pa ighami ne paam.

²⁹⁻³⁰Ghoru yesuru tillaagh muul. Tila tila le tivot Isip, ghoru tipoi ndolman tisob to yes Israela tinim ve yesŋa tilup di, ve Aron ipaes padi pa saveeŋ isob to Yoova isavia pa Mose. Ve ipatooŋ mbep gharatooŋadi pida tonenen paam ila ival tiina matadi ve tighita, leso tighur ila tighaze Yoova ineeep toman di pa uraat todi. ³¹Tovenen ival tiina tighur ila saveeŋ todi. Sawa to ival tiina tilooŋ tighaze Yoova ighita pataŋani todi ve ighaze iuul di, yes tiput aghedi, ve tipait Maaron iza.

Mose yesuru Aron tila tighita kinik to Isip

5 ¹Mose yesuru Aron tilup yes Israela le isob, ghoru tila tighita kinik to Isip, ve tisaav pani tighaze: “O kinik, ulooŋ. Yoova, ye Maaron to yei Israela, aliŋa ilat payom ighaze: Upul tamtoghon toni tila pa ndug balim. Leso tilup di tonowe, ve tigham suŋuŋ tiina pani.”

²Eemoghon kinik isaav padi ighaze: “Yoova, ye sei, to pale naloŋ aliŋa ve napul yam Israela ala? You nawatag Yoova maau. Tovenen irau naloŋ aliŋa, ve napul yam Israela ala ne maau.”

³Tovenen yesuru tisaav pani muul tighaze: “Yoova, Maaron to yei Hibrua, ivot tiei wa. Tovenen nighaze upul ghei nila pa ndug balim. Leso nilup ghei pa suŋuŋ tonowe, ve nigham watoŋrau pani. Pale nilaagh irau mboŋ tol, ghoru nila nivot. Ighaze nila toni maau, ye pale igham moroghoŋ samia eta ivot payei ve iwaghamun ghei, ma igham malmal ivot ve timbut ghei pa buza.”^c

⁴Eemoghon kinik ipamuul aliŋadi ighaze: “Pughu vena to yamru aghaze agham tamtoghon tipul uraat todi? Rikia moghon ve amuul ala pa uraat tiam! ⁵Aazne, yam loomba sorok amasa anim ival kat. Tauto yamru aghaze agham nditamim tipul uraat todi ne?”

a 4:23 Igham 12:29 b 4:25 Mbnp 17:9+ c 5:3 Igham 3:18

Kinik to Isip ighur patanjani ite paam pa yes Israela

⁶⁻⁷Ndag ee moghon tonenen, kinik to Isip imundig ve isaav ariana pa tau uraata toni pida to tighurghur uraat pa yes Israela, toman Israela pida to tingin nditadi pa uraat, ighaze: “Alooj. Wit ve bali ayadi to Israela titoor taan tomani ve tigharaat brik pani, auul di pani muul malep. Aneep, ve taudi tila tikaala ve tighami. ⁸Eemoghon uraat to aghuri padi, anduura izi malep. Ineep toman ina. Pasa, yes maatedi kat pa uraat. Tauto titaņ roran ghou tighaze napul di tila leso tigham watoonrau pa Maaron todi. ⁹Tovenen yam aghur uraat patanjani kat padi. Leso tigham ngar pa saveeņ kaarom muul sob.”

¹⁰Kinik isavsaav toman di le isob, ghoru yes uraata toni tonowen yesna yes Israela to tingin nditadi pa uraat, tila tivot to ival tiina to Israel, ve tipaes padi tighaze: “Kinik aliņa ilat payam tovene: Ye irau iuul gham pa wit ve bali ayadi muul maau. ¹¹Aazne ve ila, ye ipul uraat tonenen ila yam taumim nimamim. Tovenen yam ala pa sa ndug to irau andeeņ mbeb ayadi, ve ayou lemim. Eemoghon uraat to yei nighuri payam, nene irau ninduura izi maau. Brik piiz to yei nighur di payam pa agharaat di, yam irau apasob di raraate inimale muuņ.”

¹²Tovenen yes Israela timbiriis tirau taan isob to Isip, ve tiyouyou wit ve bali ayadi to timbut motmotin di. Leso titoor taan tomani ve tigharaat brik pani. ¹³Yes daba to tighurghur uraat padi, tipasul di tighaze: “Ai, yam awaghamgham kat pa uraat! Ndag to naol ne, brik piiz to yei nighur di payam pa agharaat di, yam irau apasob di inimale muuņ, sawa to niuluul gham pa mbeb ayadi.” ¹⁴Ve yes daba tonowen tila to yes Israela to tingin nditadi pa uraat, ve tilos di, ve tisaav padi tighaze: “Muuņ, brik piiz to yei nighur di payam pa agharaat di, yam aghagharaat di rikia ve apasob di. Pughu vena to noor ve aazne, ninin brik tiam le imbool?”

¹⁵Tovenen yes Israela to tingin nditadi pa uraat, tila to kinik ve titaņ rorani tighaze: “Tiina tiei, yei mbesooņa tiom. Pughu vena to ugham ngar tonene payei? ¹⁶Aazne, tilos katin ghei le tinimai isami. Pasa, tighaze yei nigham uraat iraua maau. Ve sei inim pughu pani? Nene yes uraata tiom. Pasa, yes tisaav pa yei mbesooņa tiom tighaze nigharaat brik inimale muuņ. Eemoghon tiuul ghei pa mbeb ayadi muul maau. Tauto nigharaat naol maau.”

¹⁷Kinik iyaan di ighaze: “Yam maatemim pa uraat! Arau uraat maau! Tauto anoknok saveeņ payou aghaze napul gham ala, leso agham watoonrau pa Maaron tiam Yoova. ¹⁸Eemoghon pale maau. Rikia moghon amuul ala pa uraat tiam. Irau tiuul gham pa mbeb ayadi muul maau! Ve brik piiz to tisaav payam pa agharaat di, yam irau apasob di.”

¹⁹Yes tilooņ saveeņ tonene, ve tighilaal tighaze yes tineep ila patanjani tiina lolo wa. Pasa, kinik isaav padi ighaze: Brik piiz to tighuri padi to tigharaat di, irau tinduura izi maau. Yes irau tipasob di le tisob.

²⁰Ghoro tipul kinik ve tivot tila, le tindeen Mose yesuru Aron. Pasa, yesuru tineep pumuri ve tisaşan di. ²¹Tighita di, ve tiyaan yesuru tighaze: “Ŋgar to agham payei, Yoova ighita wa. Ve ye tau pale ighur atia payam! Pasa, yamru to agham kinik yesŋa uraata toni atedi yabyab kat payei. Yes tighita ghei tighaze yei samsamiamai kat. Aazne, yamru aghur buza ila nimadi, lesob timbut ghei nisob nimatmaat.”

Mose lolo ipataŋan ve itaŋ roran Maaron

²²Tovenen Mose imuul ila, ve ighason Yoova ighaze: “O Tiina, pughu vena to yom ugham pataŋani tiina tonene ivot pa tamtoghon tiom? Yom umbaaŋ ghou nanim sualen pasa? ²³Sawa inim mata to nala navotia aliŋam pa kinik to Isip, ve inim aazne, ye ighurghur pataŋani naol pa yes Israela. Eemoghon yom uul di rita pa pataŋani todi maau.”

Maaron ipariaaŋ saveeŋ mbuaaŋ toni muul

6 ¹Tovenen Yoova isaav pa Mose ighaze: “Aazne, yom pale ughita katin ŋgar to you pale naghama pa kinik to Isip. You pale napatoon tapirig tiina pani, lesob ipul yes Israela tila. Ye pale ighita katin you tapirig le isob, ghoro izurun gham aghau pa ndug toni.”

²Ve Maaron isaav pa Mose muul ighaze: “You Yoova nanepneep.

³Muun, sawa to navot to Abaram, Isak, ve Yakop, navotia taug padi naghaze: You Maaron Arianag To Nalib Pa Ndimaronŋa Tisob. Eemoghon izag Yoova, nene navotia padi maau.^d

⁴Ve nambua saveeŋ toman di naghaze yeiŋa pale nilup ghei ninim ee moghon, ve naghama taan to yes Kanaana to tineep tinim loomba pani ne, inim ledi.^e

⁵“Aazne, yes Israela titaŋ tiina pasa, yes Isipa tighamgham samin di, ve tighurghur pataŋani naol padi. Eemoghon taŋiiz todi, you naloona wa. Ve matag ingalŋgal saveeŋ mbuaaŋ tiou.^f

⁶“Tovenen yom ula ve uvotia aliŋag pa yes Israela ughaze: ‘You Yoova nanepneep. Aazne, yam anim mbesoona sorok pa yes Isipa, ve titatan gham pa tapiridi, ve lemim ataam eta maau. Eemoghon you pale naghama mbeg gharatoonadi tintina pida, lesob naghama mulin gham ila yes Isipa nimadi. Pale napatoon tapirig tiina ivot ighazon, ve naghur atia inarua yes Isipa pa sosor todi. Lesob napas gham avot pa pataŋani tiam.

⁷Ve you pale naghama gham anim tamtoghon tiou, ve you Yoova nanim Maaron tiam. Ve yam pale awatag katin ghou, ve aghazon pa gabuag toman ŋgar tiou. Pasa, uraat to naghaze naghama payam, nene pale ipatoon gham pa ŋgar tiou. Onoon, aazne yes Isipa titatan gham pa tapiridi. Eemoghon you pale naghama mulin gham ila nimadi, ve

d 6:3 Mbnp 17:1, 26:24, 28:13+ **e** 6:4 Mbnp 12:7; Hib 11:8+ **f** 6:5 Igham 2:24

nagharaat ataam payam, leso apul ndug todi ve ala. ⁸Muun, you nambua saveen ve napariaan̄a le iyaryaan̄ kat naghaze you pale naghām taan to yes Kanaana inim Abaram, Isak, ve Yakop ledi. Tovenen you pale naghām gham ala avot taan tonowen, ve naghāmi inim lemim, leso aneep tonowe itaghoni taghoni gha ila. Pasa, you Yoova nanepneep.’”

⁹Yoova isavia saveen tonene le isob, ghorō Mose ila ipaesia Yoova aliṅa pa yes Israela. Eemoghon uraat pataṅani to yes tighamghami, nene itatan di le tapiridi isob kat. Tovenen lolodi pa tilooṅ saveen toni maau. ¹⁰⁻¹¹Ghorō Yoova isaav pa Mose muul ighaze: “Ula ughita kinik to Isip, ve usaav pani ughaze iyok pa yes Israela, leso tipul taan toni ve tila.”

¹²Eemoghon Mose ipamuul Yoova aliṅa ighaze: “You ṅgeu to savsaveen maau. Ighaze yes Israela tilooṅ saveen tiou maau, nene kinik paam, irau ilooṅ ghou maau.”^g

¹³Ghorō Yoova isaav pa Mose yesuru Aron ighaze timuul tila to yes Israela ve kinik to Isip. Ve ighur uraat pa yesuru ighaze tigham yes Israela tipul Isip ve tila.

Pitiṅ to Mose yesuru Aron

¹⁴Nene yes Israela pughudi.

Yakop natu aidaba iza Ruben. Ve Ruben ndinatu, nene Anok, Palu, Ezron, ve Karmi. Yes tonene tivot tinim ival, ve muri ghorō tinim rumai paan̄.

¹⁵Yakop natu Simeon ndinatu, nene Yemuel, Yamin, Oat, Yakin, Zoar, ve Saul. (Saul tina, ye Kanaan tidi.) Yes tonene to tivot ila to Simeon. Yes tivot tinim ival, ve muri ghorō tinim rumai liim ve eez.

¹⁶Yakop natu Levi ndinatu izadi, nene Gerson, Koat, ve Merari. Levi ineep irau ndaman 137, ve imaat. ¹⁷Gerson ndinatu, nene Libni ve Simei. ¹⁸Koat ndinatu, nene Amram, Izar, Ebron, ve Usiel. Koat ineep irau ndaman 133, ve imaat. ¹⁹Merari ndinatu, nene Mali ve Musi. Yes tonene to tivot ila to Levi. Nene pitiṅ to Levi toman papaghu toni. Yes tivot tinim ival, ve muri ghorō tinim rumai tol.

²⁰Amram ivai wagma liva Yokopet. Ve Yokopet ipoop Aron yesuru Mose. Amram ineep irau ndaman 137, ve imaat. ²¹Izar ndinatu, nene Kora, Nepek, ve Zikri. ²²Ve Usiel ndinatu, nene Misael, Elzapan, ve Sitri.

²³Aron ivai Eliseba to Aminadap natu liva, ye Nason livu. Eliseba yesuru Aron tipoop paan̄: Nadap, Abiu, Eleasar, ve Itamar. ²⁴Kora ndinatu, nene Asir, Elkana, ve Abiasap. Kora ndinatu tol tonene tivot tinim ival, ve muri ghorō tinim rumai tol. ²⁵Aron natu Eleasar ivai Putiel natu liva, ve tipoop Pineas.

Yes tonene to Levi papaghu toni, ve tinim daba pa rumai todi todi.

²⁶⁻²⁷Nenen Aron yesuru Mose pughudi. Yoova ighur yesuru pa timuun pa yes Israela, ve tigham di tipul Isip, ve tilaagh ila rouņ rouņ itaghon rumai todi todi, ve tila pa taan Kanaan. Ve yesuru to tisaav pa kinik to Isip tighaze iyok padi lesu tigham yes Israela tipul Isip ve tila.

²⁸⁻²⁹Sawa to Mose inepneep izi Isip, Yoova isaav pani ighaze: “You Yoova nanepneep. Saveeņ isob to you nasavia payom, yom irau usavia pa kinik to yes Isipa lesu ilooņa.”

³⁰Eemoghon Mose isaav pa Yoova ighaze: “You ŋgeu to savsaveeņ maau. Pale kinik ilooņ ghou vena?”^h

Maaron ipaesia ŋgar to ye pale ighami izi Isip

7 ¹Yoova isaav pa Mose muul ighaze: “Ulooņ. You Maaron to naghur ghom pa ugham naghog, ve uyoon ila kinik to Isip mata. Ve togham Aron pale inim propet tiom, ve ivotia aliņam pa kinik. ²Tovenen sa saveeņ to you nasavia payom, yom irau usavia pa Aron. Leso ana isavia aliņag ila to kinik. Ye pale isaav pa kinik lesu iyok pa yes Israela ve tipul ndug toni. ³Eemoghon you pale naghham kinik ŋgar toni iyaryaņ kat. Leso leg soso pa napatooņ tapirig izi taan to yes Isipa, ve naghham di tighilaal tighaze you nanepneep. Pale naghham mbeb gharatooņadi naol to ite kat.ⁱ

⁴Tovenen kinik to Isip irau ilooņ gham rikia maau. Pale ikis gham ris. Eemoghon muri, you pale napatooņ nimag pa yes Isipa, ve naghur pataņani tintina iza todi inim atia pa sosor todi. Ghoru naghham tamtoghon tiou Israela tipul taan to Isip ve tila. Pale tilaagh ila rouņ rouņ tinimale yes ndaaba.

⁵“Sawa to napatooņ tapirig ivot ighazooņ pa yes Isipa, ve naghham yes Israela tipul ndug todi, nene yes Isipa paam pale tighilaal tighaze: You Yoova nanepneep, ve tighazooņ pa gabuag toman ŋgar tiou.”

⁶Yoova isavsav le isob, ghoru Mose yesuru Aron tila ve titaghon katin saveeņ to ye isavia padi. ⁷Sawa tonenen, Mose ndaman toni irau tamoot paņ (80). Ve Aron ndaman toni irau tamoot paņ ve tol (83).

Titi to Aron inim moot

⁸Yoova isaav pa Mose yesuru Aron ighaze: ⁹“Alooņ. Ighaze kinik to Isip isaav pa yamru pa agham mbeb gharatooņa eta, ghoru usaav pa Aron igham titi toni, ve ipiyaava izi taan ila kinik mata. Titi toni pale itoora inim moot.”

¹⁰Tovenen yesuru tila tivot to kinik, ve titaghon katin saveeņ to Yoova isavia padi. Aron ipiyaav titi toni izi taan ila kinik toman uraata toni matadi, ve titi toni itoora inim moot. ¹¹Kinik ighita mbeb tonenen, ve ipoi

tamtoghon ngara pida yesnja mura pida to Isip tinim, ve yes paam tigham mur todi le ivot inimale Aron ighami.^j

¹²Yes enjaenja tipiyaav titi todi todi tizi taan, ve titi todi titoor di tinim moot paam. Eemoghon titi to Aron to inim moot, itoon moot todi tonowen tisob.

¹³Kinik ighita mbef gharatoonja tonenen pa tau mata. Eemoghon ngar toni iyaryaaj kat ighaze izoor Maaron aliija. Ijgar to ye ighami, nene denja kat pa saveej to muuj Yoova isavia pa yesuru.

Patanjani to ivot pa yes Isipa muuj: Ya inim sij

¹⁴Muri ghoru, Yoova isaav pa Mose muul ighaze: “Kinik to Isip, ngar toni iyaryaaj kat ighaze ye irau ipul yes Israela tila maau. ¹⁵Bozo mbonmaagh, ye pale izila ya Nil. Tovenen yom ugham titi to itoora inim moot, ve umuuj uzila usanjani izi ya dige. Sawa to ye ilat peria, ¹⁶ghoro usaav pani ughaze: ‘Yoova, Maaron to yei Hibrua, imbaaj ghou nanim, ve nasavia aliija payom wa. Ye ighaze yom upul tamtoghon toni Israel tila, lesu timbees pani ve tisuj pani izi ndug balim. Eemoghon sawa tonenen ve inim aazne, yom ulooj aliija rita maau. ¹⁷⁻¹⁸Tovenen Yoova aliija ilat payom muul ighaze ye pale igham ngar ite paam. Lesu uwatag ughaze ye inepneep, ve ughazooj pa gabua toman ngar toni. Ughita. You pale nalos ya Nil pa titi tiou to nakiskisi ne, ghoru ya Nil pale itoora inim sij, ve iigh to tineep ila ya lolo tisob timatmaat. Ve ya pale vuzi mbuuzaa kat. Tovenen tamtoghon to Isip pale lolodi pa tighuni muul maau.’ ”

¹⁹Ve Yoova isaav muul pa Mose ighaze: “Usaav pa togham Aron igham titi toni, ve ipatoonja injarua ya tisob to yes Isipa. Ya tintina, ve ya gegegeu to tirereer taghon uum lolodi, ya naliu, ve ya todi to ghunuuj to inep ila uur ve rubruub lolodi ne paam. Ya tonowen pale tisob tinim sij moghon. Tovenen sij pale irau taan isob to Isip.”

²⁰Tovenen Mose yesuru Aron tila ve titaghon katin saveej to Yoova isavia padi. Aron ila iyoon ila kinik to Isip yesnja uraata toni matadi, ve iit titi toni iza, ghoru ilos ya Nil pani, ve ya Nil itoora inim sij. ²¹Tovenen iigh to tineep ila ya lolo, tisob timatmaat le ya vuzi. Ya to yes Isipa, eta poia muul maau. Tisob tinim sij moghon. Tovenen yes Isipa irau tighun ya Nil muul maau.

²²Eemoghon yes mura to Isip timundig, ve anadi tigham mur todi pa ya, le ivot inimale Mose yesuru Aron tighami. Tovenen kinik ngar toni iyaryaaj muul, ve ilooj yesuru saveej todi maau. Ijgar to ye ighami, nene denja kat pa saveej to Yoova isavia pa Mose yesuru Aron muuj.

²³Ghoru kinik itoora, ve imuul ila pa ruum toni, ve mata ila pa mbef tonenen muul maau. ²⁴Yes Isipa irau tighun ya Nil muul maau. Tovenen

titai saambu katindi itaghon ya Nil dige, lesu titib adi ya pa tighun.
²⁵Yoova iwaghamun ya Nil, ve ineep tovene irau mboj liim ve ru.

Pataņani inim ru: Ŋgob katindi tivot

8 ¹Mboj liim ve ru tonenen isob, ghero Yoova isaav pa Mose ighaze: “Ula ughita kinik to Isip muul, ve usaav pani ughaze: ‘Yoova aliņa ilat payom ighaze upul tamtoğhon toni Israel tila, lesu timbees pani ve tisuj pani. ²Ighaze unğuruut di, upatum ghom. Pasa, ye pale nawaghamun taan dodoli to Isip pa Ŋgob. ³Ŋgob ndiņđiņ ndiņđiņ pale tivot pa ya Nil, ve tipul ya, ve tiņarua ruum tiom tilat. Ghero tilooņ tila ruum, ve tiyatov di tizala inam to ghenooņ paam. Ve tilooņ tila ruum to uraata tiom, ve tiyatov di tizala ival tiina to Isip poghodi paam. Ve Ŋgob pale tilooņ tila inamim to naznazuuņ, ve tiyatov di tilooņ tila uur to toraaņ mberet lolodi paam. ⁴Tovenen yamņa uraata tiom, ve ival tiina to Isip paam, Ŋgob pale tiyatov di tizala poghomim.’ ” [Yoova isavsaav le isob, ghero Mose ila ipaesia aliņa tonenen pa kinik. Eemoghon kinik ilooņa maau.]

⁵Tovenen Yoova isaav pa Mose muul ighaze: “Usaav pa Aron iit titi toni iza, ve ipatooņa iņarua ya tisob to Isip: Ya tintina, ve ya gegegeu to tirereer taghon uum lolodi, ve ya naliu paam. Lesu Ŋgob tivot pa ya to naol, ve tineep irau taan isob to Isip.”

⁶Tovenen Aron iit titi toni iza, ve ipatooņa iņarua ya tisob to yes Isipa. Ghero Ŋgob ndiņđiņ ndiņđiņ tivot, le tineep irau taan isob to yes Isipa. ⁷Eemoghon yes mura to Isip tigham mur todi, ve yes paam tigham Ŋgob katindi tivot izi taan to Isip.

⁸Ghero kinik to Isip ipoi Mose yesuru Aron tinim, ve isaav padi ighaze: “Yamru aghason Yoova pa indiiir Ŋgob tonene tighau payou ve tamtoğhon tiou paam! Lesu napul yes Israela tila tigham watooņrau pa Yoova.”

⁹Mose isaav pani ighaze: “Poia. Yom taum ughur sawa eta pa nasuj pa Yoova. Lesu lolo isamin ghom toman yes uraata tiom ve ival tiina to Isip, ve indiiir Ŋgob tighau pa ruum tiam. Eemoghon Ŋgob to tineep ya Nil dige, pale tinepneep tovene.”

¹⁰⁻¹¹Tovenen kinik isaav pani ighaze: “Bozo, ghero usuņ.”

Mose isaav pani ighaze: “Poia. Pale nataghon aliņam. Lesu uwatag kat ughaze Yoova, Maaron to yei Israela, ye Maaron tau. Ye raraate inimale ndimarooņa pida maau. Bozo ghero, Ŋgob tisob tipul ghom toman ruum tiom, ve tipul yes uraata tiom, ve ival tiina to Isip paam, ve tisob tighau tila. Eemoghon Ŋgob tau tineep ya Nil dige, pale tinepneep tovene.”

¹²Tovenen Mose yesuru Aron tipul kinik, ve timuul tila. Ghero Mose itaņ roran Yoova ighaze Ŋgob to iņgal kinik mata pani ne, indiiir di tighau tila. ¹³Ve Yoova ilooņ suņuuņ toni. Tovenen Ŋgob tisob to tineep ila ruum to yes Isipa lolodi, ve taghon ruum digedi ve uum lolodi, nene tisob

timatmaat. ¹⁴Ghoro yes Isipa tindou di ila ndouj ndouj, ve timbuuz le vuzidi ikau ndug.

¹⁵Sawa to kinik to Isip ighita patajani to ngob isob, ye isaav ighaze: “Suleem! Aazne ghara, atemai izi!” Eemoghon ngar toni iyaryaaj muul ighaze izoor Yoova aliya. Tovenen ilooj Mose yesuru Aron alijadi maau, ve injuruut yes Israela muul. Nggar to ye ighami, nene denja kat pa saveej to Yoova isavia pa Mose yesuru Aron.

Patajani inim tol: Suum tivot

¹⁶Sawa pida inim ila, ghoro Yoova isaav pa Mose ighaze: “Usaav pa Aron igham titi toni, ve ilos taan. Leso ghavuur irau taan isob to Isip itoora inim suum.” ¹⁷⁻¹⁸Tovenen yesuru titaghon Maaron aliya. Sawa to Aron igham titi toni ve ilos taan pani, ghavuur isob to Isip itoora inim suum, ve tijut yes Isipa toman ngai todi le tisami kat. Ghoro yes mura anadi tighaze titoov tapiridi lesu tigham suum pida paam tivot. Eemoghon tirau maau. ¹⁹Tovenen tila tipaes pa kinik tighaze: “Wai, mbeb tonene ivot ila Maaron tau nima.” Eemoghon kinik ngar toni iyaryaaj kat ighaze izoor Maaron aliya. Tovenen ilooj Mose yesuru Aron maau. Nene denja kat pa Yoova aliya to muuj isavia.

Patajani inim paaj: Raaj samsamiadi tivot

²⁰Muri ghoro, Yoova isaav pa Mose ighaze: “Bozo ndoromaaja, ve umundig uzila ya Nil dige, ve usaan kinik to Isip. Ighaze inim ivot, ghoro unjarua ula, ve usaav pani ughaze: ‘Yoova aliya ilat payom ighaze upul tamtoghon toni tila, lesu timbees pani ve tisuj pani. ²¹Ighaze unjuruut di, upatum ghom. Pasa, ye pale imbaaj raaj tintina ndiijndij ndiijndij tilat, ve tijut ghom toman yes uraata tiom, ve ival tiina to Isip paam. Ndug tiam toman ruum tiam pale tivon pa raaj tintina. ²²⁻²³Eemoghon ye pale ipoon taan suruvu to Gosen to tamtoghon toni Israel tineep ila, ve raaj eta irau ivot padi maau. Leso yom uwatag ughaze ye ineep izi taan tiom paam. Pasa, ye pale itaghon ngar eez pa tamtoghon toni, ve ngar ite pa tamtoghon tiom. Bozo, ghoro igham mbeb gharatoonja tonene ivot, lesu ipatoonj tapiri payom.’ ”

²⁴Yoova itaghon aliya tonene, ve igham anonja ivot. Ye igham raaj tintina ndiijndij ndiijndij tivot. Raaj tonowen tilooj tila kinik ruum toni, ve ruum to yes uraata toni, ve tineep irau taan isob to yes Isipa. Tiwaghamun yes Isipa le tisami kat. ²⁵Tovenen kinik imbaaj pa Mose yesuru Aron tinim, ve isaav padi ighaze: “Iraua lak! Yam Israela ala agham watoonjrau pa Maaron tiam. Eemoghon ala ndug mala malep. Aneep tatanjan izi taan to yei Isipa, ve agham uraat tonanan.”

²⁶Eemoghon Mose isaav pani ighaze: “Vana maau. Ighaze nirab ngai tiei tinim watoonjrau pa Maaron tiei Yoova ila yes Isipa matadi, nene

pale irau ngar todi maau, ve timundig ve tirab ghei pa yaam. ²⁷Tovenen nighaze yom uyok payei, leso nila ndug balim, ve nigham watoonrau pa Maaron tiei Yoova tonowe itaghon saveen to ye tau isavia payei. Pale nilaagh irau mboŋ tol, ghoru nila nivot.”

²⁸Kinik iloon saveen tonene, ve ighaze: “Poia. You nayok. Yam irau ala ndug balim ve agham watoonrau pa Maaron tiam Yoova. Eemoghon ala ndug mala malep. Ve matamim ingal ghou paam ila sunjuun tiam.”

²⁹Mose ipamuul aliŋa ighaze: “Uloon. You naghaze namundig nala tonene. Sawa to napul ghom ve nala, you pale nasun pa Yoova, leso bozo indiiir raan tonene tighau payam. Yamŋa uraata tiom, ve ival tiina to Isip paam, raan pale tighau pa yam asob. Eemoghon kinik, you nasaav payom: Ugham kaarom payei ve unguruut ghei muul malep. Upul ghei nila nigham watoonrau pa Yoova.”

³⁰Ghoru Mose ipul kinik, ve ila isun pa Yoova. ³¹Yoova iloon sunjuun toni, ve indiiir raan tisob tighau pa kinik toman uraata toni ve ival tiina to Isip, le raan eta ivot muul maau. ³²Eemoghon kinik ngar toni iyaryaŋ muul ighaze ikis yes Israela tineep. Tauto ipul di tila maau.

Pataŋani inim liim: Maaron ighur moroghoon iŋarua ŋgai to yes Isipa

9 ¹Sawa pida inim ila, ghoru Yoova isaav pa Mose ighaze: “Ula to kinik to Isip, ve usaav pani ughaze: ‘Yoova, Maaron to yei Hibrua, aliŋa ilat payom ighaze upul tamtoghon toni tila, leso timbees pani ve tisun pani. ²Ighaze uzoor saveen, ve upul di tila maau, ve unoknok ŋgurutaan di, upatum ghom. ³Pasa, ye pale ipatoon tapiri payom, ve ighur moroghoon samia kat pa ŋgai tiam to tilaghaagh pumuri. Hos, esele, kamel, makau, sipsip, ve mekmek tiam pale timatmaat. ⁴Eemoghon ŋgai to yes Israela, eta irau imaat maau. Pasa, Yoova pale igham ngar eez pa yes Israela ŋgai todi ve ngar ite pa yam Isipa ŋgai tiam. ⁵Ve Yoova ighur sawa ighaze bozo, ghoru igham mbeb tonene ivot izi taan tonene.’”

⁶Ve onoon, mboŋ ndugizau, ghoru Yoova igham mbeb tonenen ivot, le yes Isipa ŋgai todi katindi timatmaat. Eemoghon yes Israela, ŋgai todi eta imaat maau. ⁷Kinik to Isip imbaan tamtoghon pida tila titiir ndug, ve tighita ŋgai to yes Isipa moghon to timatmaat. Ve Israela todi, popoiadi moghon. Eta imaat maau. Eemoghon mbeb tonowen ipamundigin ngar to kinik maau. ŋgar toni iyaryaŋ kat ighaze inguruut yes Israela tineep. Tauto ipul di tila maau.

Pataŋani inim liim ve eez: Mbotmboot samsamia igham yes Isipa

⁸Muri ghoru, Yoova isaav pa Mose yesuru Aron muul ighaze: “Yamru ala ndug to tipatuntun uur, ve akor avab le nimamim borokia, ghoru ala aghita kinik to Isip. Ala avot toni, ghoru Mose iyoon ila kinik mata, ve itir avab iza. ⁹Avab tonanan pale imbiriiis irau taan isob to yes Isipa. Ve

sawa to itap izala tamtoghon ve ŋgai poghodi, nene pale sambor toman mbotmboot samsamia igham di.”

¹⁰Yoova isavsaav le isob, ghero yesuru tila ndug to tipatuntun uur, ve tikor avab. Yesuru tila tiyoon ila kinik nagho, ve Mose itir avab iza le imbiriiis. Sawa to avab ghavuura tonowen itap izala tamtoghon ve ŋgai poghodi, sambor toman mbotmboot samsamia igham di.^k

¹¹Yes mura paam, sambor igham di le tisami kat tinimale ival tiina to Isip. Tovenen tapiridi irau Mose maau.

¹²Eemoghon Yoova igham kinik ŋgar toni iyaryaar le iyaryaar kat. Tovenen ye ilooŋ Mose yesuru Aron maau. Ŋgar to kinik ighami, nene denja pa Yoova aliŋa to muuŋ isavia pa Mose.

Patani inim liim ve ru: Ais patu patu titaptap tizi

¹³⁻¹⁴Patani to mbotmboot isob ve muri ghero, Yoova isaav pa Mose ighaze: “Bozo mboŋmaagh, ghero umundig ula ve usaŋan kinik to Isip. Sawa to inim ivot, ghero usaav pani ughaze: ‘Yoova, Maaron to yei Hibrua, aliŋa ilat payom ighaze upul tamtoghon toni tila, lesa timbees pani ve tisun pani. Ighaze upul di tila maau, upatum ghom. Pasa, ye pale iŋgal yamŋa uraata tiom ve ival tiina to Isip matamim pa patani pida to tintina kat. Lesa yom uwatag kat ughaze: Maaron eta to taan raraate inimale ye maau. ¹⁵Inimale ye ipatoon katin tapiri payom, tone iwaghamun ghom toman tamtoghon tiom pa moroghoon tiina, ve ipasob gham pa taan alok wa. ¹⁶Eemoghon igham tovene maau. Pasa, ye ighur ghom pa pughu tonene: Ye ighaze ipatoon tapiri ivot le ighazoon payom, lesa muri tamtoghon tivotia varu irau taan isob.^l

¹⁷Aazne, yom upakur ghom, ve utatan tamtoghon toni, ve unguurud di ughaze tila malep. ¹⁸Tovenen bozo mboŋmaagh, sawa tovene, ye pale igham ais patu patu titaptap tizi. Sawa to nditimum tipamundigin Isip inim ndug paghu, ve inim imuul aazne, ais patu patu tovene titap tizi ndug tiam pa eta sone. ¹⁹Tovenen usaav pa uraata tiom tigham ŋgai tiom toman mbep tiom to tineep pumuri, ve tighur di tisob tilooŋ tila ruum, lesa ruum ipoon di. Mbep eta ineep pumuri malep. Pasa, ais patu patu to pale tizi, nene pale tirab mbep tisob to tineep pumuri, le timatmaat.’ ” [Yoova isavsaav pa Mose le isob, ghero Mose ila ipaesia Yoova aliŋa pa kinik.]

²⁰Yes uraata to kinik to tighur ila Yoova aliŋa ve timatughez pani, rikia moghon tighur ŋgai ve mbesooŋa todi tisob tilooŋ tila ruum.

²¹Eemoghon yes to tighur ila maau, tipul mbesooŋa ve ŋgai todi tineep pumuri.

²²Ghoro Yoova isaav pa Mose ighaze: “Ukaak nimam iza, lesa ais patu patu titaptap tizi irau taan isob to yes Isipa, ve tirab mbep tisob to tineep pumuri: tamtoohon, ngai, ve aniiŋ isob to uum paam.”^m

²³Tovenen Mose iit titi toni iza, ghoro Yoova igham ndug milia, ve lalaav kilinjia izizi pa taan toman avolutu tiina, ve ais patu patu titaptap tizi irau taan isob to yes Isipa. ²⁴Ais patu patu tintina kat titaptap tizi, ve ndug milia le ndug isami kat. Sawa to yes Isipa nditimbudi tipamundigin Isip inim ndug paghu ve inim, mbep tovene ivot pa ndug todi pa eta maau.ⁿ

²⁵Tovenen ais patu patu titaptap tizi irau taan isob to yes Isipa, ve tirab mbep tisob to tineep pumuri: tamtoohon, ngai, ve aniiŋ isob to uum. Ve tirab ai paam le bogadi tipolpol. Tovenen mbep tisob tisami.

²⁶Ndug ee moghon kat to ais izi pani maau. Nene taan suruvu to Gosen to yes Israela tineep pani.

²⁷Tovenen kinik to Isip imbaaŋ pa Mose yesuru Aron tinim, ve isaav padi ighaze: “Iraua lak! Aazne, you naghilaal naghaze naghama sosor wa. Yoova ngar toni, nene denja. Ve yeiŋa tamtoohon tiou nisosor. ²⁸Tovenen yamru ala ve asuŋ pa Yoova. Pasa, ais patu patu ve lalaav tonene iwaghamun ghei le nisami kat. You pale napul gham ala. Irau nanguruut gham muul maau.”

²⁹Mose isaav pani ighaze: “Poia. You pale napul ndug tiina ve navot nala pumuri, ghoro nakaak nimag iza, ve nasuŋ pa Yoova. Lesa ipasob lalaav, ve ais patu patu titap muul sob. Sawa to mbep ru tonenen putia, yom pale uwatag ughaze: Taan to naol ne, nene taan to Yoova.^o

³⁰Eemoghon you nawatag: Yamŋa uraata tiom amatughez pa Maaron tiei Yoova sone.”

³¹Sawa to ais patu patu tonowen titaptap tizi, tirab aniiŋ bali ve mbep ite to tighagharaat nonogiiŋa toman mbep pida pani ne, le tisami. Pasa, bali itub iza ve anoŋa ighaze ivot, ve mbep ite tonowen irug paam.

³²Eemoghon aniiŋ wit toman aniiŋ todi ite to tiwaata tighaze ‘spelt,’ nene tipaar sone. Tauto ais patu patu tonenen tiwaghamun di maau.

³³Mose ipul kinik, ve ivot ila pa ndug tiina dige, ghoro ikaak nima iza, ve isuŋ pa Yoova. Tovenen Yoova ipasob uman toman lalaav ve ais, ve titap muul maau. ³⁴Eemoghon sawa to kinik ighita uman toman lalaav ve ais putia, ye igham sosor muul. Yesŋa uraata toni ngar todi iyaryaŋ muul tighaze tinguruut yes Israela tineep. Lolodi pa tilooŋ Maaron aliŋa maau. ³⁵Kinik ngar toni iyaryaŋ kat. Tauto inguruut yes Israela muul. Ŋgar to ye ighami, nene denja kat pa Yoova aliŋa to Mose isavia.

Pataŋani inim liim ve tol: Isis tivot

10 ¹Muri ghoro, Yoova isaav pa Mose ighaze: “Ula ughita kinik to Isip muul. Pasa, you taug to naghama yesŋa uraata toni ngar todi

iyaryaanj. Leso naghham mbeb gharatoonjadi tintina tivot ila lolodi, ve napatoonj tapirig padi. ²Ve muri inim kamos pa yam Israela, lesa asavia pa ndinatumim ve nditimumim, ve asaav padi aghaze: ‘Muunj, Yoova ipatoonj tapiri pa yes Isipa. Ye igham mbeb gharatoonjadi tintina tivot ila lolodi, ve ipamogheran di le tiwaghamgham kat.’ Ve yam asob pale awatag aghaze you Yoova nanepneep, ve aghazonj pa gabuag toman ngar tiou.”

³Yoova isavsaav le isob, ghoru Mose yesuru Aron tila tivot to kinik, ve tisaav pani tighaze: “Yoova, Maaron to yei Hibrua, aliña ilat payom muul ighaze: Yom ukaria zoraan saveen wa. Pale neez o uput aghem pani ve uneep ila samba? Upul tamtoohon toni tila, lesa timbees pani ve tisuñ pani. ⁴Ighaze unguruut di muul, upatum ghom. Pasa, bozo mbonjmaagh, ye pale igham isis tivot, ve tiwaghamun ndug tiom. ⁵Isis to pale tivot, nene sorok maau. Pale titatab taan tiam, le aghita taan maau. Tovenen aniiñ enjaenja to ais iwaghamun di maau, isis pale tipasob di le tisob kat. Ve ai tisob to titub ila uum tiam lolodi ne paam, isis pale tighan suvun rauadi. ⁶Yamña uraata tiom ve ival tiina to Isip paam, ruum tiam pale tivon kat pa isis. Muunj kat, sawa to nditimumim tinim tigham ndug tonene, ve inim imuul aazne, aghita isis tovene tivot pa eta sone.”

Mose isavia saveen tonene le isob, ghoru itoora, ve ipul kinik, ve ivot ila pumuri. ⁷Yes uraata to kinik tisaav pani tighaze: “Wai kinik, pa piiz to yom ughaze upul ngeu tonowen igham patanani pait? Yom uwatag maau? Ndug to Isip isami wa. Upul nditamoot to Israel tila tisuñ pa Maaron todi Yoova.” ⁸Tovenen tila tigham Mose yesuru Aron timuul tinim, ve kinik isaav padi ighaze: “Aazne, you nayok payam pa ala asuñ pa Maaron tiam Yoova. Eemoghon naghaze nawatag: Sei masin kat to pale tila?”

⁹Mose ipamuul aliña ighaze: “Yei nisob pale nila. Ndolman, ndipain, ndinatumai nditamoot ve ndiliva, toman sipsip, mekmek, ve makau tiei tisob paam. Pasa, nighaze nila nigham lupuun tiina ve nisun pa Yoova.”

¹⁰Tovenen kinik isaav pani muul tovene: “Ighaze nayok payam pa ala, nene avaat Yoova ineep toman gham ve poia toni iza tiam. Eemoghon irau napul ndizwamim ve ndinatumim tila toman gham ne maau. Maau le maau kat! Pasa, ngar samia eta avaat ineep ila lolomim. ¹¹Tovenen yam nditamoot moghon irau ala ve asuñ pa Yoova. Pasa, mbeb tonenen, to yamru azorzoornug pani.” Ye isavsaav padi le isob, ghoru izurun Aron yesuru Mose tighau pa mata, ve tivot tila pumuri.

¹²Ghoru Yoova isaav pa Mose ighaze: “Ukaak nimam iza, ve upatoonja injarua taan isob to yes Isipa. Lesa isis ndiñndiñ ndiñndiñ tivot, ve tiwaghamun aniiñ toman mbeb pida to titub ila taan todi. Sa mbeb to ais iwaghamuni maau, nene pale isis tipasobi.” ¹³Tovenen Mose iit titi toni iza, ve ipatoonja injarua taan isob to yes Isipa. Ghoru Yoova igham yaghur tiina ilaagh pa taan dige to ineep ila pa ndag iza, ve inim. Yaghur

ilaagh pa ndag le mboŋ mboŋ ve ndugizau. Tauto iviviir isis tivot. ¹⁴Isis to tivot ne, sorok maau. Katindi kat. Ve tineep irau taan isob to Isip, ve tiwaghamun ndug todi. Muuŋ ve inim, isis tovene tivot izi Isip pa eta sone. Ve muri paam, irau tivot muul maau. ¹⁵Tovenen isis titatab taan isob to yes Isipa, ve tigham taan iyasosooŋ. Ve tighan suvun mbep tisob to ais iwaghamun di maau ne le tisob kat. Tighan kikiliŋ, ndoor, aniŋ, ai rauadi, ve anoŋadi paam. Taan isob to yes Isipa, mbep mbiti eta ineep muul maau.

¹⁶Tovenen rikia moghon kinik to Isip imbaaŋ pa Mose yesuru Aron tinim, ve isaav padi ighaze: “You naghama sosor tiina kat pa Maaron tiam Yoova, ve naghama sosor pa yamru paam. ¹⁷Lolomim isamin ghou muul, ve apul sosor tiou tonene. Irau naghama sosor muul maau. Ve asuŋ Maaron tiam Yoova pa indiiŋ pataŋani tonene payei. Pa vene, nisob nimatmaat.”

¹⁸Tovenen Mose ipul kinik ineep, ve ila isuŋ pa Yoova. ¹⁹Yoova ilooŋ sunuŋ toni, ve itoor yaghur ve ilaagh pa ndag izila ve inim toman tapiri, le iviviir isis tonowen tisob tila pa Te Kavianaŋa. Eta ineep muul izi Isip maau. ²⁰Eemoghon Yoova igham kinik ŋgar toni iyaryaŋ muul. Tovenen ipul ye Israela tila maau.^p

Pataŋani inim liim ve paan: Ndooroom tiina ivot izi Isip

²¹Muri ghoru, Yoova isaav pa Mose ighaze: “Ukaak nimam iza, lesu ndooroom tiina ivot izi Isip. Ndooroom tiina to pale ivot, nene ite kat. Yes Isipa pale tiyamaana tighaze nene poia maau, ve igham di titaŋtaŋ ve tiwandabndab tinimale yes to matadi pisi.” ²²Tovenen Mose ikaak nima iza, ve ndooroom tiina ikau Isip, le ineep irau mboŋ tol ve ndag tol.^{q r}

²³Ndooroom tiina tonowen ivot le yes Isipa irau tiwaghiton di maau. Tovenen mboŋ tol ve ndag tol tonenen, yes irau tilaagh maau. Tineep ila ruum todi moghon. Eemoghon ndug to yes Israela tineep pani, nene ghazooŋa. ²⁴Tovenen kinik to Isip ipoi Mose imuul inim, ve isaav pani ighaze: “Yam Israela ala asuŋ pa Yoova. Yamŋa ndizwamim ve ndinatimim asob ala. Eemoghon yam irau apul makau, sipsip, ve mekmek tiam tineep izi Isip.”

²⁵⁻²⁶Eemoghon Mose isaav pani ighaze: “Ee-e, vana maau. Pale nimundig toman ŋgai tiei tisob. Irau nipul eta ineep maau. Pasa, yei taumai nikankaan pa sa mbep to pale nigham di tinim watoonrau pa Maaron tiei Yoova. Tovenen yei irau niyou di tisob tila toman ghei. Nila nivot sa ndug to Yoova ighaze nineep pani ve nisuŋ, ghoru ye tau pale

p 10:20 Igham 4:21 **q 10:22** Maaron kaarom eez to yes Isipa, iza Ra. Yes Isipa tighur ila tighaze ye maaron to ingin ndag. Ŋgeu Tiina igham ndooroom tiina ikau Isip, lesu yes Isipa tiwatag tighaze ye tapiri ilib pa maaron todi tonowen. **r 10:22** Syg 16:10

isaav payei pa sa mbep to pale nigham di tinim watoonrau pani. Mbeb pida, pale nimoz suruvu moghon inim watoonrau. Ve pida, yab pale ighan suvun di.”

²⁷Eemoghon Yoova igham kinik ngar toni iyaryaan muul. Tovenen lolo pa ipul yes Israela tila maau.

²⁸Ve izurun Mose ighaze: “Ughau pa matag. Ve umuul unum sualen malep! Ighaze naghita ghom muul, yom pale umaat.”

²⁹Tovenen Mose ipamuul aliņa ighaze: “Poia. Saveej tauto usavia. Irau ughita ghou muul maau.”

Mose ipaes pa kinik ighaze Maaron pale irab Isipa ndinatudi aidaba tisob timatmaat

11 ¹Muri ghoru, Yoova isaav pa Mose ighaze: “You pale nangal kinik toman ival tiina to Isip matadi pa pataņani ite paam. Muri pa pataņani tonene, ye pale iyok payam ve ala. Ye pale izurun gham, ve ipasul gham ighaze rikia ve asob ala. Irau tiam eta ineep maau. ²Tovenen aazne, yom ula ve usaav pa Israela tisob, nditamoot ve ndiliva, tovene: Yes irau tila to yes Isipa to tineep tigharau di, ve tighason di pa tigham ledi mbaliņņ pida to tigharaat di pa gol ve silva.”^s

³Yoova isaav tovene pasa, ye igham yes Isipa lolodi poia pa yes Israela. Ve Mose paam, yes uraata to kinik toman ival tiina to Isip tighita tighaze ye ngeu tiina eez, ve titandag pani.

⁴Tovenen Mose isaav pa kinik ighaze: “Ulooņ! Yoova aliņa ilat payom tovene. Ighaze: ‘Mboņ anoņa, you pale nazi nanim, ve nalaagh irau taan isob to Isip. ⁵Ve ndinatumim aidaba tisob pale timatmaat. Irau napul eta ineep maau. Yom to unepneep ila inam to ghamuņņ pooz, taum natum aidaba pale imaat. Ve itaghoņi tovene ila ila le yes ndiliva mbesoņa to ledi izadi maau ve timumum wit inim palawa ne ndinatudi paam. Tamtoghon tisob to Isip ndinatudi aidaba, toman ngai todi ndinatudi to nditinandi tipoop di muņņ ne, pale tisob timatmaat. ⁶Tovenen taņņiz tiina pale ivot irau taan isob to Isip. Muņņ ve inim, taņņiz tovene ivot izi ndug tiam pa eta sone. Ve muri paam, irau ivot muul maau. ⁷Eemoghon yes Israela toman ngai todi tisob pale tineep pooi. Iņgavuun eta irau isuul maau. Leso yom uwatag kat ughaze you Yoova naghām ngar raraate pa yam Isipa ve tamtoghon tiou Israel maau. Naghām ngar ite ite payam.”^t

⁸Ve Mose isaav muul ighaze: “O kinik, mbep tonene ighaze ivot, uraata tiom tonene pale tisob tinim tiput aghedi payou, ve titaņ roran ghou tighaze: ‘Yamņa tamtoghon tisob to titaghoņ ghom, apul ghei ve aghau ala!’ Muri pa mbep tonenen, you pale napul ghom.” Mose ate yabyab kat. Tovenen ipul kinik ineep, ve ivot ila pumuri.

⁹Ghoro Yoova isaav pani ighaze: “Kinik to Isip irau ilooŋ aliŋam maau. Ve nene poia. Pasa, ighur soso payou, lesu naghama mbab gharatooŋadi naol izi Isip.”^u

¹⁰Tovenen Mose yesuru Aron tigham mbab gharatooŋadi naol ila kinik to Isip mata. Mbab tonowen ite kat. Eemoghon Yoova igham kinik ngar toni iyaryaŋ le iyaryaŋ kat. Tauto iyok pa yes Israela tipul taan toni ve tila ne maau.

Tutuŋ to Pasova

12 ¹Mose yesuru Aron tinepneep izi taan to Isip, ve Yoova isaav padi ighaze: ²“Kaiyo tonene, nene ilib pa kaiyo tisob. Pasa, kaiyo tonene, you pale naghama mbab paghu ivot payam.”^v Tovenen yam Israela irau aghur kaiyo tonene imuŋ pa ndaman tiam tisob. ³Yamru ala alup Israela tisob, ve asaav padi tovene: Mboŋ inim saangul to kaiyo tonene, ghoro nditamoot tisob irau timbit sipsip ma mekmek papaghu eŋaŋa irau ruum todi todi. ⁴Yam eŋaŋa irau angabiiz poian sipsip to ambit di: Tamtoghon piiz kat to irau tighani le tipasobi? Ighaze ruum eta tamtoghona naol maau, ve tigham ngar tighaze eŋgendi irau tighan suvun sipsip todi maau, yes irau tisaav pa nditadi to tineep tigharau di tinim, ve yesŋa tilup di ve tighanghan. Leso tipasobi. ⁵Yam irau aghita sipsip ma mekmek nditamoot to popoiadi moghon, ve ndaman todi eŋaŋa, ghoro ambit di.”^w

⁶⁻⁷Angin poian di le mboŋ inim saangul ve paŋ (14) to kaiyo tonene, ve rabrab izi, sawa to taghita sapirin ghiit, ghoro arab di. Ve ruum sine to aneep ila, agham mbab to arab di ne siŋidi, ve apeli ila ataam avo dige ru, ve izala pa sala paam. Leso inim ghilalooŋ payam ighaze yam tamtoghon to Yoova to alup gham pa ghanghaniŋ ila ruum tonanan lolo.

⁸“Mboŋ ee moghon tonenen, amoz sipsip tonanan izala yab, ve aghani toman mberet to le yis maau, ve ndoor papaii.”^x

⁹Sipsip minda to ighaze mbiti ma nazuuŋ, yam aghani malep. Aghan moziŋ moghon. Tovenen amoz sipsip anoŋa dodoli, toman daba, ŋgoi, ve kodkoda izala yab, ve aghan suvuni. ¹⁰Apul pida ineep inim ngar malep. Ighaze aghan le apomim isuŋ, ve pida ineep, aghuri ila yab ighan suvuni le isob, ghoro ndugizau.

¹¹Ve agharaat taumim pataghaŋ pa laghoŋ. Apool nonogiiŋa tiam ila tuku, aghur duduŋa to aghemim, ve akis titi tiam paam. Ghoro mbolemim izi ve aghanghan. Eemoghon aghan rikia. Aniiŋ tonanan,

u 11:9 Igham 7:3 **v 12:2** Mbab paghu to ivot pa sawa to Pasova, nene vene: Maaron igham mulin yes Israela, ve ilup di tinim ee moghon, ve igham di tinim lupuuŋ toni. Muri, ye isavia tutuuŋ toni padi paam. Tovenen sawa tonenen ve ila, nepooŋ todi inimale muŋ maau. Nepooŋ todi ite. **w 12:5** 1Pe 1:19 **x 12:8** 1Kor 5:8

nene aniiŋ to Pasova. Yam irau aghani, leso matamim iŋgal sawa to you Yoova nasalib payam, ve nala narab yes Isipa ndinatudi timatmaat.

¹²“Mboŋ tonenen, you pale nalaagh irau taan isob to Isip, ve narab ndinatudi aidaba, toman iŋgai todi ndinatudi to nditinandi tipoop di muuŋ, le tisob timatmaat. Leso naghur atia pa maaron kaaromŋa todi, ve natatan tapiridi. Pasa, you Yoova nanepneep. ¹³Tovenen siŋ to apeli ila ataam to ruum tiam avodi dige, nene pale ipatoon ruum tiam payou. Sawa to nalaagh pa narab yes Isipa, ve naghita siŋ tonanan, you pale nasalib payam, ve navool pa ruum ite. Leso nawaghamun gham sob.

¹⁴“Sawa tonene, sawa tiina ve sawa patabuaŋ. Tovenen yam Israela yamŋa papaghu tiam to muri pale tivot, irau apakur sawa tonene, ve matamim iŋgali irau sawa isob. You naghur tutuuŋ payam tovene: Ndaman isob, ighaze sawa tonene ivot, yam irau agham lupuuŋ tiina, ve asuŋ payou toman lolomim poia. Tutuuŋ tonene pale iyaryaŋ tovene itaghoni taghoni gha ila.

Lupuuŋ to mberet to le yis maau

¹⁵“Sawa to lupuuŋ tiina tonene, ighaze lolomim pa aghan mberet, ghoru aghan mberet to tighur yis ila maau ne. Yam pale aghan mberet tovene moghon irau mboŋ liim ve ru. Tovenen sawa to lupuuŋ tiina tonene ighaze imundig, yam agham yis^y isob to ineep ila ruum tiam lolodi, ve apiyaava ilale. Apul rita ineep malep. Mboŋ liim ve ru to lupuuŋ tiina tonene, ighaze tamtoghon tiam eta izoor saveeŋ ve ighan mberet to titoora toman yis, yam azuruni ighau ila sagan pa yam Israela. Ilup toman gham muul malep.^z

¹⁶Sawa to lupuuŋ tiina tonene imundig, ve sawa inim liim ve ru to isob pani, yam Israela asob irau alup gham ve agham suŋuuŋ tiina. Sawa ru tonenen, nene umbom patabuaŋ. Agham uraat eta malep. Eemoghon aniiŋ, ghoru yam irau agharaata.

¹⁷“Lupuuŋ tiina to mberet to le yis maau ne, ndaman isob, yam irau matamim iŋgali ve ataghoni. Pasa, sawa tonene kat, to you naghama gham alaagh ila rouŋ rouŋ animale yes ndaaba, ve apul taan to yes Isipa. Tauto naghur tutuuŋ ariana pa yam ve papaghu tiam to muri pale tivot ne tovene: Ndaman to naol ne, yam irau matamim iŋgal sawa tonene, ve alup gham ve agham suŋuuŋ tiina payou. Tutuuŋ tonene pale ineep tovene itaghoni taghoni gha ila.^a

y **12:15** Yes Yuda tigharaat mberet tovene: Tigham palawa ris, ve titoora toman ya, ghoru tipuli ineep sawa mala ris, leso iŋaraaŋ. Palawa iŋaraana tonenen, nene igham palawa isar animale yis. Ila saveeŋ English tiwaata tighaze ‘leven.’ Ghoru tigham palawa iŋaraana tonenen, ve titoora toman palawa paghu, leso ighami isar. Ghoru tigham palawa tonenen iŋgali ris, ve tighuri ila sagan, leso iŋaraaŋ ve isanja pa sawa to tigharaat palawa paghu muul. z **12:15** 1Kor 5:6-8 a **12:17** Igham 23:15, 34:18

¹⁸⁻¹⁹“Tovenen ndaman tisob, kaiyo to ivot muuŋ, mboŋi inim saangul ve paan, ve rabrab toni, nene sawa to lupuuŋ tiina tonene imundig. Ve ila isob pa rabrab to mboŋi inim tamoot ee ve eez (21). Mboŋi liim ve ru tonenen, ighaze aghan mberet, ghoru aghan mberet to tighur yis ila maau. Tovenen sawa tonenen, yis eta ineep ruum tiam lolodi malep. Ighaze taumim eta, ma loom eta to ineep ila lolomim izoor saveeŋ ve ighan mberet to titooru toman yis ila sawa tonenen lolo, azuruni ighau ila saguan pa yam Israela. Ilup toman gham muul malep. ²⁰Tovenen mboŋi liim ve ru tonenen, ndug sine to yam aneep pani, aghan mbep eta to yis ineep ila malep. Agharaat mberet to le yis maau ne moghon.”

Mose ipaesia tutuuŋ pida to Pasova pa yes Israela

²¹Yoova isavsav toman Mose le isob, ghoru Mose ila ve ilup ndolman tisob to Israel, ve isaav padi ighaze: “Ala rikia moghon, ve apas lemim sipsip papaghu irau ruum tiam tiam, ve arab di. Leso agharaat aniiŋ to Pasova. ²²Sipsip tonanan siŋidi, awato ila oon, ve agham ai ‘isop’ boga, ve azeeva ila siŋ tonanan. Ghoru apeli ila ataam tiam avodi dige. Ila dige ru, ve izala pa sala paam. Tiam eta ivot ila pumuri malep. Yam asob aneep ila ruum tiam tiam lolodi le ndugizau. ²³Sawa to Yoova izi inim, ve ilaagh pa irab yes Isipa ndinatudi ve mbep todi, ighaze ighita siŋ tonanan ineep ataam tiam avodi dige, ye pale isalib payam, ve ila ivool ruum ite. Irau ipul aŋela to rabuuŋ tamtoŋhon iloŋŋ ilat ruum tiam ve irab gham maau.^b

²⁴“Tutuuŋ to aazne nasavia di payam ne, nene arianaŋadi. Pale tinepneep tovene irau sawa isob. Tovenen yamŋa papaghu tiam to muri pale tivot ne matamim kisin di, ve ataghon katin di itaghoŋi taghoŋi gha ila. ²⁵Sawa to ala avot taan to Yoova imbua saveeŋ pani ighaze igham payam, matamim iŋgal lupuuŋ tiina to Pasova, ve ataghon katin ŋgara izi tonowe. Apuli malep. ²⁶Ve sawa to ndinatumim tighason gham pa lupuuŋ tonene pughu, ghoru apaes padi tovene. ²⁷Aghaze: ‘Iit tarab mbep tonene inim watoŋrau pa Yoova. Leso tapaiti, ve mataad iŋgal sawa to Pasova to Yoova isalib pa ruum toit izi Isip, ve ipul ghiit taneep, ve ila irab yes Isipa ndinatudi.’ ”

Yes Israela tilooŋ saveeŋ tonene, ve tiput aghedi ve tipait Yoova iza. ²⁸Ghoru tila ve titaghoŋ katin tutuuŋ tisob to Yoova isavia di pa Mose yesuru Aron.

Pataŋani inim saangul: Maaron irab Isipa ndinatudi aidaba tisob timatmaat

²⁹Yes tineep le mboŋi anoŋa, ghoru Yoova izi inim, ve irab yes Isipa ndinatudi aidaba tisob timatmaat. Ipul eta ineep maau. Kinik to igham

b 12:23 Hib 11:28

pooz pa taan Isip ne natu aidaba, ve ila ila le yes to tineep ila ruum to yabyabuŋ lolo ne ndinatudi aidaba paam, tisob timatmaat. Ve Isipa ŋgai todi paam. Ye irab ndinatudi to nditinandi tipoop di muuŋ ne, le tisob timatmaat. ³⁰Tovenen mboŋ tonenen, kinik yesŋa uraata toni ve ival tiina to Isip, timundig le tighita ndinatudi timatmaat. Ghoru tanjiiz tiina imundig irau ruum ruum to yes Isipa. Pasa, mateŋ irau ruum tisob.

Yes Isipa tizurun yes Israela tila

³¹⁻³²Mboŋ tonenen, kinik imbaaŋ ila pa Mose yesuru Aron tinim, ve isaav padi ighaze: “Rikia moghon ve amundig apul ndug tiou, ve aghau ala! Ve yamru moghon maau. Ival tiina to Israel paam. Yam asob ayou sipsip, mekmek, ve makau tiam, ve ala agham sunjuuŋ pa Yoova itaghon ghasoniŋ tiam. Apul tamtoghon tiou, ve aghau ala! Ve aghason Maaron tiam pa igham poian ghau.”

³³Yes Isipa tipasul yes Israela tighaze tipul ndug todi rikia moghon. Pasa, tigham ŋgar tovene: “Ighaze yes Israela tineep toman ghiit, nene pale tasob tamatmaat.” ³⁴Ghoru yes Israela tigham oon todi to palawa ineep ilooŋ ila, ve tindun di pa uli, leso timbaad di ila avaradi. Palawa tonowen, titoora toman yis sone. ³⁵Ve titaghon Mose aliŋa ve tighason yes Isipa pa ledi mbaliŋ naol naol to tigharaat di pa gol ve silva, ve tighason di pa ledi nonogiŋa paam.^c

³⁶Yoova igham yes Isipa lolodi poia pa yes Israela. Tovenen mbeb tisob to yes Israela tighason di pani, yes Isipa tigham padi moghon. Tauto yes Israela tikarasim di kat.

Yes Israela tipul Isip

³⁷Tovenen yes Israela timundig ve tipul ndug Ramses, ve tila tivot ndug eez iza Sukot. Yes ival le ival kat. Nditamoot todi to tirau malmal, yes irau 600,000 ma venen. Ve yes ndiliva toman ndinatudi, tinin di maau. ³⁸Yes Israela ledi sipsip, mekmek, ve makau katindi kat. Tauto tiyou di tisob, ve tilaagh toman di. Ve ndug pida to Israela maau ne timundig tila toman di paam. ³⁹Tilaagh tila le tivot ndug eez, ghoru atedi izi. Tineep tonowe, ve tigham palawa todi to tigharaata izi Isip, ve timozi inim adi taman. Palawa tonowen, titoora toman yis maau. Pasa, sawa to timundig, yes Isipa tipasul di. Tauto ledi sawa eta pa tigharaat poian taman todi maau.

⁴⁰Yes Israela tineep izi Isip irau ndaman 430, ghoru tipul Isip ve tila.^d
⁴¹Tovenen sawa kat to ndaman 430 tonenen isob, ghoru yes Israela tisob timundig tipul Isip ve tila. Tilaagh ila rouŋ todi todi tinimale yes ndaaba.^e

c 12:35 Mbnp 15:14; Igham 3:21+ **d 12:40** Mbnp 15:13; Ga 3:17 **e 12:41** Yes Israela tinim ndaaba (o ami) to Maaron. Tovenen yes irau tiwalaghlaagh maau. Yes irau tilaagh denja itaghon rouŋ todi todi. Ughita Namba 10:11-33.

⁴²Mborj tonowen, Yoova mata iŋgal yes Israela, ve igham di tipul Isip itaghon saveeŋ mbuaaŋ toni. Tauto ndaman isob, sawa to Pasova ighaze ivot, yes Israela tisob irau tipamaat ve matadi iŋgal mbeb to ivot pa mborj tonowen, ve tipait Yoova. Ŋgar tonene pale ineeŋ tovene itaghoŋi taghoŋi gha ila.

Tutuun pida to iŋarua Pasova

⁴³Yoova isaav pa Mose yesuru Aron ighaze: “Nene tutuun pida to iŋarua ghanghaniin to Pasova.

Ndug ndug to ighaze tinim tineep ila yam Israela lolomim, todi eta irau ighan sorokin aniiŋ to Pasova maau. ⁴⁴⁻⁴⁵Ve ighaze agham tamtoŋhon to ndug ite inim lemim uraata, nene ye paam irau ighan sorokin aniiŋ to Pasova maau. Eemoghoŋ ighaze aghol tamtoŋhon to ndug eta inim lemim mbesooŋa ve aziri, nene ye irau ighan.

⁴⁶Ighaze alup gham pa ghanghaniin to Pasova ila ruum eta lolo, yam aghan suvun sipsip tiam tonanan. Agham minda rita ivot ila pumuri malep. Ve tua tovene paam, aŋgoor eta malep.^f

⁴⁷Tamtoŋhon to Israel tisob irau matadi iŋgalŋgal lupuuŋ tiina to Pasova ve titaghoŋ katin ŋgara.

⁴⁸“Ighaze ŋgeu eta to ndug ite ilat ineeŋ toman gham, ve ighaze ilup toman gham pa ghanghaniin to Pasova, yam irau aziri toman ndita nditamoot tisob to tineep ila ruum toni. Leso aghita di aghaze yes raratedi tinimale yam to Israela kat. Le isob, ghoroy yes irau tighan aniiŋ to Pasova. Eemoghoŋ sei to ighaze tiziri maau, nene irau ighan aniiŋ to Pasova maau. ⁴⁹Tutuun tonene pale igham pooz pa yam asob. Yes to siŋ kat to Israel, ve yes loomba to tineep ila lolomim ne paam.”

⁵⁰Tovenen yes Israela tisob titaghoŋ katin tutuun tisob to Yoova isavia pa Mose yesuru Aron. ⁵¹Ve sawa kat tonenen, Yoova igham di tipul Isip. Tilaagh ila rouŋ todi todi, ve tila.

Yes Israela irau tighur ndinatudi aidaba tinim Maaron le

13 ¹Yoova isaav pa Mose muul ighaze: ²“Yam Israela irau aghur ndinatutumim aidaba toman ŋgai tiam ndinatudi to nditinandi tipoop di muuŋ tisob tinim leg.”^g

Lupuuŋ tiina to ghaniin mberet to le yis maau

³Mose isaav pa yes Israela ighaze: “Matamim iŋgal sawa tonene. Muuŋ, yam anim mbesooŋa sorok izi taan Isip. Eemoghoŋ aazne, Yoova ipatoon tapiri tiina, ve ipas gham ila yes Isipa nimadi, ve apul ndug todi wa. Tauto aazne, anim mbesooŋa muul maau. Tovenen ndaman isob,

^f 12:46 Yo 19:36 ^g 13:2 Igham 22:28+, 34:19; Lu 2:23

sawa tonene ighaze ivot, yam aghan mbef eta to yis ineep ila ne malep.

⁴Matamim iŋgal kaiyo Abib^h

tonene. Pasa kaiyo tonene, to yam apul taan to yes Isipa. ⁵⁻⁶Muuj, Yoova imbua saveeŋ toman nditimumim ighaze ye pale igham taan to yes Kanaana, Hita, Amora, Hivia, ve Yebusa inim lemim. Taan tonowen ŋgoreeŋa ve poia pa mbef naol titub pani. Tovenen muri, sawa to Yoova igham gham ala avot tonowe, matamim iŋgal pa ataghon ŋgar tovene: Ndaman to naol ne, ighaze kaiyo Abib ivot, ghoru alup gham ve asuŋ pa Yoova. Mboŋ liim ve ru, yam irau aghan mberet to le yis maau ne moghon. Ve mboŋ inim liim ve ru to lupuuŋ tiina tonenen isob pani, yam alup gham ve agham sunjuuŋ tiina, ve apait Yoova iza toman lolomim poia.ⁱ

⁷Mboŋ liim ve ru tonenen, ighaze aghan mberet, aghan mberet to le yis maau. Tovenen sawa tonenen, yis eta ineep ila yam Israela ndug tiam lolo malep.

⁸“Ighaze sawa to lupuuŋ tiina tonene ivot, yam eŋaeŋa apaesia pughu pa ndinumim aghaze: ‘It tataghon ŋgar tonene, leso mataad iŋgal sawa to Yoova iuul ghiit, ve igham ghiit tapul Isip ve tanim.’

⁹“Lupuuŋ tiina tonene pale inim ghilalooŋ to ineep ila nimamim ve ndamomim, ve ipei mulin ŋgar tiam pa sawa to Yoova ipatooŋ tapiri tiina, ve igham gham apul ndug to yes Isipa ve anim. Leso lolomim imaagh pani sob, ve avomim imbesmbees pa saveeŋ to ye igham pait ne irau sawa isob. ¹⁰Tovenen Yoova ighur tutuuŋ payam tovene: Ndaman to naol ne, ighaze sawa to lupuuŋ tonene ivot, yam alup gham pa sunjuuŋ ve ataghon ŋgar tonene.”

Ataam to yes Israela tighur ndinatudi aidaba tinim Maaron le

¹¹Mose isaav muul ighaze: “Yoova pale igham gham ala avot izi taan Kanaan. Taan tonowen, ye ighaze ipuli inim lemim itaghon saveeŋ mbuaaŋ toni ariana to imbua toman nditimumim. Saveeŋ tonenen iŋarua gham paam. ¹²Sawa to ala aneep izi taan tonowen, yam irau ataghon ŋgar tovene: Ndinatumim aidaba, toman ŋgai tiam ndinatudi to nditinandi tipoop di muuŋ, yam aghur di tisob tinim Yoova le. Tovenen ŋgai tiam ndinatudi nditamoot to tipoop di muuŋ, arab di tisob timatmaat tinim watoonrau pa Yoova. ¹³Eemoghon esele ndinatudi nditamoot to tipoop di muuŋ, arab di tinim watoonrau pa Yoova malep. Arabolin di pa sipsip, ve arab sipsip tonenen tinim watoonrau. Ve ighaze arabolin di pa sipsip maau, ghoru aŋgoor luadi ve timaat. Ve ndinumim aidaba nditamoot tovene paam. Arabolin

h 13:4 Kaiyo Abib ivotvot pa Mas ve Epril. Nene inimale kaiyo Tabogar.

i 13:5-6 Igham 34:18

di tisob pa sipsip ma mbeb pida, ve agham mbeb tonenen pa Maaron tinim watoonrau.^j

¹⁴“Muri, ighaze ndinatumim tighason gham pa ngar tonene pughu, ghoru apaes padi aghaze: ‘Muun, iit tanim mbesoonja sorok izi Isip. Eemoghon Yoova ipatoon tapiri tiina, ve igham ghiit tapul ndug tonowen. ¹⁵Sawa tonenen, kinik to yes Isipa, ngar toni iyaryaan kat ighaze tapul ndug toni malep. Eemoghon Yoova irab yes Isipa ndinatudi aidaba toman ngai todi ndinatudi to nditinandi tipoop di muun, le tisob timatmaat. Tauto aazne, iit tarab ngai toit ndinatu nditamoot to tipoop di muun ne, tisob timatmaat tinim watoonrau pa Yoova. Ve ndinatuud aidaba tinim Yoova le paam. Eemoghon tarab di tinim watoonrau maau. Tarabolin di pa sipsip ma mbeb pida, ve tagham mbeb tonenen pa Yoova tinim watoonrau. ¹⁶Ngar tonene, nene inim ghilaloon to ineep ila nimaad ve ndamood ve ipei mulin ngar toit pa sawa to Yoova ipatoon tapiri tiina, ve igham ghiit tapul ndug to yes Isipa ve tanim. Leso lolood imaagh pani sob, ve mataad ingali irau sawa isob.’”

Maaron ipatoon ataam pa yes Israela

¹⁷Sawa to kinik to Isip ipul yes Israela tila, Yoova imuun ve ipatoon di pa ataam. Eemoghon ye igham di titaghon ataam tuku to itaghon taan to yes Pilistia ne maau. Pasa, igham ngar tovene: “Ighaze yes Israela titaghon ataam tuku tonowen, ve tivot to koiadi rikia ve malmal imundig, nene pale titoor ngar todi, ve tighau timuul tila pa Isip.” ¹⁸⁻¹⁹Tauto ipamuul di tilaagh titaghon ataam mala to itaghon ndug balim ve ila ivot Te Kaviaana.

Sawa to yes Israela tipul Isip, tigharaat di pataghaan pa malmal ve tilaagh. Ve Mose igham Yosep tua ve tilaagh tomani. Pasa muun kat, Yosep isaav pa yes Israela nditimbudi tovene: “Muri, Maaron pale igham mulin gham ve apul ndug to yes Isipa. Sawa tonenen ighaze ivot, ghoru agham tuag ve alaagh tomani. Leso atavia izi Kanaan.” Ve yes Israela timbua saveen ariana toman Yosep tighaze yes pale titaghon ngar toni tonenen. Tauto Mose mata ingal saveen mbuaan todi tonowen, ve itaghoni.^k

²⁰Yes Israela tipul ndug Sukot, ve tila tivot ndug balim dige, ghoru atedi izi ndug eez, iza Etam.

²¹Ndag to naol ne, Yoova ineep ila yaghur tae lolo ve imuun padi, lesu ipatoon di pa ataam. Yaghur tae tonowen mala. Iza ve izi. Ve mboj to naol ne, ye inim yab yama to iyaryaar iza ve isul, lesu ipatoon di pa ataam. Tovenen yes irau tilaagh pa mboj ve ndag. ²²Yaghur tae ve yab yama tonowen tipulpul di maau. Timuunmuun padi pa mboj ve ndag.

j 13:13 Nam 18:15-18; Lu 2:22-23 k 13:18-19 Mbnp 50:25

Yes Isipa tigham taghon yes Israela

14 ¹Ghoro Yoova isaav pa Mose ighaze: ²“Usaav pa yes Israela titoor di, ve timuul tila tivot naari to ndug Pi Airo. Ndug tonowen ineep ndug Migdol dige to ineep ila pa te, ve igharau ndug Bal Zepon. Tila tivot, ghoro tigharaat inadi izi tonowe ve atedi izi. ³Leso kinik to Isip igham ngar ighaze yam asosor pa ataam, ve awalaghlaagh izi ndug balim, ve lemim ataam eta pa aghau maau. ⁴You pale naghama ngar toni iyaryaang muul, lesa itaghon gham. Sawa to inim peria tiam, you pale napatoon tapirig pani, ve natatani toman ndaaba toni le tisob tilaledi. Leso naghama izag ivot inim tiina, ve yes Isipa tighilaal tighaze: You Yoova nanepneep.” Tovenen yes Israela titaghon saveen to Yoova isavia padi.

⁵Sawa to tipaes pa kinik to Isip tighaze yes Israela tighau tila wa, yesna uraata toni titoor ngar todi muul, ve tighaze: “Wai, iit tagham ngar to borounga! Tapul yes Israela tila pasa? Aazne, sei masin pale tinim mbesoonga pait?”

⁶Tovenen kinik isaav, ve tigharaat hos toman karis toni to malmal. Ve iyou ndaaba toni, lesa tila tomani. ⁷Ve ighama karis arianaadi to malmal toman hos irau 600, ve ighama karis toman hos pida paam to yes Isipa, ve yes ndiran to malmal to tindandaloov karis. Ghoro toman ndaaba toni tisob timundig ve titaghon yes Israela tila. ⁸Sawa to yes Israela tipul Isip, lolodi poia kat, ve tighama ngar tighaze Maaron todi ilib pa yes Isipa wa. Tovenen tilaagh toman pakuruu. Eemoghon Yoova ighama kinik to Isip ngar toni iyaryaang muul. Tauto iyou ndaaba toni, ve titaghon yes Israela tila. ⁹Tovenen yes ndaaba to Isip tighama karis toman hos, ve ndiran pida to malmal, ve titaghon yes Israela tila le tivot todi igharau ndug to yes Israela atedi izi pani. Ineep izi naari to ndug Pi Airo ve ndug Bal Zepon.

¹⁰Yes Israela matadi ila le tighita kinik to Isip yesna ndaaba toni tijaaru di tinim. Tovenen matughezaang tiina ighama di, ve titaang roran Yoova pa iuul di. ¹¹Ve tijaang pa Mose tighaze: “Ughama ghei nipul Isip pasa? Vena, naal to yes Isipa irau ghei maau, tauto ughereb ghei ninim ndug balim tonene, lesa nimatmaat izi sualen?”

¹²Igar tonene to nimatughez pani. Tauto sawa to tanepneep izi Isip, yei nisaav payom nighaze: “Tambanga. Upul ghei nineep, ve nighama uraat pa yes Isipa.” Eemoghon yom uloong ghei maau. Inimale nineep izi Isip ve nimbembes padi, tone poia. Eemoghon maau. Aazne, pale nisob nimatmaat izi ndug balim tonene.”

¹³Eemoghon Mose irab motin saveen todi ighaze: “Amatughez malep. Ayoon ariana! Aazne, yam pale aghita katin ulaang to Yoova. Pasa, ye tau

pale ivool tiam, ve igham mulin gham. Yes Isipa to aazne matamim ila padi we, muri pale aghita di muul maau. ¹⁴Tovenen atemim izi ve aghur matamim moghon. Pasa, Yoova tau pale iparab payam.”

¹⁵Ghoro Yoova isaav pa Mose ighaze: “Pughu vena to yom utañ roran ghou ne? Usaav pa yes Israela timundig tila. ¹⁶Ghoro uit titi tiom iza, ve upatooña inarua te. Leso te ivalagi. Pida ila pa ñas, ve pida ila pa waan, ve ighur ataam pa yes Israela, ve tilaagh ila taan mamaasa, ve tivool tila pa dige ite. ¹⁷⁻¹⁸You pale naghām yes Isipa ñgar todi iyaryaañ ve titaghon gham. Ghoro napatooñ tapirig pa kinik to Isip toman ndaaba toni to tilaagh taan, ve yes to tilaan pa hos ve karis, ve natatan di le tisob kat. Leso naghām izag ivot inim tiina, ve yes Isipa tighilaal tighaze you Yoova nanepneep.”

¹⁹Ghoro añela to Maaron to imuñmuuñ pa yes Israela, ipul ina to mungaañ, ve imuul ila pa muridi. Ve yaghur tae mala to imuñmuuñ padi ne paam, imuul ila iyoon izi muridi, ²⁰ve inee bodbodaañ pa yes Israela ve yes Isipa. Mboñ izi, ve yaghur tae tonowen ndorooma tiina ila pa yes Isipa, ve ghazooña ila pa yes Israela. Tovenen mboñ tonenen, yes Isipa irau tila tigharau yes Israela maau.

Mbeb gharatooña to Maaron ighami izi Te Kaviaaña

²¹⁻²²Ghoro Mose iit nima iza, ve ipatooña ila pa te, ve Yoova igham yaghur tiina ilaagh pa taan dige to ila pa ndag iza ve inim. Yaghur ilaagh pa mboñ mboñ le ndugizau, ve iviviir te le ivalagi inim ru. Pida ila pa waan, pida ila pa ñas, ve taan mamaasa ivot. Te dige ru tonowen tiyoon denja tinimale didiij, ve yes Israela tilaagh ila bodbodaañ. Tovenen tilaagh titaghon taan mamaasa tonowen, ve tivool tila pa dige ite.^m

²³Ghoro ndaaba tisob to Isip toman hos ve karis todi titaghon di tinim tivot izi bodbodaañ.

²⁴Ndag iza ris, ve Yoova inee ila yaghur tae mala ve yab yama lolo, ve mata izi pa yes Isipa, ve ighamun ñgar todi le tiwaghamgham. ²⁵Ve igham hos toman karis todi aghedi tiptipia, lesa tizuar pa landooñ. Ve igham karis aghedi ipaspas ve titaptap tizizi. Tovenen yes Isipa tisaav tighaze: “Ee-e, tala malep! Tamuul! Nene Yoova tau, to ivool to yes Israela ve iparab toman ghiit ne!”

²⁶Ghoro Yoova isaav pa Mose ighaze: “Uit nimam iza, ve upatooña ila pa te. Leso te ila ivool muul, ve itatab yes ndaaba to Isip tonowen toman karis ve hos todi, le tisob timatmaat.” ²⁷⁻²⁸Tovenen ndag ipul te ve iza ris, ghoro Mose iit nima iza muul, ve ipatooña ila pa te. Ghoro te ipol inim ilupi muul. Yes Isipa to titaghon yes Israela, titoova pa tighau timuul tila. Eemoghon tiraua maau. Te itatab ndaaba to kinik toman karis ve hos

todi, le tisob tilaledi. Eta ineeq maau. Ataam tonene, to Yoova ipandalin ndaaba tisob to Isip tizila te lolo ve timatmaat. ²⁹Eemoghon yes Israela tilaagh ila taan mamaasa to ineeq bodbodaan to te, le tivool tila pa dige ite. Te dige ru tonowen tiyoon kat tinimale didiin. Pida ila pa waan ve pida ila pa nas.

³⁰Nene ataam to Yoova igham mulin yes Israela ila yes Isipa nimadi. Yes Isipa to timatmaat, yes Israela tighita patudi tiwaghengheen taghon naari. ³¹Onoon kat, Yoova ipatoon tapiri tiina pa yes Isipa, ve yes Israela tighita pa matadi. Tauto timatughez pa Yoova, ve tighur ila toni. Ve tighur ila to mbesoonja toni Mose paam.

Yes Israela tipait Maaron iza ila mbouj

15 ¹Ghoro Mose yesja Israela timbou mbouj tonene pa tipait Yoova. "You pale nambou ve napait Yoova.

Ye iza tiina le tiina kat.

Ye iparab ariana le ilib pa koia.

Ye ipiyaav hos todi toman yes to tilaan padi ne tizila te lolo ve tilaledi.ⁿ

²You naghhamgham tapirig ila to Yoova. Tovenen nambou mbouj pa napaiti.

You irau nalaleg. Eemoghon ye igham mulin ghou.

Ye moghon to Maaron tiou.

Tovenen naghaze napait iza pa poia toni.

Muun, taman imbesmbees pani.

Ve you paam napait iza izala le izala kat.^o

³Tiina tiou, ye ngeu ariana to malmal.

Iza Yoova. Ye inepneep irau sawa isob.^p

⁴Ye ipiyaav kinik to Isip ndaaba toni toman karis todi tisob tizila te lolo ve tilaledi.

Ve yes daba to tiraua kat pa malmal, yes paam tighun te ve tisob timatmaat izi Te Kaviana.

⁵Te itatab di ve tindal tizila tinimale yaam.

Tizila kat to mazovan bibiliina lolo we.

⁶O Yoova, nimam waan, nene tapiri tiina le tiina kat.

Nimam waan irab mbirisan koiamja le tilaledi.

⁷Yom izam tiina kat. Ulib pa mbeb tisob.

Koiamņa to timundig tighaze tizoor ghom, yom ureu mbirisan di.
Upatoon mbalmbali tiom padi, ve iwaghamun di inimale yab ighan
kikiliin gorgori.

⁸ Yom atem yabyab padi kat. Tauto ugham yaghur tiina imundig ve
ivalag te. Pida ila paņas, ve pida ila pa waan.
Dige ru tonowen tingud tiza ve tiyoon kat tinimale didiin.
Te to mazovan iyoon le iyaryaan.

⁹ Koiamai tigham tinidi tighaze:
'Yei pale nigham taghon yes Israela le nikis di.
Ghoro niyou mburuguun todi tisob, ve nirei di irau ghei.
Sa pataņani to nighaze nigham padi, nene pale nighami moghon.
Tovenen yei pale nipas buza tiei, ve nipatoon tapirimai padi, ve
nireu mbirisan di.'

¹⁰ Eemoghon Yoova, yom uvib avuvum inim yaghur ve iviviir te.
Tauto itatab di le tisob tindal tizila mazovan lolo rikia moghon
tinimale yaam to pataņani le pataņani kat.

¹¹ Yoova, sa maaron to irau ghom? Eta maau.
Yom paghunam ve patabuan kat.
Ve ugham uraat tintina toman mbeg gharatoonadi.
Tauto tamtoghon timatughez payom, ve tipait izam.^q

¹² Yom urab koiamņa pa nimam waan, ve ugham taan avo ikaak, ve
itoo di tisob.

¹³ Yoova, yom lolom ineep tunja ila to tamtoghon tiom, ve uluul di
itaghon saveej mbuaņ tiom.
Tauto uvol todi, ve ugham mulin di pa pataņani todi.
Ve yom umuun ve upatoon ataam padi.
Tovenen yom pale ungin di pa tapirim ve ugham pooz padi, le tila
tivot izi inam patabuan to nepoon.

¹⁴ Yes ndug ndug tiloon uraat tiom varu, le ruņadi iza pani ve lolodi
imbumbu.
Matughezaņ tiina igham yes Pilistia ve tisaņeeņ.

¹⁵ Ve daba tisob to Edom paam, matughezaņ tiina igham di.
Yes pooza to Moap tiloon varum, le tinidi irur, ve lolodi imbumbu.
Ve yes Kanaana tapiridi isob kat ve tinidi imatmaat.

¹⁶ O Yoova, yes tiwatag: Tapirim, nene tiina kat.

Tauto matughezaan̄ tiina igham di, ve lolodi imbumbu.
 Yom taum ugham mulin yei Israela ve ninim lem kat.
 Tovenen ndug ndug tineep moghon tinimale yaam,
 ve timbatut ghei, ve nimbut naghodi ve nila nigham taan tiei.
 Irau tigham mbep eta payei maau.

17 O Yoova, yom ugham ghei ninim nineep pooi izi lolooz tiom.^r

Lolooz tonene, nene inam patabuan̄ to nepoon̄.

Pasa, yom upayoon rumai tiom izala.^s

18 Yoova, ye kinik tiina kat.

Ye pale igham pooz itaghoni taghoni gha ila.”

Mbouŋ to Miriam

19 Tovenen Yoova ivalag Te Kavianaŋa, ve pida ila pa ŋas ve pida ila pa waan, ve yes Israela titaghon taan mamaasa to ineep bodbodaan̄, ve tivool tila pa dige ite. Eemoghon sawa to ndaaba to kinik tigham hos ve karis todi, ve titaghon di, Yoova igham te ila ivool muul, ve itatab di.

20 Aron livu Miriam, ye propet liva eez. Ye igham kakaap toni ve imuun̄, ve ndiliva tisob to Israel anadi tigham kakaap todi ve titaghoni, ve yesŋa tigham narogho. 21 Ve Miriam iit mbouŋ tonene padi ighaze:

“Ambou ve apait Yoova.

Ye iza tiina le tiina kat.

Ye iparab arianaŋa le ilib pa koia.

Hos todi toman yes to tilaan padi, ye ipandalin di tizila te lolo ve tilaledi.”

Ya papaii

22 Muri ghoru, Mose isaav pa yes Israela, ve timundig tilaagh muul. Tipul naari to Te Kavianaŋa, ve tilaagh tiloon̄ tila pa ndug balim to tiwaata tighaze ‘Sur.’ Tilaagh izi tonowe irau mboŋ tol, eemoghon tindeen̄ ya eta maau. 23 Ghoru tivot ndug kainan̄en eez, iza Mara. Ndug tonowen, ya inepneep. Eemoghon ya tonowen papaii. Tovenen yes Israela irau tighuni maau. Pughu tonene to tiwaat ndug tonowen iza tighaze ‘Mara.’^t

24 Yes Israela timundig ve tiŋoon̄ pa Mose tighaze: “Ai, ŋgarsuamai imamaas kat wa. Pale nighun sa?”

25 Tovenen Mose itaŋ roran Yoova pa ulaan̄, ve Yoova ipatoon̄ ai suruvu eez pani. Mose igham ai tonowen ve ipiyaava izila ya, le ya ipapa muul maau, ve yes irau tighun.

r 15:17 Maaron lolooz toni, nene lolooz Zion to ndug Yerusalem ineep izala.

s 15:17 Mbo 78:54+, 80:8 t 15:23 Saveen̄ ‘mara,’ pughu tovene: ‘papaii.’

Tinepneep tonowe, ve Yoova ighur tutuun pida padi ve ipatooŋ di pa ataam to titaghoni leso tilaagh denja ila mata. Ye igham tovene pa itoov di. Leso ighita: Pale titaghon katin aliŋa, ma maau? ²⁶Ye isaav padi ighaze: “You Yoova, Maaron tiam. Alooŋ aliŋag ve ataghoni, ve agham ŋgar to denja moghon ila matag. Ighaze aghur poian taliŋamim pa tutuun tisob to naghur di, ve ataghon katin di, nene you irau naghur moroghoon samia eta payam inimale naghama pa yes Isipa ne maau. Pasa, you Yoova to nagharaat gham pa moroghoon tiam ve tinimim popoia.”^u

²⁷Ghoro yes Israela tilaagh tila tivot izi ndug Elim. Ndug tonowen, le taan saambu saangul ve ru to ya ivotvot padi. Ve ai det tamoot tol saangul (70) titub tonowe paam. Ai tonowen anoŋadi poia pa ghaniin. Tovenen tigharaat inadi tonowe, ve atedi izi.

Yes Israela pitool di ve tiŋooŋ pa Mose yesuru Aron

16 ¹Muri ghoro, yes Israela timundig ve tipul ndug Elim, ve tilaagh tila tivot ndug balim to iza ‘Siin.’ Ndug tonowen ineep bodbodaan pa Elim ve Sinai. Sawa to tipamundigin laghoon todi izi Isip ve tila tivot izi Siin, yes tilaagh irau kaiyo eez ve mboŋ saangul ve liim wa.

²Tinepneep tonowe, ve ival tiina to Israel tiŋooŋ pa Mose yesuru Aron muul tighaze: ³“Inimale Yoova irab ghei nimaat izi Isip pataghaan, tone poia! Pasa, sawa to nineep tonowe, nepooŋ tiei poia kat. Nindaad ghei ninepneep, ve nighanghan aniiŋ tiina toman ziga le apomai isuŋ. Vena, yamru aghaze arab ghei nimatmaat pa pitool, tauto aghereb ghei ninim ndug balim tonene?”^v

⁴Tovenen Yoova isaav pa Mose ighaze: “Aazne ve ila, you pale naghama aniiŋ itap sambam ve izilat payam. Mboŋmaagh to naol ne, pale itap sambam ve izilat. Tovenen ighaze yam ala ayou amim, ayou tiina malep. Ayou irau to aghan pa ndag ee moghon. You naghama tovene pa natoov gham. Leso naghita: Pale ataghon aliŋag, ma maau?”^w

⁵Ighaze uraat inim liim ve eez, ghoro ayou tiina ris, irau to aghani pa ndag ru, ve anazi pataghaan ve ineep.”

⁶⁻⁷Tovenen Mose yesuru Aron tisaav pa tamtoghon tisob to Israel tighaze: “Yei nighama sa, to atemim yabyab ve ayou avomim payei? Yei nisaav to tanim ne? Yam aŋooŋ payei, eemoghon Yoova ilooŋ ŋoŋaan tiam wa. Tovenen rabrab izi, ghoro ye pale ighama ŋgar eta payam. Leso awatag kat aghaze ye tau, to ighama gham apul Isip ve anim sualen. Ve ndugizau, ghoro ipatooŋ tapiri ve poia toni payam, ve aghita pa taumim matamim.”

⁸Ghoro Mose isaav padi muul ighaze: “Yei sei, to aŋooŋ payei? Sawa to ayou avomim payei, yam aŋooŋ payei maau. Aŋooŋ pa Yoova. Ve ŋoŋaan

tiam tonanan, ye ilooŋa wa. Tovenen rabrab izi, ghoru ye tau pale igham amim man pa aghan. Ve mboŋmaagh, ghoru igham amim aniiŋ, lesu aghan ve apomim isuŋ.”

⁹Ghoru Mose isaav pa Aron ighaze: “Ula usaav pa yes Israela tovene: ‘Yoova ilooŋ ŋoŋaŋ tiam wa. Tovenen yam asob anim alup gham ila Yoova nagho.’” ¹⁰Aron isavsaav pa ival tiina to Israel, ve matadi ila pa ndug balim, le tighita Yoova ŋguruba isul ila yaghur tae lolo.

¹¹Ghoru Yoova isaav pa Mose ighaze: ¹²“Ŋoŋaŋ to yes Israela, you naloŋa wa. Tovenen usaav padi: Rabrab ndag izila goronja, ghoru adi aniiŋ ziga izilat. Ve bozo pale aniiŋ izilat, ve tighan le apodi isuŋ. Lesu tiwatag kat tovene: You Yoova, Maaron tiam, nanepneep.”

Yoova ipan yes Israela pa aniiŋ manna ve man

¹³Yes Israela tineep le rabrab izi, ghoru man katindi tivot le ndug to tineep pani ne man moghon. Mboŋ le ndugizau, ve waam izi irau ndug to tineep pani.^x

¹⁴Waam imamaas, ve yes Israela tighita mbep pisosooŋa itatab ndug todi. Ghitoŋa animale iigh anuvu. ¹⁵Tighita mbep tonowen, ve tikankaan pani. Tovenen tiwaghasonin di tighaze: “Nene sa?”

Mose isaav padi ighaze: “Nene aniiŋ to Yoova igham payam pa aghani.”^y

¹⁶Ve ye ighur tutuun payam tovene: Tamtoghon piiz to tilup di ila mbep ee moghon, nene tipavonin uur gegegeu eŋaenja le irau di. Atedi imot pa youŋ aniiŋ malep.

¹⁷Tovenen yes Israela tila, ve tiyou adi aniiŋ. Pida tiyou tiina, ve pida tiyou ris. ¹⁸Eemoghon sawa to titoov aniiŋ ve tighita piiz to tigham di, nene tighita yes tisob adi aniiŋ irau di. Tovenen yes to tiyou tiina, tighan le tipasobi. Avodi alulu rita ineep maau. Ve yes to tiyou rismoghon, tovene paam. Timbool maau. Tighan le apodi isuŋ. Tovenen aniiŋ to tiyou di, nene irau di.^z

¹⁹Mose isaav padi ighaze: “Aniiŋ tonene, aghani le isob. Aghur pida inim ŋaar pa bozo malep.” ²⁰Eemoghon tamtoghon pida tizoor Mose aliŋa, ve tighur aniiŋ pida inim ŋaar. Ŋaar todi tonowen ineep le ndugizau, ve iŋaraŋ. Ve tighita motmoot tineep ila. Mose ighita ŋgar to tighami, le ate yabyab kat.

²¹Tovenen mboŋmaagh to naol ne, yes Israela tilala ve tiyouyou adi aniiŋ irau di. Ve aniiŋ pida to tipuli izi ineep ila taan, sawa to ndag iza inim ve ndug ituntun, nene ireer ve ilale. ²²Ve ndag inim liim ve eez, nene tiyou aniiŋ irau to tighan pa ndag ru. Tovenen ŋginiŋa to yes Israela tila tighita Mose, ve tipaesia mbep tonenen pani. ²³Ye isaav

padi ighaze: “Alooj. Yoova isaav tovene: Bozo, nene umbom patabuanj. Tovenen iit irau ateed izi. Irau tagham uraat eta maau. Tovenen aazne, yam atar taumim pa amim aniij pataghaanj. Ighaze anazi, ma amozi, nene ineep to yam taumim. Aghan pida aazne, ve pida ineep pa bozo.”^a
²⁴Tovenen yes Israela titaghton Mose aliņa, ve tighur aniij todi pida inim ŋaar. Mboj le ndugizau, ghoru tighita ŋaar todi tonowen poia. Injaraan maau, ve motmoota maau.

²⁵Mose isaav padi ighaze: “Aazne, yam irau aghita aniij eta ineep izala taan pogho maau. Pasa, nene umbom patabuanj to Yoova ighuri pait leso ateed izi. Tovenen aghan aniij to noor aghuri inim ŋaar ne. ²⁶Ndag inim eez, ila imuul ndag inim liim ve eez, aniij pale ivotvot tovene, leso ayau amim. Eemoghon ndag inim liim ve ru, nene pale maau. Pasa, nene umbom patabuanj to Yoova ighuri pait, leso ateed izi.”

²⁷Eemoghon tamtoghon pida tizoor Mose aliņa. Ndag inim liim ve ru to umbom patabuanj, yes tila tighaze tiyou adi aniij. Eemoghon matadi ines le maau. ²⁸Tovenen Yoova isaav pa Mose ighaze: “Yam taliŋamim maau? Pale ŋeez o apul ŋgar tiam to zoraanj saveeŋ, ve ataghton katin saveeŋ tiou toman tutuuj tiou? ²⁹Aghita. You naghur umbom patabuanj payam, leso inim lemim sawa to atemim izi. Tovenen wik to naol ne, ndag inim liim ve eez, ghoru you pale naghām amim aniij to irau pa ndag ru pataghaanj. Ve ndag to inim liim ve ru, ghoru yam asob aneep moghon ila inamim. Ala ndug eta malep.” ³⁰Tauto ndag inim liim ve ru, yes Israela titaghton Maaron aliņa tonenen, ve atedi izi.

³¹Aniij to Yoova igham pa yes Israela, tiwaata tighaze ‘manna.’^b Aniij manna, nene pisolooŋa ve ghitooŋa inimale mbep pida uvedi. Ve ghaniija poia kat, inimale palawa to titoora toman bagil suru.

³²Mose isaav pa yes Israela muul ighaze: “Yoova isaav arija pait ighaze tagham uur eez, ve tapavonini pa aniij manna tonene, ve takisi ineep. Leso inim matamuri pa papaghu toit to muri pale tivot. Ighaze tighita, yes pale tiwatag: Sawa to Yoova igham nditimbudi tipul Isip ve tilaghlaagh izi ndug balim, ye ipanpan di pa aniij tovene.”

³³Tovenen Mose isaav pa Aron ighaze: “Ugham uur eta, ve ula upavonini pa aniij manna. Le isob, ghoru ughuri ineep izi Yoova nagho. Leso takisi ineep tovene itagho ni tagho ni gha ila.” ³⁴Tovenen Aron itagho ni saveeŋ tonenen, ve ighur manna pida ila uur, ve tighuri ineep izi Bokis to Saveeŋ Mbuaanj nagho inim matamuri.^c

³⁵⁻³⁶Yes Israela tighanghan aniij manna irau ndaman tamoot ru. Tineep ila manna moghon le irau tila tivot taan Kanaan dige. Ghoru aniij tonenen izi muul maau.

a 16:23 Igham 20:8+ b 16:31 Saveeŋ ‘manna,’ pughu tovene: ‘Nene sa?’

c 16:34 Hib 9:4

Yoova igham ya ivot ila yaam

17 ¹Ghoro ival tiina to Israel tipamundigin laghoonj todi muul. Tipul ndug balim to iza ‘Siin,’ ve tilaghaagh titaghon Yoova aliņa. Tighamgham tovene le tila tivot ndug eez, iza Repidim. Ghoro atedi izi tonowe. Eemoghon ndug tonowen, ya maau.

²Tovenen tiņoonj pa Mose tighaze: “Ughita amai ya ve nighun lak!”

Mose ipamuul aliņadi ighaze: “Pughu vena to atemim yabyab ve aņoonj payou? Yam aghaze atooov Yoova tapiri?”^d

³Eemoghon Israela murun di le tisami kat. Tovenen tiyou avodi pa Mose tighaze: “Pughu vena to ugham ghei nipul Isip, ve ughereb ghei ninim sualen? Ughaze yeiņa ndinatumi ve ŋgai tiei nisob nimatmaat pa ya izi sualen?”

⁴Tovenen Mose itaņ roran Yoova ighaze: “O Yoova, ughita. Paam tamtoghon tonene tirab ghou pa yaam! Pale naghama vena padi?”

⁵⁻⁶Yoova ipamuul Mose aliņa ighaze: “Ugham ndolman pida to yes Israela, ve yamņa amuuņ anim tiou izi lolooz Sinai pughu. Sawa to unum, matam iņgal titi tiom to ulos ya Nil pani, ve ukisi. You pale naneep izala yaam tiina eez pogho, ve nasanaņ gham. Yam anim avot, ghoro ugham titi tiom ve ulos yaam to nanepneep izala pogho. Ya pale ireer ivot pani, leso ival tiina to Israel tighun.” Tovenen Mose igham ndolman pida ve yesņa tila, ve tighita Mose ilos yaam tiina tonowen pa titi toni itaghon Yoova aliņa, ve ya ireer ivot.^e

⁷Ndug tonowen, Mose iwaat iza ighaze ‘Masa’ ve ‘Meriba.’^f

Pasa, sawa to yes Israela tineep tonowe, tiņoonj pani, ve titoov Yoova tighaze: “Ye ineep toman ghiit onoon, ma maau?”^g

Yes Israela tiparab toman yes Amaleka

⁸Yes Israela tinepneep izi ndug Repidim, ve yes Amaleka tinim tighaze tiparab toman di. ⁹Tovenen Mose isaav pa Yosua ighaze: “Uvureer tamtoghon toit pida to tiraua kat pa malmal, ve yamņa agharaat gham. Leso bozo ala aparab toman yes Amaleka. You pale nakis titi to Maaron, ve nazala nayoon izala ndug mbuņa tonowen.”

¹⁰Tovenen Yosua itaghon Mose aliņa, ve igham yes Israela ve tila tiparab toman yes Amaleka. Ve Mose yesuru Aron ve ŋgeu ite, iza Hur, yes tol tizala tiyoon ila ndug mbuņa. ¹¹Sawa to Mose ikaak nima ru iza, yes Israela tilib pa yes Amaleka. Eemoghon sawa to nima ipaspas ve izi, ghoro yes Amaleka anadi tilib pa yes Israela. ¹²Mose ikaak nima iza ila ila le nima ipaspas kat. Tovenen Aron yesuru Hur tighita yaam eez, ve

d 17:2 Nam 20:2+ **e 17:5-6** Yo 4:14; 1Kor 10:4 **f 17:7** Saveeņ ‘Masa’ pughu: ‘tovaņj.’ Ve saveeņ ‘Meriba’ pughu, nene ‘ņoņaañ.’ **g 17:7** Hib 3:8

tighur Mose mbole izala. Ghoro tiit nima ru iza, ve eez ipalot nima waan, ve ite ipalot nima ŋas. Tipaloti tunja ve nima inepneep sala tovene le ndag izila. ¹³Tauto Yosua yesŋa yes Israela tiparab ariana pa buza todi le tilib pa yes Amaleka.

¹⁴Ghoro Yoova isaav pa Mose ighaze: “Ulooj. Muri, you pale napasob yes Amaleka pa taan, le irau tamtoghon matadi iŋgal di muul maau. Aliŋag tonene, umbooda ila rau. Leso yes Israela matadi iŋgali itaghoni taghoni gha ila. Ve usaav ariana pa Yosua, leso mata kisini paam.”

¹⁵Yoova isavsaav le isob, ghoro Mose igharaat artaal eez, ve iwaat iza ighaze: “Yoova, ye pilak tiou.”^h

¹⁶Ve Mose isaav muul ighaze: “Yes Amaleka tigham tinidi ve tipatoon nimadi pa Yoova. Tovenen ye tau pale iparab toman di itaghoni taghoni gha ila.”

Yetro iŋgig rawa Mose

18 ¹Mose rawa Yetro, ye ŋgeu to ighamgham uraat pa watoonrau to yes Midiana. Ye inep izi ndug toni, ve ilooŋ Mose yesŋa tamtoghon toni Israela varudi pa uraat tintina naol to Maaron igham padi, ve ataam to Yoova igham di tipul taan to yes Isipa. ²⁻⁴Tovenen ighaze ila ighita Mose. Sawa tonenen, Mose azuwa Sipora toman ndinatu ru tinepneep toman Yetro. Pasa, Mose ighur di tila tinep tomani muuŋ wa. Tovenen sawa to Yetro imundig ila pa ighita rawa, ye igham di ve yesŋa tila.

Mose ndinatu ru. Eez iza Gersom, ve ite iza Eliezer. Izadi tonene, ledi pughudi. Sawa to natu aidaba izi, Mose isaav ighaze: “Muuŋ, naneep nanim loom to ipul tau ndug toni.” Tovenen iwaat natu olman iza Gersom. Ve sawa to tipoop natudi ite, Mose isaav ighaze: “Maaron to tamaŋ iuul ghou ve ipaghau ghou pa kinik to Isip buza toni mata.” Tauto iwaat natu muria iza Eliezer.^{i j}

⁵Tovenen Yetro igham Mose azuwa toman ndinatu ru, ve yesŋa tila tivot to Mose izi ndug balim to igharau Maaron lolooz toni. Sawa tonenen, yes Israela atedi izi tonowe. ⁶Yetro imbaaŋ ila pa rawa Mose ighaze: “You naghram azuwam toman ndinatum ru ve yeiŋa ninim nivot wa.”

⁷Mose ilooŋ saveeŋ tonene, ve imundig ila ighaze ighita rawa. Ila ivot todi, ve itud pa Yetro inimale pakuruuŋi. Ghoro iyanjin pani, ve

h 17:15 Ndaaba, yes ledi uli bodeeŋa (o pilak) to inim ghilalooŋ padi. Sawa to tila pa malmal, tikis pilak todi tonowen, ve tilaagh tomani. Ighaze tiparab toman koiadi le tilib padi, ve timuul tinim, nene titirtir pilak todi toman tinidi iza, lesu ival tiina tiwatag tighaze tilib pa koiadi wa. **i 18:2-4** Pisis Gersom, pughu tovene: ‘loom to nowe.’ Ve pisis Eliezer, pughu tovene: ‘Maaron iuul.’ **j 18:2-4** Igham 2:21+; Mbaŋ 7:29

tiwaghasonin di pa nepooŋadi, Le isob, ghoru Mose igham di tila pa mbeez toni. ⁸Mose ipaes pani pa patañani naol to Yoova ighur di pa kinik toman ival tiina to Isip, pa iuul yes Israela. Ve ipaes pani paam pa patañani naol to tivot pa yes Israela izi ataam luvuŋa, ve ataam to Yoova igham mulin di pa patañani todi.

⁹Yetro ilooŋ saveeŋ toni, le lolo poia kat pa ŋgar popoia naol to Yoova ighamgham pa yes Israela, ve ataam to igham mulin di ila yes Isipa nimadi. ¹⁰⁻¹¹Tovenen isaav pa Mose ighaze: “You napait Yoova pa poia toni! Muuŋ, sawa to yam aneep ila kinik to Isip toman tamtoghon toni sambadi, yes titatan gham ve tigham samin gham kat. Eemoghon Yoova igham mulin gham ila nimadi wa. Tovenen aazne, you naghilaal kat naghaze: Yoova, ye ilib pa ndimaronŋa tisob!”^k

¹²Ghoru Mose rawa Yetro igham mbeb pida, ve irab di tinim watoonrau pa Maaron. Ye igham dodoli eez ila yab ighan suvuni, ve imoz pida, leso tamtoghon tighan ve yesŋa Maaron tilup di tinim ee moghon. Tovenen Yetro, Mose ve Aron toman ndolman to yes Israela tisob tilup di ila Maaron nagho pa suŋuuŋ toman ghanghaniŋ.^l

Tighur tamtoghon pida leso tiuul Mose pa uraat to ghamuuŋ pooz

¹³Mboŋ ndugizau, ghoru Mose ipamundigin uraat toni to gharatoon patañani to tamtoghon. Ival tiina tiyondyood luvutini, ve tisanajani pa igharaat saveeŋ todi to mboŋmaagh le ila rabrab izi. ¹⁴Yetro ighita uraat to rawa Mose ighamghami pa iuul yes Israela, nene tiina kat. Tovenen isaav pani ighaze: “Wai, yom ughamgham sa pa yes tamtoghon tonene? Pughu vena to engengom ugharaat saveeŋ todi? Ughita. Ival tiina tonene tiyondyood luvutin ghom ve tisanajan mboŋmaagh le ila rabrab izi.”

¹⁵Mose ipamuul aliŋa ighaze: “Tamtoghon tighaze tiwatag ŋgar to Maaron lolo pani. Tauto tinim tiou. ¹⁶Ve ighaze tiwazoran di pa saveeŋ eta, nene tinim tiou, leso naloŋ patañani todi ve nagharaata. Ve you leg uraat to napatoot di pa Maaron aliŋa ve tutuuŋ toni paam.”

¹⁷Tovenen rawa Yetro isaav pani ighaze: “Nene poia. Eemoghon naghita ataam to utaghoni pa uraat tiom, nene patañani. ¹⁸Pasa, uraat tonene, tiina kat. Engengom irau uraua maau. Pale unoknoki tovene le tapirim isob. Ve tamtoghon paam, pale tisanajan tisanajan le sananiŋ isooŋ di.

¹⁹“Ulooŋ. You naghaze nauul ghom pa ŋgar pida, leso uraat tonene iraurau payom. Ataam to naghaze nasavia payom, ighaze utaghoni, nene pale Maaron ineep toman ghom, ve iuul ghom pa uraat tiom. Yo, ighaze tamtoghon pida tiwazoran di pa mbeb eta, yom irau ugham naghodi, ve usavia patañani todi ila to Maaron. Ve sa saveeŋ to ighaze ye isavia payom, ghoru upaesia padi. ²⁰Ve yom irau upatoot di pa Maaron aliŋa ve

tutuun toni. Ve upasalungan di, lesu laghoon todi poia ila Maaron mata, ve titaghon ngar to ye lolo pani. ²¹Ve yom irau uŋgabiiz poian tamtoghon tisob to Israel, ve uvureer tamtoghon popoiadi pida, lesu tiuul ghom pa uraat to nginiin ival tiina tonene. Yes to avodi kaarom, ma matadi mbep, ughur di malep. Ughita yes to avodi onoon, ve timatughez pa Maaron ve titaghon ngar toni, ghoru ughur di tiuul ghom pa uraat. Ughur pida tingin tamtoghon ndiŋndiŋ ndiŋndiŋ eez (1000), pida tingin tamoot liim (100), pida tingin tamoot ru saangul (50), ve pida tingin tamtoghon saangul moghon.^m

²²Uraat to gharatoon saveeŋ ve pataŋani to tamtoghon, nene pale inim daba tisob tonenen ledi uraat, ve tighamghami tovene itaghoŋi gha ila. Yes pale tigharaat saveeŋ rauraua, lesu tiuul ghom pa uraat tonene ve iraurau payom. Eemoghon saveeŋ pataŋani, nene yes irau tipuli ilat nimam, lesu taum ugharaata. ²³Ŋgar tonene, Maaron ighaze yom utaghoŋi. Ighaze ugham tovene, nene pale uraat ipataŋan payom kat maau. Ve tamtoghon tisob to tilat toman pataŋani todi, pale timuul tila pa inadi toman lolodi poia.”

²⁴Mose iloŋ rawa aliŋa, ve itaghon ngar isob to ye isavia. ²⁵Ye iŋgabiiz tamtoghon tisob to yes Israela, ve ivureer yes to ledi ngar popoia ve tirau uraat to ghamuun pooz, ve ighur di tinim daba, lesu tiuuli pa uraat to gharatoon saveeŋ. Pida tingin tamtoghon ndiŋndiŋ ndiŋndiŋ eez (1000), pida tingin tamoot liim (100), pida tingin tamoot ru saangul (50), ve pida tingin tamtoghon saangul moghon. ²⁶Tovenen ndag to naol ne, yes tiloŋloŋ saveeŋ to tamtoghon, ve tighagharaat pataŋani todi ŋgiira ŋgiira. Eemoghon pataŋani tintina, nene tipul di tila Mose nima, lesu tau igharaat di.

²⁷Yetro ineep ris toman Mose, ghoru Mose ighuri imuul ila pa ndug toni.

Yes Israela tila tivot lolooz Sinai pughu

19 ¹⁻²Yes Israela timundig muul ve tipul ndug Repidim, ve tilaagh tila tivot izi ndug balim Sinai. Laghoon todi to tipul Isip ve tinim, nene tigham kaiyo ru wa. Ve ite inim tol pani, ndag inim mata, ghoru tila tivot izi lolooz Sinai pughu, ve atedi izi tonowe.

³Mose ipul di tineep, ve izala pa lolooz, lesu yesuru Maaron tisavsav. Yoova ineep lolooz daba, ve imboob izila pani ighaze: “Usav pa yes Israela to papaghu to Yakop ne tovene:”

⁴Ŋgar to you naghama pa yes Isipa, yam Israela aghita pa taumim matamim wa. Yam awatag: You nambaad gham inimale manbog imbaad ndinatu izala bage, ve naghama gham anim avot tiou izi sualen. ⁵⁻⁶Aazne,

ighaze yam aloon alinjag, ve matamim ingal saveen mbuaan tiou, ve ataghon katin tutuunja, nene pale anim leg kat, ve itija talup ghiit tanim ee moghon. Onoon, taan isob toman tamtoghona, nene you tiou moghon. Ve yam ghoru, taug nasia gham, ve naghham gham anim leg kat. You naghaze yam asob aneep ila pooz tiou samba, ve ambees payou animale ndiran to watoonrau. Leso anim tamtoghon tiou patabuanja.’”^o

⁷Yoova isavsaav le isob, ghoru Mose imuul izila to yes Israela. Ila ivot todi, ve ipoi ndolmana todi tinim tilup di, ve ipaesia Yoova alinja isob tonenen padi. ⁸Yes tiloon saveen toni, ve tisob tilup avodi tighaze: “Poia, saveen isob to Yoova isavia, yei pale nitaghoni.” Tovenen Mose imuul izala to Yoova, ve ipaesia yokiinj todi pani.^p

⁹Yoova isaav pani ighaze: “Uloon! You pale naneep ila yaghur tae asoosona lolo ve natal tiom, ve nasavsaav toman ghom ve ival tiina tiloonja. Leso tighur ila saveen tiom ve titaghoni taghoni gha ila.”

¹⁰⁻¹¹Mose ipaesia yes Israela alinjadi pa Yoova le isob, ghoru Yoova isaav pani ighaze: “Umuul uzila, ve usaav padi tovene: Aazne ve bozo, yes irau timen nonogiiija todi ve tigharaat di, lesu tingalaan ila matag, ve tisaanan. Pasa mbonru, ghoru yes Israela pale tisob tighita ghou nazi nanim ve naneep izala lolooz Sinai daba.

¹²“Tovenen ungun sanguyan iluvut lolooz pughu, lesu tamtoghon tineep sagan. Ve usaav ariana padi, lesu tiza tinim lolooz sob, ve titut lolooz pughu rita malep. Ighaze tamtoghon eta ilaagh inim le ivazag lolooz pughu, yam arabi imaat. ¹³Ve ataam to rabuun, nene arabi pa nimamim malep. Aneep sagan, ve arabi pa yaam, ma avanegi. Tovenen ighaze tamtoghon eta, ma ngai eta itut lolooz pughu, nene irau ineep maau. Yam arabi imaat. Saveen tonene pale ineep tovene le irau aloonjavuur itanj le mala, ghoru yam irau azala lolooz.”^q

¹⁴Yoova isavsaav le isob, ghoru Mose ipul lolooz daba, ve imuul izila to yes Israela, ve isaav padi ighaze timen nonogiiija todi ve tigharaat taudi, lesu tingalaan ila Yoova mata, ve tisaanan. ¹⁵Ve ipaes padi ighaze: “Aazne ve bozo, yam agharaat taumim ve asaanjan. Agheen toman ndiliva malep. Pasa mbonru, ghoru Yoova izi inim.”

Maaron ivot to yes Israela

¹⁶Tinepneep le mbon ru isob, ve mbonmaagh, ghoru yaghur tae asoosona inim ikau lolooz daba. Ve ndug milia, ve lalaav irabrabi. Ve mbep eez itanj animale javuur, eemoghon avolutu tiina kat. Tovenen yes Israela tisob timatughez le tapiridi isob. ¹⁷Mose igham di tipul ndug todi to nepoon, ve tila tiyoon tigharau lolooz pughu, lesu yesja Maaron tilup di.

¹⁸⁻¹⁹Ghoro Yoova izi inim toman yab tiina izala lolooz Sinai daba, ve mbuas tiina ikau lolooz le tighita muul maau. Ve yongyoog tiina itok, le lolooz katkatia ilala inimnim. Ve mbef to itañ animale tavuur, itañtañ ve indurnduur inim inim le avolutu ivot inim tiina kat.

Ghoro Mose isavsav toman Maaron. Ve sawa to Maaron ipamuul saveeñ toni, aliña animale lalaav avolutu.^r

²⁰Tovenen Yoova izi inim ineeñ izala lolooz Sinai daba, ve ipoi Mose ighaze izala toni tonowe. ²¹Tovenen Mose izala toni, ve Yoova isaav pani ighaze: “Umuul uzila, ve uveivei pa ival tiina tovene: Tizoorndug pa tiza tinim tighita ghou malep. Pasa, ighaze tiza tinim, nene pale tamtoghon katindi timatmaat. ²²Yes ndiran to watoonraup paam. Ighaze lolodi tighaze tinim tigharau ghou, nene yes irau tigharaat taudi le tinjalaañ kat. Le isob, ghoro tinim tivot tiou. Ighaze tigharaat taudi maau, nene pale ateg yabyab padi, ve narab di tilaledi.”

²³Mose isaav pa Yoova ighaze: “Tamtoghon eta irau iza inim lolooz tonene maau. Pasa, yom taum usaav ariaña payei ughaze ningun sanjuyañ iluvut lolooz pughu, lesa tamtoghon tighita lolooz tonene animale ndug patabuañ ve tiroron pani.”

²⁴Yoova isaav pani muul ighaze: “Poia. Umuul uzila ugham togham Aron, ve yamru moghon aza anim. Eemoghon yes ndiran to watoonraup toman ival tiina to Israel tizoorndug pa tiza tinim tighita ghou malep. Ighaze tiza tinim, nene pale ateg yabyab padi, ve narab di tilaledi.”

²⁵Yoova isavsav le isob, ghoro Mose imuul izila, ve ipaesia aliña pa yes Israela.

Tutuñ Saangul

20 ¹Maaron isavia saveeñ isob tonene inarua yes Israela enaena ighaze:

²“You Yoova, Maaron tiom. Muuñ, yom unum mbesoonja sorok izi taan to Isip. Eemoghon you naghamaulin ghom, tauto upul ndug to patañani tonowen. ³Yom irau umbees pa you engengou. Ughur maaron ite paam imuñ payou ve umbees pani malep.^s

⁴“Ve ugharaat mbef eta ve ughuri inim Maaron payom malep. Sa mbef to tineep sambam, taan, ve te lolo, ugharaat eta nagho, ve ughuri inim maaron payom, ve umbees pani malep.^{t u}

⁵⁻⁶Upud aghem pa mbef eta tovene ve umbees pani malep. Pasa, you Yoova moghon, to Maaron tiom. Matag pariunñ. Naghaze tamtoghon tiou

r 19:18-19 Mbo 29:3+; Hib 12:18+ s 20:3 Mk 12:30; Lu 10:25+ t 20:4 Tutuñ tonene, ngara tovene: Iit irau tagharaat mbef eta, ve taghaze Maaron nagho raraate tovene ne maau. Pasa, mbef eta to taan nagho animale Maaron maau. Yesu moghon to ipatoon katin Maaron nagho pait (Yo 14:9). u 20:4 Igham 34:17; 1Kor 10:14; 1Yo 5:21; Syg 21:8

timbees pa you engengou moghon. Yes to tighur koi payou, nene pale matag kisin sosor todi, ve naghur atia iza to yes taudi, toman ndinatudi, nditimbudi, ve saas todi. Eemoghon yes to tighur lolodi payou ve titaghon tutuun tiou, nene pale lolog ineep tunja ila todi ve papaghu todi, ve poia tiou izaza todi itaghoni taghoni gha ila.^v

⁷“You Yoova, Maaron tiom. Uwaat sorokin izag malep. Pasa, tamtoghon to ighaze iwaat sorokin izag, ma ipariaan saveej kaarom ila you izag, nene irau naghurghuri maau. Pale naghur atia injarua pa sosor toni.^w

⁸“Matam injal umbom to Maaron ve upatab pani.^x
⁹⁻¹⁰Tovenen ndag inim eez, ila imuul ndag inim liim ve eez, nene sawa to ugham uraat tiom. Ve ndag inim liim ve ru, ghoru yom irau upul uraat tiom tisob tineep, ve upatab pani. Pasa, nene umbom patabuan to Yoova, Maaron tiom. Tovenen yamja ndinatum, mbesooja tiom, ngai tiom, ve yes loomba to tineep toman ghom ne paam, yam asob irau apul uraat tiam ineep, ve atemim izi.^y

¹¹Pasa, sawa to you Yoova naghur sambam, taan, ve te, toman mbep tisob to tineep ila, nagham uraat irau mboj liim ve eez moghon, ve napasob uraat tonenen. Ve sawa to inim liim ve ru, ateg izi. Tauto napait sawa tonenen, ve naghuri inim umbom patabuan, ve naghur poia tiou ineep izala.^z

¹²“Matam lonlonajina pa tamam ve tinam, ve utandag padi. Leso uneep mala izi taan to you Yoova, Maaron tiom, pale nagham payom.^a

¹³“Urab tamtoghon imaat malep.^b

¹⁴“Ughur maat malep.^c

¹⁵“Uyub malep.^d

¹⁶“Upariaan saveej kaarom pa uwaghamun itam ite malep.^e

¹⁷“Lolom igham pa nditam ruum todi malep.^f

“Ve lolom igham pa ndizwadi, mbesooja, ngai, ma mbep todi ite paam malep.”^g

Yes Israela timatughez pa Maaron

¹⁸Yes Israela tiloon lalaav avolutu, ve tighita ndug milia, ve tiloon mbep to itanjan animale tavuur, ve tighita yab mbuasa asosooja ikau lolooz, le timatughez ve tinidi irur. Tovenen tiyoon sagan pa lolooz pughu,¹⁹ ve tisaav pa Mose tighaze: “Yom irau ugham Maaron avo, ve upaesia alija

v 20:5-6 Igham 34:7 w 20:7 Mt 5:33+ x 20:8 Igham 16:23+ y 20:9-10 Igham 23:12, 34:21 z 20:11 Mbnp 2:1+ a 20:12 Mt 15:4; Mk 7:10; Ep 6:2+ b 20:13 Mt 5:21; 1Yo 3:15; Syg 21:8 c 20:14 Mt 5:27+; 1Kor 6:15+; Ep 5:5; Hib 13:4; Syg 21:8 d 20:15 Mt 19:18; Ro 13:9; Ep 4:28 e 20:16 Mk 10:19; Lu 18:20; Syg 21:8, 22:15 f 20:17 Lu 12:15 g 20:17 Ro 7:7, 13:9

payei. Pasa, yei nimatughez. Ighaze ye tau isavsaav toman ghei, nene pale nisob nimatmaat!”^h

²⁰Mose isaav padi ighaze: “Amatughez malep. Aazne, Maaron izi inim itaghon ataam tonene, pa ipatooŋ tapiri payam, lesu awatag katini ve amatughez pani, ve agham sosor muul sob.” ²¹Tovenen ival tiina to Israel tiyoon sagan pa lolooz pughu, ve Mose enġeni imuul izala, le ila igharau yaghur tae asosooŋa to Maaron ineep ila.

Tutuŋ pida to artaal

²²Ghoro Yoova isaav pa Mose ighaze ipaesia aliŋa pa yes Israela tovene: “Yam taumim aghita wa. You naneep sambam, ve aliŋag izilat payam.

²³Ambees pa you moghon. Alup ghou toman maaron kaarom eta malep. Tovenen agharaat maaron kaarom eta pa silva ma gol ve ambees pani malep.

²⁴“Yam irau andou taan, ve agharaata inim artaal payou, lesu agham watoonrau tiam izala. Sipsip ve makau tiam to arab di tinim watoonrau, aghur pida tizala yab, lesu yab ighan suvun di. Ve pida, amoz di ve taumim aghan di, lesu itija talup ghiit tanim ee moghon. Ndug sine to ighaze you naghuri payam inim inamim to suŋuŋ, yam irau alup gham pa suŋuŋ ve apait izag tonowe. Lesu matamim iŋgal ghou, ve nanim naneep toman gham, ve naghur poia tiou iza tiam. ²⁵Ve ighaze andou yaam inim artaal payou, ayau yaam dodolidi moghon. Yaam to ighaze agharaata ve asap dige, nene aghami pa artaal tiou malep. Yaam tovene, poia pa artaal maau. Pasa, nene ndug patabuaŋ. ²⁶Ighaze agharaat artaal eta, izala kat malep. Pasa, ighaze ataghon ndeet azala, nene pale tighita mbolemim.”

Tutuŋ pida to iŋarua yes mbesooŋa ve daba todi

21 ¹Maaron iseŋ saveeŋ toni muul ighaze: “Nene tutuŋ pida to naghaze usavia pa yes Israela. Lesu ipatooŋ di pa sa nġar to pale titaghoŋi.

²“Ighaze ughol Hibru taamdi eta inim lem mbesooŋa, ye pale imbees payom irau ndaman liim ve eez. Ve ighaze ndaman inim liim ve ru, ghoro upuli ila. Ve upoi pa lem atia malep. Pasa uraat toni, tauto iyat mulin yaam to yom ugholi pani. ³Ighaze muuŋ ye ivai maau, ve yom ugholi inim lem, sawa to ighaze upuli ila, ghoro upul enġeni ila. Ve ighaze muuŋ ye ivai, ve yom ughol yesuru azuwa tinim lem, upul yesuru tila. ⁴Ve ighaze mbesooŋa eta daba toni igham liva eta pani inim azuwa, ve liva tonenen ipoop, sawa to ighaze mbesooŋa tamoot uraat toni isob, nene pale enġeni ila. Azuwa toman ndinatu pale tineep toman daba toni.

h 20:19 Hib 12:18+

⁵Eemoghon ighaze mbesooŋa tonenen isaav ghazooŋa ighaze: ‘You lolog pa daba tiou, azuwag, ve ndinatug. Irau napul di tineep, ve engengou nala ne maau.’ ⁶Nene pale daba toni ighami ve yesuru tila tivot Maaron nagho ila ndug to tisuŋsuŋ pani, ve ipaak mbesooŋa tonenen taliŋa ila ataam, ma ataam avo dige. Ghoru igham kiruun, ve irab purusan mbesooŋa tonenen taliŋa. Leso inim ghilalooŋ pani ighaze muri, ye irau ipul uraat maau. Pale ineep toman daba toni, le irau sawa toni to mateeŋ.

Tutuun pida to iŋarua ndiliva mbesooŋa ve daba todi

⁷“Ighaze tamoot eta igholia natu liva ila pa ŋgeu ite inim mbesooŋa pani, nene liva tonowen pale ineep toman ŋgeu tonenen. Ighaze muri daba toni ighaze ipuli ila, ye irau itaghoŋ ŋgar to tighamgham pa yes mbesooŋa nditamoot ne maau. ⁸Ighaze ŋgeu to igham liva tonenen inim le ne, lolo pani muul maau, ye irau igholia ila ndug ite paam maau. Ye irau igholia imuul ila to liva tonenen tau siŋ toni. Pasa, saveeŋ mbuaaŋ toni toman liva tonenen, ye itaghoŋi maau. ⁹Ighaze ŋgeu tonowen igham liva tonenen pa natu eta, ye irau igham poiani inimale ye tau natu liva. ¹⁰Ve ighaze ŋgeu tonowen ivai liva tonenen, ve muri ivai liva ite paam, ye irau mata iŋgal liva to ighami muun ne pa a aniŋ, ve le oliŋa, ve yesuru tilup di pa ghenooŋ paam. Ipuli ineep sorok malep.ⁱ ¹¹Ighaze ye itaghoŋ ŋgar tol tonene maau, ye irau ipul liva tonenen ila. Ve irau ipoi pa le atia maau.

Atia to yes to tiwaghamun tamtoghon

¹²“Ighaze tamtoghon eta irab ita ite imaat, yam arabi imaat paam.^j ¹³Eemoghon ighaze ye iwaat rabuunŋi maau, yam arabi malep. Pasa, you Maaron to napul pataŋani tonenen ivot. Tamtoghon tovene irau ighau ila pa ndug pida to yonŋaŋ to muri pale napatooŋ di payam, lesu ineep pooi. ¹⁴Eemoghon ighaze tamtoghon eta ate yabyab pa ita ite, ve iwaat rabuunŋi ve imaat, ve muri ighau ila pa artaal pughu, lesu artaal ndamo pani ve ineep pooi, yam aghurghuri malep. Ala asasaara ivot ila pumuri, ve arabi imaat.

¹⁵“Ighaze tamtoghon eta irab tama ma tina, arabi imaat.

¹⁶“Ve ighaze ŋgeu eta ikis tamtoghon ite, ve igholia ila to tamtoghon ite paam, ma tau ikisi inim le mbesooŋa, arabi imaat.^k

¹⁷“Ighaze tamtoghon eta ate yabyab pa tama ma tina, ve ipiyaav saveeŋ samia padi, arabi imaat.^l

¹⁸⁻¹⁹“Ighaze nditamoot ru tiparab, ve eez irab katin ita ite pa yaam ma nima, le tini isami kat. Eemoghon imaat maau. Inim narape

i 21:10 1Kor 7:3+ j 21:12 Mbnp 9:6 k 21:16 Mbnp 37:28; 1Tim 1:10 l 21:17 Mt 15:4; Mk 7:10

moghon. Ŋgeu to irabi, pale ighol ita ite tonenen pa sawa to ye inim narape ve irau igham uraat maau. Ve ye irau ŋgini ve imbees pani le tini poia muul. Ighaze ita ite tonenen ikis titi ve tau imundig ilaagh, ghoru isob. Sosor toni, ye igharaata wa.

²⁰“Ighaze tamtoghon eta ilos mbesooŋa toni tamoot ma liva eta pa ai, ve mbesooŋa toni imaat pataghaaŋ, yam aghur atia pa tamtoghon tonenen. ²¹Eemoghon ighaze mbesooŋa toni imaat rikia maau, ve ineep mboŋ eez ma ru, ghoru imaat, yam aghur atia pani malep. Pasa mbesooŋa tonowen, ye ineep ila daba toni tonenen nima.

²²“Ighaze liva eta apo, ve sawa toni to popaaŋ sone. Ve ighaze nditamoot pida tiparab, ve todi eta ipiyaav nima le irab sorokin liva tonenen, ve muri ipoop le natu imazug, ve ye tau poia. Nene pale atia piiz to azuwa toman yes pooza tighuri pa ŋgeu tonenen, ye irau igholi.

²³“Eemoghon ighaze liva to apo igham samia, yam irau aghur atia pa ŋgeu tonenen itaghon sosor to ye ighami. Tovenen ighaze ye irab liva tonenen imaat, yam arab ŋgeu tonenen imaat paam. ²⁴Ve ighaze iwaghamun mata, yam awaghamun ŋgeu tonenen mata. Ve ighaze iwaghamun livo, ma nima, ma aghe, yam paam agham ŋgar raraate moghon pani.^m

²⁵Ve ighaze ye itun liva tonenen pa yab, yam anamim atun ŋgeu tonenen paam. Ve ighaze imbuti, ma irabi le tini imburmburtaaŋ, ataghon ŋgar raraate moghon pa ŋgeu tonenen.

²⁶⁻²⁷“Ighaze ŋgeu eta irab mbesooŋa toni tamoot ma liva eta le mata isami, ma livo ipol, ye irau ipuli ila. Irau inim mbesooŋa pani muul maau. Nene ataam to ŋgeu tonenen igharaat sosor toni.

Tutuuj to iŋarua ŋgai taudi

²⁸“Ighaze makau tamoot eta iŋgal tamoot ma liva eta pa ndooŋa le imaat, yam arab makau tonenen paam pa yaam le imaat. Eemoghon aghani malep. Ve aghita makau tama aghaze ye inim pughu pa pataŋani tonenen malep. ²⁹Eemoghon ighaze makau eta moghon moghon iŋgalŋgal tamtoghon pa ndooŋa, ve makau tama iwatagi wa. Eemoghon ye iŋgin poian makau toni maau, ve igham tovene muul pa tamtoghon eta, yam arab makau tonenen pa yaam le imaat. Ve makau tama paam, arabi imaat. ³⁰Eemoghon ighaze ye to imaat ne ndita lolodi isamin makau tama, ve tiyok pani pa igharaat sosor toni, nene atia piiz to tighuri pani, ye irau igholi. Leso igham mulin tau, ve imaat sob. ³¹Ighaze makau eta iwaghamun pain kainaaŋen ma liva kainaaŋen eta, yam ataghon ŋgar raraate moghon. ³²Ve ighaze makau tamoot eta

ingal mbesooŋa tamoot ma liva eta pa ndooŋa, makau tama irau ighol yaam silva tamoot ee saanŋul (30)ⁿ ila pa daba to mbesooŋa tonenen. Ve yam irau arab makau tonenen pa yaam le imaat.

³³⁻³⁴“Ighaze ŋgeu eta itai puura ve ipoona maau, ma ireu mbef to tipoon saambu avo pani, ve ighaze makau ma esele eta itap izila le imaat, nene ŋgeu tonenen irau igharaat ŋgai tama. Ve ŋgai pale ineev ve inim ye to igham sosor ne le. ³⁵Ighaze makau to ŋgeu eta iwaghamun makau to ita ite eta ve imaat, ndiran ru tonenen irau tigholia makau to poia ne, ve tivalag yaama. Ve makau to imaat, nene yesuru irau tipaal balagini inim ru, ve pida ila to ŋgeu eez, ve pida ila to ita ite. ³⁶Eemoghon ighaze makau tonenen moghon moghon ighamgham tovene, ve makau tama ingin poiani maau, ve igham tovene muul, ye pale irabolin makau to imaat ne, pa toni eta to raraate, ve makau maate tonenen ineev inim a.

Tutuŋ pida to inarua ŋgar to paraboliŋ mbef

22 ¹“Ighaze ŋgeu eta iyub makau ma sipsip eta, ve irabi ve ighani, ma igholia ila pa tamtoghon ite, ye pale iyat mbef to iyubi ne, ve igham pida paam izala pogho. Leso igharaat sosor toni. Ighaze iyub makau, ye pale iyati, ve igham makau paan paam izala pogho. Ve ighaze iyub sipsip, ye pale iyati, ve igham sipsip tol paam izala pogho.^o

²“Ighaze ŋgeu yubyub eta ireu ruum pa mboŋ ve ilooŋ ila, ve tamtoghon eta ighita ve irabi imaat, nene ye le saveeŋa maau.

³Eemoghon ighaze ŋgeu eta irab yubyub eta le imaat pa ndag, nene ye igham sosor. Tovenen yam irau aghur atia pani animale moghon moghon aghuri pa yes to tirab tamtoghon imaat.

“Ighaze tamtoghon eta iyub mbef, ye irau igharaat mbef to iyubi ne ila to mbef tonowen tama. Ve ighaze ye irau igharaata maau, nene pale tigholia tamtoghon tonenen ila inim mbesooŋa pa tamtoghon pida, ve tigham yaama ila to mbef tonowen tama.^p

⁴“Ighaze ŋgeu eta iyub esele, ma makau, ma sipsip eta, ve ighaze tindeev mbef tonowen imaat maau ve inepneep ila ŋgeu tonenen nima, ye pale ipamuula, ve igham tau toni eta ila tomani, lesa igharaat sosor toni.

⁵“Ighaze ŋgeu eta ipul ŋgai toni tivoool tila pa uum to tamtoghon ite ve tiwaghamuni, ye irau iyat aniŋ ve vaen to ŋgai toni tiwaghamun di ne pa aniŋ ve vaen popoiadi kat to titub ila uum toni. ⁶Ve ighaze ŋgeu eta itun ndug, ve yab ighan uum to tamtoghon ite ve iwaghamun wit toni papaghu, ma wit matua to ndouŋ ne, ye irau iyat suvun wit to yab ighani.

n 21:32 Yaam silva to saveeŋ waaro tonene isavia ne, iza ‘sekel.’ Sekel eez, nene animale 12 Kina. Tovenen 30 sekel, nene animale 360 Kina ma venen. **o 22:1** Lu 19:8
p 22:3 Mt 18:25

⁷“Ighaze ngeu eta ipul yaam toni ma mburuguun toni pida ila tamtoghon ite nima pa ingin di. Ve ighaze yubyub eta iyub mbef tonowen ila ruum toni, ve muri tindeenja, sa mbef to ye iyubi, ye irau ipamuula imuul ila, ve ighur ite paam izala pogho pa igharaat sosor toni. ⁸Eemoghon ighaze andeen yubyub tonenen maau, yam agham ngeu to ingin mbef tonenen, ve ala apayoonda ila Maaron nagho. Ghoro asun pa Maaron, lesu ipatoon ngeu tonenen: Ye nima isosor pa ita ite mbef toni, ma maau?

⁹“Ve ighaze tamtoghon ru tiwazoran di pa makau, esele, sipsip, nonogiija, ma mbef ite paam. Ve eez ighaze ye toni, ve ite ighaze ye toni. Nene agham yesuru ve ala avot Maaron nagho, ve tisavia saveen todi izi tonowe. Ghoro asun pa Maaron, lesu ipatoon sei to igham sosor. Tamtoghon to igham sosor, pale ipamuul mbef to tiwazoran di pani ne imuul ila to ita ite, ve ighur ite paam izala pogho pa igharaat sosor toni.

¹⁰“Ighaze ngeu eta ipul esele, makau, sipsip, ma ngai toni ite paam ila ita ite nima pa ingini. Ve ighaze mbef tonenen imaat, ma isami, ma yubyubja tiyubi, ve ighaze tamtoghon eta ighita mbef tonenen maau. ¹¹Nene pale mbef tonenen tama yesuru ita ite to ingin mbef toni, tila tiyoon ila Yoova nagho. Ve ighaze ye to ingin mbef toni ne, isaav ighaze: ‘Onoon kat, Maaron ighita ghou ve nasaav. Nimag isosor pa mbef to itag ite tonene maau.’ Sawa to mbef tonenen tama iloon saveen ghazoonja tovene, nene irau le saveen muul maau, ve ye irau ighur mata pa ita ite tonenen pa iyat mbef toni maau.⁹

¹²“Eemoghon ighaze ita ite ingin poian mbef tonenen maau, ve yubyubja tiyubi, ye irau iyat mbef to ilale imuul ila to mbef tonenen tama. ¹³Ve ighaze mbef sagsag eta ighan ngai tonenen ve isaas motini, nene ngeu to ingini irau igham suruvu ila, ve ipatoonja pa ngai tonenen tama. Lesu iwatag ighaze ita ite tonenen iyub ngai toni maau. Mbef sagsag to iwaghamuni. Tovenen ita ite tonenen irau iyati maau. Pasa, ye le sosor maau.

¹⁴“Ighaze ngeu eta ighason ita ite pa bapolo toni, lesu iuuli pa uraat. Ve ighaze bapolo tama inep maau, ve bapolo tonowen imaat, ma mbef eta iwaghamuni, nene ngeu tonenen irau iyati. ¹⁵Eemoghon ighaze bapolo tama inepneep, ve patanani tovene ivot, nene ngeu to igham bapolo tonenen pa uraat, irau iyati maau. Ve ighaze ye igharaat bapolo tama pataghaan wa, ve patanani tovene ivot, nene paam irau iyati maau. Pasa, ye igharaat atia ila to bapolo tama wa.

Tutuun pida

¹⁶“Ighaze ngeu eta ighereb liva paghu eta to tisia sone, ve imogheer pani, ye irau ighol liva tonenen ve ivaii. ¹⁷Ve ighaze liva tama iyok padi

pa tivai maau, nene pale yesuru tivai maau. Eemoghon ngeu tonenen irau igharaat liva tama, raraate inimale tigholghol ndiliva papaghu.

¹⁸“Ndiliva to tighamgham mur, apul di tineep malep. Arab di timaat.”

¹⁹“Ighaze tamoot eta imogheer pa ngai liva eta, ma liva eta ipatoonj tau pa ngai tamoot leso ngai imogheer pani, arabi imaas.”

²⁰“Yam irau agham watoonjrau pa Yoova moghon. Ighaze tamtoghon eta igham watoonjrau pa maaron kaarom eta, arabi ilale.

Lolood isamin yes mbolaaja

²¹“Loomba to tineep ila lolomim, yam agham samin di, ma agham patajanani padi malep. Yam irau agham poian di. Pasa, matamim ingal: Muun, yam paam anim loomba izi Isip. ²²Ve yes ndinaara ve parooja tovene paam. Agham samin di malep.”

²³Pasa, ighaze agham tovene padi, ve titaŋ roran ghou pa ulaaŋ, you pale naloonj taŋiiz todi ve nauul di. ²⁴Ve you pale ateg yabyab kat payam, ve nambut gham pa buza tiou ve amatmaat, ve ndizwamim tinim ndinaara, ve ndinatumim tinim parooja.”

²⁵“Ighaze tamtoghon tiou eta mbolaaja ighami ve igham bun ilat tiom, yom utaghon ngar to yes ndiran to tighamgham yaam pa tamtoghon leso tigham ledi avua izala pogho ne malep. Tovenen ye to igham bun ilat tiom, ighaze muri iyati, nene ye irau iyat yaam anoja moghon. Upoi pa avua izala pogho malep. ²⁶Ve ighaze ugham nonogiija toni to moŋejaaja inep tiom, leso mata ingal bun toni ve iyati, rabrab to naol ne, yom irau ugham nonogiija toni imuul ila pani le isob, ghorom mboŋ izi. Ve mboŋmaagh, ghorom ye ighami imuul ilat. ²⁷Pasa, ye le mbep ite paam pa itatab tau pani maau. Tovenen ighaze ukis nonogiija toni pa mboŋ, nene pale moŋejaaja ighami, ve igheen pooi maau. Ve ighaze ye itaŋ roran ghou pa nauuli, nene pale naloonj taŋiiz toni. Pasa, yes to tineep ila patajanani lolo, you lolog isasamin di, ve nauuluul di.

Tamatughez pa Maaron ve tatandag pa yes pooza

²⁸“Uveleg Maaron malep, ve upiyaav saveeŋ samia pa daba eta to ingin gham ne malep.”

²⁹Aniij toman vaen ve oliv tiom mata, unŋguruut di payou malep. Ugham di tinim payou. Ve natum tamoot aidaba tovene paam, upuli inim leg.”

³⁰Ve makau ve sipsip tiom to nditinandi tipoop di muun ne paam. Upul di tineep toman nditinandi irau mboŋ liim ve ru. Ve mboŋ inim liim ve tol, ghorom ugham di tinim, ve urab di tinim watoonjrau payou. ³¹Yam irau

r 22:18 Saveeŋ waaro tonene inarua yes ndiliva moghon maau. Inarua yes nditamoot paam. Ughita Wok Pris 20:27. s 22:19 Wkp 18:23, 20:16; Lo 27:21 t 22:22 Yems 1:27 u 22:24 Lu 18:7 v 22:28 Igham 20:7; Mbaŋ 23:5 w 22:29 Igham 13:2; Lu 2:23

ataghon ngar patabuan. Pasa you naghham gham anim leg wa. Tovenen ngai to ighaze mbef sagsag eta isaas motini ve irabi imaat, aghani malep. Apiyaava ila ngavuun tighani.”

Tawaghamun tamtoghon izadi malep

23 ¹“Ighaze ulooŋ mbef eta varu, ghoru usavia pa tamtoghon rikia malep. Pa vene, saveeŋ kaarom ma venen. Ve ighaze tamtoghon eta igham ngar samia ve tipayoonda pa savsaveeŋ, uvoool toni ve usavia saveeŋ kaarom pa uuli malep.^x

²“Ighaze ival tiina tilup di pa tigham ngar samia eta, yom ula toman di malep. Ve sawa to gharatoon saveeŋ, ighaze ival tiina tisavia saveeŋ kaarom pa tighamun saveeŋ, yom ula toman di ve upariaaŋ kaarom todi tonowen malep. Yom irau usavia saveeŋ onoon moghon.

³“Ighaze tipayoon mbolaŋa eta pa savsaveeŋ, uvoool toni sorok malep. Ulooŋ poian saveeŋ toni pughu le isob, ghoru uŋgabiiza itaghon ngar denja.

Tauul koiaad

⁴“Ighaze ughita makau ma esele to koiam eta ilaghlaagh pumuri, ughami imuul ila to tama. ⁵Ve ighaze ughita esele to koiam eta to imbaad mbef pataŋani ve itap izi igheen, upuli malep. Ula ve uul koiam tonanan ve yamru atoov agham esele toni iza iyoon.

Ataam to gharatoon saveeŋ

⁶“Ighaze yom daba to ndug, ve mbolaŋa eta le pataŋani, ve ighuri ilat nimam pa ugharaata, utatan saveeŋ toni malep. Ulooŋ saveeŋ toni ve ugharaat poiani. ⁷Ve ighaze tamtoghon tiŋgal saveeŋ pa ngeu eta ve tipayoonda sorok pa savsaveeŋ, yom ula toman di pa saveeŋ todi malep. Uneep saganu padi. Tamtoghon denja to le sosor eta maau, urabi imaat malep. Pasa, yes to tigham sosor tovene, nene irau naghurghur di maau. Pale naghur atia padi.^y

⁸Ighaze tamtoghon eta ighaze ighol ghom leso uuli pa kaarom toni, uyok pani malep. Pasa, ngar tovene ighamun ngar to tamtoghon. Yes to tighazoon pa ngar poia ne paam, pale ighamun ngar todi. Tovenen sawa to tigharaat saveeŋ, yes pale tivool to yes to tighol di, ve tighamun saveeŋ to yes to titaghon ngar denja.

⁹“Ugham samin yes loomba malep. Pasa muuŋ, yam paam aneep anim loomba izi Isip. Tovenen pataŋani to yes loomba, taumim ayamaana wa.^z

Saveeŋ pida to injarua umbom patabuan

¹⁰“Uvavazog aniiŋ ila taan tiom, ve uyoyou di le irau ndaman liim ve eez. ¹¹Ve ighaze ndaman inim liim ve ru, ghoru upul taan tonanan ineep

x 23:1 Igham 20:16; Mbo 15:3; Mt 19:18 y 23:7 Igham 20:16; Lu 23:13-25; Ep 4:25
z 23:9 Igham 22:21

inim rangaat. Ndaman tonenen, yes mbolaanja to tineep ila lolomim, pale tila rangaat tiom tonanan, ve tikaal adi nakapoŋa pa tighan. Ve ighaze tipul aniiŋ pida ineep, nene pale inim mbep sagsag adi. Sawa isob, ighaze ndaman inim liim ve ru, yom irau utaghon ŋgar tovene. Ve utaghon ŋgar raraate moghon pa oliv ve vaen tiom paam.

¹²“Ndag inim eez, ila imuul ndag inim liim ve eez, nene sawa tiom to ugham uraat. Ve ndag inim liim ve ru, yom irau upul uraat tiom ineep, ve atem izi. Leso makau ve esele tiom, toman yes mbesooŋa to nditinandi tipoop di ila ruum tiom, ve yes loomba to yamŋa anepneep ne paam, atedi izi ve avuvudi ila.^a

¹³“Saveeŋ isob to you nasavia payam, matamim kisini ve ataghoni kat. Ve asuŋ pa maaron kaaromŋa malep, ve izadi ivot ila avomim rita malep.

Lupuuŋ tintina tol to suŋuuŋ pale ivot irau ndaman to naol

¹⁴“Ndaman to naol ne, lupuuŋ tintina tol to suŋuuŋ pale tivot. Sawa todi ighaze ivot, ghoru yamŋa ival tiina to Israel alup gham pa suŋuuŋ, ve apait ghou. ¹⁵Lupuuŋ to ivot muuŋ, nene Pasova. Nene pale ivot pa kaiyo Abib.^b

Pasa, kaiyo tonenen to naghama gham apul taan to yes Isipa ve avot. Sawa tonenen, yam alup gham pa suŋuuŋ, ve aghan mberet to le yis maau irau mboŋ liim ve ru, itaghon tutuuŋ to muuŋ naghuri payam.

“Tamtoghon to ighaze isuŋ payou ne, nima ŋginiŋa ve inim ivot naghog malep.^c

¹⁶“Lupuuŋ inim ru, nene Sawa to Aniiŋ Mata. Uvazog aniiŋ ila uum tiom, ve usasaŋa le ighaze aniiŋ mata imatu, ghoru lupuuŋ tiina tonene ivot. Tovenen ulaagh toman aniiŋ tiom mata unum, ve yamŋa ival tiina to Israel alup gham pa suŋuuŋ.

“Lupuuŋ inim tol, nene Sawa to Taitaiŋ. Ndaman igharau ighaze isob, ve utai aniiŋ ila uum tiom, ghoru lupuuŋ tiina tonene ivot. Tovenen yam asob irau alup gham pa suŋuuŋ, ve apait ghou pa aniiŋ to naghama payam.^d

¹⁷“You Yoova, Maaron tiam. Tovenen ndaman to naol ne, ighaze sawa tol tonene tivot, ghoru nditamoot tiam tisob tilup di ila naghog, ve tisun payou.

Tutuuŋ pida

¹⁸“Ighaze urab mbep eta inim watoonrau payou, ulup mbep to yis ineep ila ne, tomani malep. Ve sawa to yamŋa ival tiina alup gham pa suŋuuŋ ve ughama watoonrau payou, yab irau ighan suvun watoonrau

a 23:12 Mbnp 2:2+; Igham 20:8 **b 23:15** Kaiyo Abib ivotvot pa Mas ma Epril.

c 23:15 Igham 12:17, 34:20 **d 23:16** Igham 34:22

tiom tonanan minda toman ngoreeᅇa. Iᅇgiira rita ineep mboᅇj le ndugizau malep.

¹⁹“You Yoova, Maaron tiom. Aniiᅇj tiom mata to tivot ila taan tiom, yom uvureer popoia moghon ve ugham di tinim rumai tiou.

“Ighaze unaz mekmek natu eta, unazi toman tuz to tina malep.”^e

Aᅇla to Yoova pale imuuᅇj pa yes Israela ve iᅇgin di pa ataam

²⁰“Alooᅇj! You pale nambaᅇj aᅇla tiou ilat, lesu imuuᅇj payam, ve iᅇgin gham pa ataam. Ye pale igham gham ala avot izi taan to you naghuri payam pataghaᅇj pa aneep pani.^f

²¹Aghur taliᅇamim pani pooi, ve alooᅇj saveeᅇj toni. Azoor aliᅇa malep. Pasa, ighaze yam azoor aliᅇa, ye irau ighurghur gham maau. Pale ighur pataᅇani iza tiam. Pasa, ye igham naghog, ve izag ineep toni.

²²“Eemoghon ighaze yam alooᅇj aliᅇa, ve ataghon katin saveeᅇj isob to you nasavia, nene pale naghur koi pa yes to tighur koi payam, ve naparab toman yes to tiparab toman gham. ²³Tovenen aᅇla tiou tonene pale imuuᅇj payam, ve igham gham ala avot izi taan to yes Amora, Hita, Peresa, Kanaana, Hivia, ve Yebusa. Ve you taug pale narab di tilaledi, lesu agham taan todi inim lemim.^g

Yoova ighaze yes Israela timbees pani moghon

²⁴“Sawa to ala aneep izi taan Kanaan, ataghon di pa ᅇgar todi malep. Tovenen aput aghemim pa maaron kaaromᅇa todi ve ambees padi malep. Arab mbirisan di. Ve yaam todi patabuaᅇa to tiyondyood ila ndug todi to suguuᅇj, tovene paam. Arab mbirisan di le timbiriis.^h

²⁵“You Yoova, Maaron tiam. Yam irau ambees payou moghon. Leso poia tiou iza tiam, ve naghām amim aniiᅇj ve ya, ve nandiir moroghoᅇj ighau payam.ⁱ

²⁶Ve ndiliva tiam tisob, popaᅇj todi pale poia moghon. Eta irau uupa maau, ve pain eta to ineep ila tiina apo lolo irau imazug maau. Ve you pale matag payam, lesu aneep mala izi taan to naghaze naghām payam. Irau amaāt rikia maau.

²⁷“Sawa to yam alaagh ala, you taug pale namuuᅇj payam, ve naghur matughezaᅇj tiina ivot pa yes ndug ndug to pale ala avot todi. Lesu naghām koiamimᅇa ᅇgar todi iwaghāmghām, ve timatughez payam ve tighau. ²⁸Ve you pale nambaᅇj ᅇguruub ndiᅇndiᅇj ndiᅇndiᅇj timuuᅇj payam. Lesu tireu yes Hivia, Kanaana, ve Hita tighau.^j

²⁹Eemoghon irau nandiir di tisob tighau pa ndaman ee moghon maau. Pa vene, taan todi ineep sorok, ve mbeb sagsag timasa tinim naol izi ndug

e 23:19 Igham 22:29, 34:26 f 23:20 Igham 32:34, 33:2 g 23:23 Mbnp 15:19+
h 23:24 Igham 20:5, 34:13 i 23:25 Igham 15:26 j 23:28 Mbnp 35:5

todi, ve tiwaghamun gham. ³⁰Tovenen you pale nandiir di poipoi ve tila, le irau yam avot anim naol, ghero agham taan todi isob inim lemim.

³¹“Taan to naghaze naghham payam ne, dige eez, nene itaghton naari to Te Kavianaŋa, le ila imuul izi naari to Te Mediterenian to yes Pilistia tineep pani. Ve dige ite, nene itaghton ndug balim to magargaar moghon, le ila imuul ya Euprates. You pale naghur taan tonowen tamtoghona tilat nimamim, leso andiir di tighau, ve agham taan todi inim lemim. ³²Tovenen yamŋa ambua saveeŋ pa alup gham anim ee moghon malep. Ve maaron kaaromŋa todi tovene paam. Ambua saveeŋ toman di pa yamŋa alup gham malep. Aneep saguan padi. ³³Ve ayok padi pa tineep toman gham ila taan tiam malep. Pale tiyes gham pa ŋgar todi samsamia, ve agham sosor ila matag. Ve aghita. Ighaze tiweu gham ve ambees pa maaron kaaromŋa todi ve asuŋ padi, nene pale inim liis payam.”

Yes Israela timbua saveeŋ toman Yoova

24 ¹Yoova isaav pa Mose ighaze: “Yamru togham Aron, toman ndinatu ru Nadap ve Abiu, ve daba tamoot tol saanŋul (70) to yes Israela aza anim tiou to lolooz daba ne. Eemoghon anim agharau ghou kat malep. Aneep saguan ris, ve aput aghemim, ve asuŋ payou. ²Le isob, ghero yes pida tineep tonowe, ve yom engengom unum ugharau ghou. Ve yes ival tiina to Israel tovene paam. Tiza tinim tigharau ghou malep. Tineep saguan.”

³Tovenen Mose imuul izila to yes Israela, ve ipaes padi pa saveeŋ ve tutuuŋ tisob to Yoova isavia di. Isavsav padi le isob, ghero tilup avodi tighaze: “Saveeŋ isob to Yoova isavia, yei pale nitaghoni.”^k

⁴Ghero Mose imbood saveeŋ isob to Yoova ila rau.

Mboŋ ndugizau, ghero Mose imundig, ve indou yaam pida izi lolooz pughu inim artaal, ve ipayoon yaam saanŋul ve ru tinim ghilalooŋ pa rumai saanŋul ve ru to yes Israela. ⁵Ghero imbaanŋ ndipain todi pida tila tigham watoonrau pa Yoova. Yes tigham mbep pida ve tighur di tizala yab ve ighan suvun di. Ve timoz makau papaghu pida ve tighan di, leso yesŋa Yoova tilup di tinim ee moghon. ⁶Mose iwato mbep to tirab di tinim watoonrau ne siŋidi, ve iliŋ pida ila oon pida lolodi, ve igham pida, ve itirtiri izala artaal. ⁷Ghero igham rau to saveeŋ mbuaanŋ todi toman Yoova ineep ila, ve iraava, ve iwaata, ve ival tiina tilooŋ. Tiloonŋa le isob, ghero tisaav tighaze: “Saveeŋ isob to Yoova isavia, yei pale nitaghoni kat.”

⁸Ghero Mose igham siŋ to ineep ila oon lolodi, ve itirtiri izala ival tiina poghodi, ve isaav padi ighaze: “Aazne, Yoova imbua saveeŋ toman gham, ve yamŋa alup gham anim ee moghon. Siŋ tonene ipariaanŋ saveeŋ

mbuaan tiam toman Yoova. Lupuun toit toman Yoova, nene iyoon izala saveen to ye igham pait. Ighaze tataghoni kat, nene pale lupuun toit toman Yoova inepneep tovene itaghoni taghoni gha ila.”¹

⁹Ghoro Mose igham Aron, Nadap, Abiu, ve daba tamoot tol saangul (70) to yes Israela, ve yesja tizala pa lolooz. ¹⁰Tila tivot tonowe, ghoro tighita Maaron to Israela. Ye iyoon izala mbep eez pogho. Mbep tonowen babanja, ve bibiliina inimale tata. ¹¹Yes daba to Israela tineep toman Maaron, ve tighan ve tighun tonowe. Onoon kat, yes tighita Maaron. Eemoghon ye iwaghamun di maau.”^m

Mose izala pa lolooz Sinai daba

¹²Muri pa mbep tonenen, Yoova isaav pa Mose ighaze: “Malmalim uza unum tiou to lolooz daba ne, ve uneep izi sualen. Pasa, you nangeret saveen ve tutuun tiou ila yaam babanadi wa. Leso ipatoon yes Israela pa ngar to titaghoni. Ve naghaze naghur yaam tonene tilat nimam.”

¹³⁻¹⁴Tovenen Mose isaav pa yes daba tonenen ighaze: “Yam aneep to sualen, ve asaan yeru Yosua. Aron yesuru Ur to tinepneep ne. Ighaze lemim patajani eta, yesuru irau tigharaata.” Isavsaav padi le isob ghoro igham ulaana toni Yosua ve yesuru tinau tizala ris. Ghoro Mose ipul Yosua izi, ve enjeni malmali izala pa lolooz to Maaron daba.

¹⁵Sawa tonenen, yaghur tae izi inim ikau lolooz Sinai daba. ¹⁶⁻¹⁷Ve Yoova nguruba isul izala lolooz daba. Yaghur tae tonowen ikau lolooz irau mboj liim ve eez. Ival tiina to Israel to tineep sila, matadi izala pa lolooz, ve tighita Yoova nguruba isul inimale yab tiina ighanghan izala lolooz daba.”ⁿ

Ndag inim liim ve ru, ghoro Yoova ineeep yaghur tae lolo, ve isaav izila pa Mose ighaze izala toni. ¹⁸Tovenen Mose izala lolooz daba kat, le loon ila yaghur tae lolo. Ve ineeep tonowe irau mboj tamoot ru.”^o

Paesiin tuku pa mbeez patabuan to Maaron

25 Mose ineeep izi lolooz Sinai daba, ve Yoova isaav pani pa mbeez patabuan to ye ighaze yes Israela tigharaata. Tirei mbeez tonowen, lesu inim Maaron ina to nepoon, ve ipatoon yes Israela ighaze Maaron ineeep toman di.

Yoova isaav pa yes Israela pa tigham malimoon pa mbeez tonowen ighaze tingoog mbep tovene: yaam milmilia inimale silva ve gol, uli to tigharaata pa sipsip oro, uli to tigharaat di pa mbep naol naol ulidi, ai arijadi naol naol, ngoreen ve naunaun to vuzidi popoia, ve yaam naol naol to bodejadi popoia. Leso tigharaat mbeez tonenen ve tipambooda.

1 24:8 Mt 26:28; 1Kor 11:25; Hib 9:16+ m 24:11 Mbnp 32:31 n 24:16-17 Mt 17:5; Hib 12:18,29 o 24:18 Mt 4:2

Yoova tau isavia mbeez tonenen anunu pa Mose, lesa ana isavia ila pa yes Israela, ve tigham uraat pani. (Ughita Hib 8:5.)

Tovaan to mbeez tonenen, nene vene: Mala toni irau roov liim ve tol (15 mita). Ve tuku toni irau roov tol (5 mita). Ve sila ve izala, nene irau roov tol (5 mita).

Titatab mbeez patabuan pa uli tintina paan. Uli to ineep izila sila, bodeenja poia kat. Tigharaata pa teret to bodeenjadi naol naol inimale aindan, kaviana, ve bibliina. Ve tipambooda pa anela anunudi. Uli ite inim ru pani, nene tigharaata pa mekmek oro. Ve inim tol pani, nene tigharaata pa mekmek ulidi to tigharaat di le kaviana, ve tisai di tinim eemoghon. Ve uli inim paan pani, nene tigharaata pa lamboi ulidi to tisai di tinim eemoghon.

Mbeez lolo

Yoova isaav pa yes Israela ighaze tindaad uli to bodeenjadi popoia kat lesa tirab motin mbeez lolo inim suruvu ru. Suruvu eez tiina, ve suruvu ite kainanjen.

Suruvu kainanjen

Mbeez suruvu kainanjen, nene patabuan le patabuan kat. (Ughita Mt 27:51, Mk 15:38, Hib 9:3.) Bokis eez ineep ilooj ila. Bokis tonowen, tigharaata pa ai, ve tipaak gol ila lolo ve dige paam pa tipambooda. Ghoro tigham yaam babanjadi ru to Yoova ingeret tutuun toni ila, ve tizeev di tilooj tila. Ve tisap anela ru anunudi, ve tipayoon di tizala bokis tonenen pogho. Tiwaat bokis tonenen tighaze ‘Bokis to Saveen Mbuaan.’ Yes Israela tighita bokis tonenen tighaze nene Yoova ina to ghamuun pooz. Tauto bokis tonenen inim ghilalooj padi ighaze Yoova tau ineep toman di (Ughita Syg 11:19.)

Sawa eemoghon kat ila ndaman enaenja, daba to watoonrau enjeni moghon ilooj ila mbeez suruvu to kainanjen, ve itir sin izala bokis to saveen mbuaan pogho. Lesa Yoova ireu ival tiina to Israel sosor todi, ve yesna Yoova tilup di muul (Ughita Hib 9:7,24-26, 10:1-4.) Tauto tiwaat bokis tonowen avo tighaze ‘Ndug To Rewaan Sosor.’ Uraata pida to watoonrau, ma tamtoghon sorok eta irau ilooj ila mbeez suruvu kainanjen to patabuan kat ne maau. Maau le maau kat. (Ughita Hib 10:19-21.)

Suruvu tiina

Mbeez suruvu tiina, nene patabuan paam. Eemoghon patabuan kat inimale suruvu kainanjen maau. Tovenen ndiran to watoonrau tisob irau tilooj tila suruvu tiina, ve tigham uraat todi.

Toj to mberet patabuan

Ruum suruvu tiina, mbeb tol tineep ila. Eez, nene toj to tigharaata pa ai ve tipaak gol izala pogho. Toj tonowen, tighurghur mberet patabuan

toman ai suru to vuzi poia ne izala pogho. Wik enjaeņa, titun ai suru tonowen, ve tigham mberet mungina izi, ve ndiran to watoonrau tighani. Ghoru tighur paghu izala. Mberet tonowen ipatoonj di ighaze Maaron ineep toman di. Ival tiina irau tighani maau. Yes to watoonrau moghon to tighani. (Ughita Mk 2:26.)

Lam toman aia

Ve mbef ite to iyoon ilooj ila mbeez suruvu tiina, nene lam aia to tigharaata pa gol. Mbef tonowen pughu eemoghon, ve boga liim ve ru. Boga enjaeņa ledi lam ineep ila. Rabrab to naol ne, ndiran to watoonrau tila titun lam, lesu ighan pa mboj le ndugizau.

Artal kainanen to tunuuj mbef to vuzidi popoia

Ve mbef to inim tol pani, nene artaal kainanen to tigharaata pa gol. Yes to watoonrau tituntun mbef to vuzidi popoia izala artaal kainanen tonowen pa mbojmaagh ve rabrab. (Ughita Lu 1:8-10.)

Mbef tol tonenen tineep ilooj ila mbeez suruvu tiina. (Ughita Hib 9:2-5.) Ve tipatoonj ghiit pa Maaron tighaze ye patabuanj ve paghuna kat. Ve ye ineep toman ghiit irau sawa isob, ve inim aniiņ mata yaryaara pait, ve inginņgin ghiit pa aad aniiņ ve leed mbef. Ve ye inim ghazonja pait.

Oon to ririwaanj

Oon tiina eez to tigharaata pa bras iyoon sagan ris pa mbeez nagho. Oon tonowen, ya ineep ila lolo. Ighaze yes to watoonrau tighaze tigham uraat pa watoonrau to tamtoghon, ma tilooj tila mbeez patabuanj lolo pa tigham uraat, yes irau timen nimadi ve aghedi muuj. Le isob, ghoru tigham uraat todi.

Artaal tiina

Artaal tiina ineep igharau ataam avo. Nene timozmoz watoonrau to yes Israela izala. Artaal tiina ve oon tonenen ngara tovene: Iit irau tala tavot to Maaron sorok maau. Ye ireu sosor toit, ve igham ghiit tangalaan kat, ghoru iit irau tala tavot toni.

Tindaad uli arianađadi saangul tiluvut mbeez tonenen toman artaal tiina ve oon to ririwaanj tinim didiiņ. Ndug to tindaad uli tiluvuti, mala toni irau 44 mita, ve tuku toni, nene 22 mita. Ve tigharaat ataam eemoghon to tilooj tila. Artaal tiina ineep igharau ataam tonenen.

Ndiran to watoonrau

Yoova isavia uraat todi ngara, ve nonogiija todi paam ila to Mose. Yes moghon to ledi izadi pa tilooj tila mbeez patabuanj to Maaron. Ve ival tiina, ghoru maau.

Tutuun pida

Yoova isavia mbeez patabuan mosi ila to Mose le isob, ghoru isavia tutuun pani ighaze yes nditamoot tisob to ndaman todi irau tamoot ee ve iza, yes irau tighol mulin taudi pa yaam sekel alulu. Yaam tonowen, tighuri ila to yes to watoonrau, lesu tikisi pa uraat pida.

Tovenen Mose ineep toman Yoova izi lolooz Sinai daba, ve Yoova isavia ngar isob tonenen pani. Ghoru igham yaam babanadi ru to ye tau ingeret tutuun saangul ila, ve ighur di tila Mose nima.

Yes Israela tigharaat makau anunu inim maaron padi

32 ¹Mose ineep mala izi lolooz Sinai daba. Tovenen yes Israela tisanani le maau, ghoru tila tiluvut Aron, ve tisaav pani tighaze: “Aron, ugharaat leed maaron eta! Leso imuun pait ve ingin ghiit. Pasa, ngeu to igham ghiit tapul taan to yes Isipa ve tanim, yei nikankan panu. Mbeb eta avaata ivot panu wa.”

²Aron iloon saveen todi, ve isaav padi ighaze: “Poia. Yam ala angoog pandood to ndizwamim ve ndinatumim to tigharaat di pa gol, ve agham di tinim.” ³Tovenen ival tiina tipas pandood todi tizi pa taliyadi, ve tigham di tila to Aron. ⁴Ghoru ye igham gol todi tonowen, ve igharaata inim makau anunu. Ival tiina tighita makau anunu tonowen, ve tisaav tighaze: “Ai yam Israela, aghita. Nene maaron toit to igham ghiit tapul Isip ve tanim.”

⁵Aron ighita ngar todi tonowen, ve igharaat artaal eez ila mbeb tonowen nagho, ve isaav padi ighaze: “Bozo, pale talup ghiit pa sunuun, ve tapait Yoova!”

⁶Mbon le ndugizau, ghoru ival tiina timundig, ve tiyou mbeb todi pida tila, lesu tigham watoonrau pa maaron todi tonowen. Watoonrau pida, yab ighan suvun di. Ve tigham pida, lesu yesna maaron todi tonowen tilup di tinim ee moghon. Ghoru mboledi izi ve tighanghan. Tighanghan ve tighunghun, ve mala maau tipamundigin narogho, ve mogheraan toman ngar samsamia naol tivot.^p

Maaron ate yabyab kat pa yes Israela

⁷⁻⁸Tighamgham tovene, ve Yoova isaav pa Mose ighaze: “Ai, rikia moghon uzila! Pasa, tamtoghon tiom to ugham di tipul Isip ve yamna anim, ngar todi isami, ve tiwaghamgham. Ataam to avog iyaryaun padi naghaze titaghoni, nene tipuli wa. Uloon. Tigharaat ledi makau anunu, ve tiput aghedi panu, ve tigham watoonrau panu. Ve tisavsaav tighaze: ‘Yam Israela, aghita. Maaron toit to igham ghiit tapul Isip ve tanim, tau

tonene!' ⁹Ndiran tonowen, you nawatag di wa. Matadi zoraan saveen kat. ¹⁰Tovenen ateg yabyab padi kat, ve aazne naghaze napasob di tilaledi. Ve yom unğalsekin ghou malep. Pasa, naghaze naghur yamna papaghu tiom agham inadi. You pale naghham gham amasa anim naol, ve izamim tintina."

¹¹Eemoghon Mose itoova pa irab Maaron toni Yoova ate. Ighaze: "Aa Yoova, pughu vena to atem yabyab kat pa tamtoghon tiom? Yom taum to upatooŋ tapirim ve ugham mbeb gharatooŋadi tintina, tauto ugham di tipul Isip ve tinim. ¹²Ighaze uwaghamun di, nene pale yes Isipa tisaav tighaze: 'Laak, Maaron to yes Israela ighaze iwaghamun di ve ipasob di pa taan. Tauto itombaani di, ve igham di tipul ghiit ve tila ndug to bide lolooza, leso irab di tonowe.' Tovenen uwaghamun di malep. Onoon, atem yabyab kat. Eemoghon utatan atem, ve utoor ngar tiom. Ukaria tamtoghon tiom malep. Lolom imuul padi.

¹³"Matam iŋgal mbesooŋa tiom Abaram, Isak, ve Yakop. Muuŋ, yom umbua saveen toman di, ve upariaaŋa le iyaryaŋ kat ughaze yom pale ugham papaghu todi timasa tinim naol tinimale pitum to sambam paronania. Ve ugham taan Kanaan isob inim ledi, leso tineep pani itaghoni taghoni gha ila."^q

¹⁴Yoova ngar toni iyaryaŋ ighaze iwaghamun yes Israela. Eemoghon Mose isun ariana, tauto Yoova itatan ate, ve itoor ngar toni, ve irab tamtoghon toni maau.^r

¹⁵⁻¹⁶Ghoro Mose igham yaam babanadi ru to Maaron iŋgeret tutuuŋ toni ila, ve imuul izila to yes Israela. Yaam ru tonowen, Maaron tau igharaat di, ve iŋgeret tutuuŋ toni ila. Ve bodeen ineeŋ ila digedi ru. Tutuuŋ tonowen, nene pa ipariaaŋ yes Israela, leso matadi kisin saveen to yesna Maaron timbua, ve titaghon ataam toni.^s

¹⁷Yosua to ulaaŋa to Mose, ye isasaŋani izi lolooz luvuŋa. Mose izila ivot toni, ve yesuru malmalidi tizila. Tigharau ndug to ival tiina tinepneep pani, ghoro Yosua ilooŋ oroor tiina. Tovenen isaav pa Mose ighaze: "Wai, nowe avaat malmal eta?"

¹⁸Eemoghon Mose isaav pani ighaze: "Maau. Oroor tonowen inimale pakuruuŋ to yes ndaaba to tilib pa malmal ne maau. Ve inimale tanjiiz to ndaaba to koiadi tilib padi, nene paam maau. Mbouŋ to naloŋa we, tamtoghon avaat tinidi iza pa mbeb eta."

¹⁹Mose ivot todi izi lolooz pughu, ve ighita di titortor luvutin makau anunu, le ate yabyab kat. Tovenen ipiyaav yaam babanadi ru to ikiskis di ne, tizila taan le berberia.^t

q 32:13 Mbnp 12:7, 17:8; Mbnp 26:3+, 28:13 r 32:14 Yona 3:10 s 32:15-16 Igham 24:12
t 32:19 Sawa to Mose ipiyaav yaam babanadi ru tizila taan le berberia, ene inim ghilalooŋ pa yes Israela ighaze lupuuŋ todi toman Maaron, yes tireua wa.

²⁰Ghoro ila igham makau anunu tonenen, ve ipiyaava izala yab ighani, ve itututi ila le imbiris inim avab. Ghoro itiri izila ya, ve isaav ariaņa pa yes Israela ve tighuni.

²¹Ghoro iyaan Aron ighaze: “Laak, ndiran tonene tigham vena payom, to ulooņ di, ve uweu di ve tigham sosor tiina tonene?”

²²Aron ipamuul aliņa ighaze: “Wai, tiina tiou, atem yabyab payou malep. Yom uwatag: Ndiran tonene, moghon moghon lolodi ipapazaagh di pa nęar samsamia naol. ²³Yes tisaav payou tighaze: ‘Ugharaat leed maaron eta lak! Leso imuuņ pait ve iņgin ghiit. Pasa, nęeu to igham ghiit tapul taan to yes Isipa ve tanim, yei nikankaan pani. Mbeb eta avaat ivot pani wa.’ ²⁴Yes tisaav payou tovene, tauto nasaav padi naghaze: ‘Poia. Sei to ighaze ipambood tau pa gol, ghoro iduduuma izi ve ighami inim.’ Tovenen yes tila tiyou gol todi tinim tiou, ve nasuruuv di tizala yab, ve rikia moghon makau anunu ivot!”

²⁵Mose ighita ighaze Aron iņgin poian yes Israela maau, ve ipul di tiwaghamgham, tauto tigham nęar samsamia naol. Tovenen imatughez: Ighaze koiadi tinim ve tighita di, nene pale tiveleg di ve tiņiņ padi.

²⁶Tauto ila iyoon ila ataam avo, ve imboob ighaze: “Alooņ! Sei to ighaze itaghon Yoova, ghoro inim tiou!” Tovenen yes to rumai Levi tisob tila tilup di ila Mose mata, ²⁷ve Mose isaav padi ighaze: “Yoova to Maaron to iit Israela, aliņa ilat payam ighaze agham buza tiam, ve alaagh taghon ndug lolo, ve ambut yes to tiput aghedi pa maaron kaarom tonenen, le tisob timatmaat. Ighaze toņvetaz tiam, ma nditamim, ma yes to tineep tigharau gham, aghurghur di malep. Buza ighan di moghon.”

²⁸Tovenen yes Levia titaghon Mose aliņa, ve sawa tonenen timbut nditamoot irau ndiņđiņ tol (3000) pa buza ve timatmaat. ²⁹Ghoro Mose isaav padi ighaze: “Yam rumai to Levi, alooņ. Onoon, nene ipataņan pa yam arab ndinatimim ve toņvetaz tiam timatmaat. Eemoghon yam aghurghur di maau, ve ataghon katin Yoova aliņa. Tauto aazne, ye igham gham anim uraata toni, ve ighur poia toni iza tiam.”

³⁰Mboņ ndugizau, ghoro Mose isaav pa ival tiina ighaze: “Alooņ! Sosor to yam aghami, nene tiina le tiina kat. Eemoghon you pale namuul nazala to Yoova, ve natoova pa nagharaat saveeņ tomani, ve naghita: Pale irau ilooņ ghou, ve ipul sosor tiam tonene, ma maau?” ³¹Tovenen Mose imuul iza ila to Yoova, ve isaav pani ighaze: “O Yoova, ival tiina tonowen tigham sosor tiina kat payom. Pasa, tigharaat ledi maaron kaarom pa gol. ³²Eemoghon aazne, naghason ghom pa lolom isamin di ve upul sosor todi. Ighaze maau, ghoro izag to umbooda ila rau tiom, umusi ighau paam.”^u

³³Yoova ipamuul aliņa ighaze: “Vana maau. Tamtoghon to ighaze izoor ghou ve igham sosor payou, ye tonenen to pale namus iza ighau pa rau

tiou. ³⁴Tovenen umundig umuul uzila todi, ve ugham di ve yamņa ala pa ndug to muuņ nasavia payam. Aņela tiou pale imuuņ payam, ve yamņa ala. Eemoghon muri, you pale naghur atia padi pa sosor todi.”

³⁵Tauto muri, Yoova igham moroghoon samia ivot padi, ve iyat nğar todi to tizoorndug pa Aron tighaze igharaat ledi makau anunu inim maaron kaarom.

Maaron isaav ighaze ye irau ila toman yes Israela muul maau

33 ¹Ghoro Yoova isaav muul pa Mose ighaze: “Yamņa yes Israela to ugham di tipul Isip ve anim, amundig apul ndug tonene, ve alaagh muul ala pa taan Kanaan. Pasa muuņ, you nambua saveeņ toman Abaram, Isak, ve Yakop, ve napariaaņa le iyaryaañ kat naghaze you pale naghām taan tonowen pa papaghu todi.”

²You pale nambaañ aņela tiou imuuņ payam, pa indiiir taan tonowen tamtoghona tighau. Nene yes Kanaana, Amora, Hita, Peresa, Hivia, ve Yebusa. ³Leso agham taan todi inim lemim, ve aneep pani. Taan tonowen nğoreeņa tiina, ve mbeb naol titub pooi pani. Eemoghon you taug irau itija tala maau. Pasa, yam matamim zoraañ saveeņ. Ighaze itija tala, ve agham nğar samia ite paam izi ataam luvuņa, nene pale apas ateg, ghoro napasob gham.”

⁴Ival tiina tilooņ saveeņ arijaņa tonene, le lolodi ipataņaan kat ve titaņ tiina. Titiik taudi muul maau. Tipul taudi tinimale timoņ. ⁵Pasa, Yoova isaav pa Mose ighaze: “Usaav pa yes Israela tovene: ‘Yam matamim zoraañ saveeņ. Irau itija tala maau. Pasa, ighaze naneep toman gham pa sawa ris, ve apas ateg muul, nene pale napasob gham. Tovenen mbeb tiam popoia naol to atiik taumim pani, aduduum di tisob tizi, ghoro matag iņgal sa nğar to pale naghām payam.’ ”

⁶Tovenen sawa to yes Israela tipul lolooz Sinai ve inim, yes titiik taudi pa mbeb popoia muul maau.

Mbeez to tilup di toman Yoova

⁷Sawa to yes Israela tilaghlaagh izi ndug balim, ve ighaze atedi izi ataam luvuņa, ghoro Mose ipayoon mbeez eez ineep sagan pa mbeez pida. Mbeez tonowen, tiwaata tighaze: ‘Mbeez to lupuuņ.’ Tamtoghon tisob to tighaze tighason Yoova pa mbeb eta, tilala tonowe, ve tighurghur aliņadi ila to Mose, lesa ana isavia ila to Yoova. ⁸⁻⁹Sawa to naol, ighaze Mose ilaagh ila pa mbeez tonowen, ival tiina tisob timundig, ve tiyoon irau mbeez todi todi naghodi, ve matadi itaghoni le ilooņ ila mbeez lolo. Ghoro yaghur tae induur izi inim ve ipoon mbeez nagho, ve Mose yesuru Yoova tisavsav. ¹⁰Sawa to ival tiina tighita yaghur tae tonowen izi inim ipoon

mbeez nagho, yes tiput aghedi, ve tisun irau mbeez todi todi. ¹¹ Ve Yoova yesuru Mose tiwaghiton di, ve tisavsav tinimale tamtoghon ru to avodi imbesmbees. Tisavsav le isob, ghoru Mose ivot, ve imuul ila pa Israela inadi to nepoon. Eemoghon Yosua to Nun natu ne, ipulpul mbeez tonenen maau. Injini irau sawa isob. Yosua, ye pain paghu ve inim ulaanja to Mose.

Mose ighason Maaron pa ipatoon tau pani

¹² Tinepneep le sawa eez, ghoru Mose isaav pa Yoova ighaze: “Laak, yom usaav payou ughaze naghreb ival tiina tonene ve yeija nila pa taan Kanaan. Ve ughaze tinim imot inim tiou ve ugham ghou nanim itam ite kat. Eemoghon sei to ughaze umbaaja inim toman ghou pa iuul ghou, nene yom upaghazonan ghou pani sone. ¹³ Ighaze onoon tinim imot inim tiou, ghoru upatoon ghou pa ataam toman ngar tiom. Leso nawatag katin ghom, ve laghoon tiou poia ila matam. Aa Yoova, matam ingal ival tiina tonowen paam. Pasa, yes tamtoghon tiom. Yom taum usia di tinim lem.”

¹⁴ Yoova ipamuul aliija ighaze: “Ugham ngar naol malep. You taug pale natal toman ghom, lesu naghama ghom lolom poia ve atem izi.”

¹⁵ Mose iloon saveen tonene, ve isaav pani ighaze: “Nene poia pa unum toman ghei. Pasa, ighaze taum unum toman ghei maau, yei irau nipul ndug tonene maau. Pale nineep moghon to sualen. ¹⁶ Pasa, ighaze unum toman ghei maau, nene pale sa mbeb igham tamtoghon tighilaal tighaze yom lolom payei, ve poia tiom inepneep toman ghei? Maau. Eemoghon ighaze unum toman ghei, nene pale tamtoghon tiwatag tighaze yom usia ghei ninim lem, ve yom taum upas ghei nivot sagan pa ndug tisob to taan.”

¹⁷ Tovenen Yoova isaav pa Mose ighaze: “Poia. Mbeb to yom ughason ghou pani, you pale naghama. Pasa, tinig imot ilat tiom, ve naghama ghom unum itag ite kat.”

¹⁸ Mose iloon saveen tonene, ve ighason Maaron muul ighaze: “Aa Yoova, ighaze venen, upatoon taum toman tapirim ve poia tiom payou, ve naghita katin ghom!”^w

¹⁹ Yoova ipamuul aliija ighaze: “You pale napatoon suvun poia tiou payom, ve navotia izag Yoova toman gabuag ila matam. Ighaze lolog poia pa tamtoghon eta ve naghaze naghama poiani, nene pale naghama poiani. Ve ighaze lolog isamin tamtoghon eta ve lolog pa nauuli, nene pale nauuli.”^x

²⁰ Eemoghon yom irau ughita naghog maau. Pasa, ighaze tamtoghon eta ighita katin ghou, ye irau inep maau. Pale imaat.^y

²¹ Ughita ndug to inep digeg ne. Unum uyoon izala yaam pogho tonene.

²² Sawa to nanim ve naghaze napatoon taug toman tapirig ve poia tiou

payom, nene pale naghur ghom ulooŋ ula yaam saambu tonene, ve napoon ghom pa nimag, le irau nasalib payom ve nala. ²³Ghoro nimag ighau, ve ughita ndimog. Eemoghon naghog, tamtoghon eta irau ighita maau.”

Yoova ipatoonŋ poia toni pa Mose

34 ¹Ghoro Yoova isaav pa Mose muul ighaze: “Ugharaat yaam babaŋadi ru, le raratedi tinimale papazogi you naghham payom ve upiyaav di tizi berberia. Leso nanŋeret saveeŋ ila raraate inimale muuŋ nanŋereti.^z

²Ugharaat di pataghaanŋ, lesa bozo mboŋmaagh, ugham di, ve uza unum tiou sualen izi lolooz daba. ³Tamtoghon ite paam inim toman ghom malep. Ve lolog pa naghita tamtoghon eta ilaagh taghon lolooz dige maau. Ve ŋgai tovene paam. Tilaagh tigharau lolooz pughu malep.”

⁴Yoova isavsav le isob, ghoro Mose ila igharaat yaam babaŋadi ru, le raratedi tinimale papazogi Yoova igham pani. Mboŋ ndugizau, ndoromaanŋa kat, ve Mose imundig, igham yaam ru tonowen, ve inau izala pa lolooz Sinai daba itaghon Yoova aliŋa. ⁵Ghoro Yoova ineeŋ ila yaghur tae lolo, ve izi inim iyoon igharau Mose, ve ivotia tau iza ve gabua. ⁶⁻⁷Ye ilaagh imbut Mose nagho, ve isaav ighaze:

“You Yoova. Izag tau tonene: Yoova.

You Maaron to lolog isasamin mbesoonŋa tiou, ve naghhamgham poian di.

Ateg yabyab rikia maau.

Poia tiou, nene tiina kat. Lolog ineeŋ tuŋia ila to tamtoghon tiou ve nauluul di, ve nataghon saveeŋ mbuaanŋ tiou irau sawa isob.

Ŋgar to lolog ineeŋ tuŋia ila to tamtoghon tiou ve nauluul di, nene napatoonŋa pa tamtoghon ndiŋndiŋ ndiŋndiŋ.

Ve ŋgar todi to zoraanŋ saveeŋ, toman ŋgar todi pida to iyel pa ataam tiou, sosor todi naol tonowen, moghon moghon you nareureu di.

Eemoghon yes to ledi sosor, you naghurghur di maau.

Naghurghur atia pa yes taudi,

toman ndinatudi, nditimbudi, ve saas todi.”^a

⁸Mose ilooŋ saveeŋ tonene, le rikia moghon iput aghe, nagho izila pa taan, ve isuŋ. ⁹Ighaze: “Aa Yoova, ighaze lolom poia payou, ve ughaze ugham poian ghou, unum toman ghei ve itiŋa tala. Onoon, ival tiina tonowen, dabadi arianaŋ, ve tiloŋloonŋ saveeŋ maau. Eemoghon lolom isamin ghei, ve ureu sosor tiei. Ŋgar tiei naol to tiyel pa tutuuŋ tiom, ureu di tilaledi. Ve ugham ghei ninim lem kat.”

z 34:1 Igham 24:12, 32:19 a 34:6-7 Igham 20:5+, 33:19

Maaron yesŋa yes Israela timbua saveeŋ muul

¹⁰Mose isavsaav le isob, ghoru Yoova isaav pani ighaze: “Aazne, you naghaze nambua saveeŋ toman yam Israela, lesu itija talup ghiit tanim ee moghon muul. You pale naghama mbeb gharatooŋadi tintina ila tamtoŋhon tiom tisob matadi. Uraat to naghaze naghama di, nene pale ite kat. Muuŋ ve inim, ndug tisob to tineep irau taan isob, tighita mbeb eta tovene pa eta sone. Tovenen ndug ndug to tineep tigharau ne, ighaze tighita di, nene pale matughezaaŋ tiina igham di. ¹¹Tutuŋ to aazne naghuri payam, yam asob matamim kisini, ve ataghoni kat. Lesu namuuŋ payam, ve nandiir yes Amora, Kanaana, Hita, Peresa, Hivia, ve Yebusa to tineep izi taan Kanaan, tisob taghau tila. ¹²Eemoghon matamim imosmoos pa taumim. Yamŋa taan tonowen tamtoŋhona ambua saveeŋ pa alup gham malep. Aneep saganu padi. Pasa, ighaze yamŋa alup gham, nene pale tinim liis payam, ve tiweu gham ve agham ŋgar samia.^b

¹³“Tovenen alup gham toman di malep. Ve mbeb todi naol to suŋuuŋ, areu mbirisan di. Artaal todi, toman yaam todi patabuaŋa to tipayoon di tigharau inadi to suŋuuŋ, yam arab babalagin di. Ve ai to tiluplup di ila sambadi ve tipait maaron liva todi Asera, nakavas ighan suvun di tizi. ¹⁴Yam ambees pa maaron ite paam malep. Pasa, you Yoova to Maaron tiam. Matag pariuuŋ, ve naghaze yam ambees pa you moghon. Tauto tiwatwaat izag tighaze ‘Ye to mata pariuuŋ.’

¹⁵“Tovenen ambua saveeŋ toman taan tonowen tamtoŋhona pa alup gham malep. Pasa, ighaze yes tigham watoŋrau pa maaron kaaromŋa todi, ve tilup di ve tighanghan, ve tipoi gham pa ala toman di, nene pale yamŋa aghan aniiŋ to watoŋrau todi tonowen. Ve ighaze agham tovene, yam anim maaron kaaromŋa todi tonowen ledi, ve apul murimim payou.^c ¹⁶Ndinatumim tovene paam. Tivai ndiran tonowen ndinatudi liva malep. Pasa, ighaze ndiliva tonowen timbees pa maaron kaaromŋa todi, nene pale tiweu ndinatumim tila timbees pa maaron kaaromŋa tonowen, ve tighur muridi payou.

¹⁷“Agham ain, gol, ma silva, ve agharaat mbeb eta inim maaron payam ve apaiti malep.^d

¹⁸Ve matamim iŋgal lupuuŋ tiina to ghaniŋ mberet to le yis maau ne. Yam apul Isip pa kaiyo Abib. Tovenen ndaman isob, ighaze kaiyo tonenen ivot, yam alup gham pa ghaniŋ mberet to le yis maau ne irau mboŋ liim ve ru itaghon aliŋag.^e

¹⁹“Ndinatumim nditamoot to aidaba, toman ŋgai tiam ndinatudi to tipoop di muuŋ, nene tisob tinim leg moghon. Tovenen ŋgai tiam

b 34:12 Igham 23:32; 1Kor 5:11 c 34:15 1Kor 10:20 d 34:17 Igham 20:4,23

e 34:18 Igham 12:17

ndinatudi nditamoot to tipoop di muuŋ, arab di tisob timatmaat tinim watoonrau payou.^f

²⁰Eemoghon esele ndinatudi to tipoop di muuŋ, arab di tinim watoonrau payou malep. Arabolin di pa sipsip, ve arab di tinim watoonrau payou. Leso agham mulin esele tiam. Ve ighaze arabolin di maau, ghoru arab polin luadi timaat. Ve ndinatimim aidaba tovene paam. Arabolin di pa sipsip, lesu agham mulin di.

“Tamtoghon to ighaze isuŋ payou ne, nima ŋginiŋa ve inim ivot naghog malep.^g

²¹“Ndag inim eez, ila imuul ndag inim liim ve eez, yam irau agham lemim uraat. Eemoghon ndag inim liim ve ru, agham uraat malep. Atemim izi. Sawa to vazogiiŋ ve taitaiŋ paam, yam irau matamim iŋgal sawa tonenen ve atemim izi.^h

²²“Ndaman isob, sawa to Pasova ighaze isob, ve wik liim ve ru inim ila ve aniiŋ wit mata ivot, ghoru yam asob alup gham pa suŋuuŋ. Ve ighaze ndaman igharau ighaze isob, ve sawa to taitaiŋ ivot, yam asob alup gham pa suŋuuŋ muul. ²³You Yoova to Tiina to yam Israela. Tovenen ndaman isob, ighaze sawa tintina tol tonene tivot, ghoru nditamoot tiam tisob tinim tilup di ila naghog, ve tisuuŋ payou.ⁱ

²⁴“You pale namuuŋ payam ve nandair tamtoghon tisob tighau pa taan to naghaze naghama payam, lesu inim lemim. Ve you pale naseeŋ taan tiam ila inim tiina. Ighaze sawa tintina tol tonene tivot, ve yam asob apul ndug tiam tiam, ve anim alup gham ila naghog pa suŋuuŋ, agham ŋgar naol pa taan tiam malep. Pasa, tamtoghon eta irau lolo ipazaagha pa ighami sorok ne maau.

²⁵“Siŋ to watoonrau to yam aghaze agham payou, alupi toman mberet to yis ineeŋ ila ne malep. Ve sawa to alup gham pa ghanghaniŋ to Pasova, ve arab mbeb pida tinim watoonrau, apul alulu ineeŋ le ndugizau malep. Ighaze alulu ineeŋ, aghuri ila yab ighan suvuni le isob, ghoru ndugizau.^j

²⁶“Aniiŋ mata to tivot ila taan tiam, yam avureer popoia moghon, ve agham di tinim rumai to Maaron tiam Yoova.^k

“Ighaze anaz mekmek natu eta, yam anazi toman tuz to tina malep.”^l

Yaam papaghu ru to tutuuŋ ineeŋ ila

²⁷Yoova isaav muul pa Mose ighaze: “Saveeŋ tiou isob tonene, taum umbood di. Pasa saveeŋ to itiiŋa tambua pa talup ghiit tanim ee moghon, nene iyon izala saveeŋ tonene.” ²⁸Mose ineeŋ toman Yoova izi lolooz daba irau mboŋ tamoot ru (40). Sawa tonenen, ye ineeŋ sorok. Ighan

f 34:19 Igham 13:2 g 34:20 Igham 22:29, 23:15 h 34:21 Igham 20:8+, 23:12

i 34:23 Igham 23:14 j 34:25 Igham 12:10 k 34:26 Igham 23:19 l 34:26 Igham 23:19

aniij eta maau, ve ighun ya maau. Ve iŋgeret tutuuŋ saanŋul ila yaam babanjadi ru. Tutuuŋ tonowen isavia ataam to titaghoni, lesu lupuuŋ todi toman Maaron ineeŋ ariana.^m

Mose nagho isul

²⁹Mose igham yaam babanjadi ru to tutuuŋ saanŋul ineeŋ ila, ve imuul izila. Yaam ru tonowen, nene pa ipalot yes Israela, lesu matadi kisin saveeŋ mbuaaŋ todi toman Yoova ve titaghoni kat. Sawa to Mose ipul lolooz Sinai daba ve izila, nagho isul kat. Eemoghon ye tau iwatagi maau. Nagho isul pasa, yesuru Yoova tilup di ve tisavsaav.

³⁰Mose ila ivot to yes Israela, ve Aron toman ival tiina tighita nagho isul. Tovenen timatughez pani, le tila tigharai maau.ⁿ

³¹Eemoghon ye ipoi di ighaze tinim, tauto Aron igham yes daba to Israel, ve yesja tila to Mose. Ghoru Mose isavsaav toman di. ³²Le isob, ghoru ival tiina anadi tinim tigharai, ve ye ipaesia saveeŋ isob to Yoova isavia pani izi lolooz Sinai daba, ve avo iyaryaŋ padi lesu titaghon katin saveeŋ tonenen. ³³Isavsaav padi le isob, ghoru ipoon nagho pa uli.^o

³⁴Eemoghon sawa isob to ye ighaze ilooŋ ila mbeez to Yoova, ghoru igham uli tonowen ighau pa nagho, ve yesuru Yoova tisavsaav. Tisavsaav le isob, ghoru ivot ila pumuri, ve ipaesia saveeŋ to Yoova isavia pani ne pa yes Israela ve tilooŋa. ³⁵Sawa to ye ivot ila pumuri, yes Israela tighita nagho isul. Tauto Mose iponpoon nagho, ve inepneep le sawa to ighaze imuul ilooŋ ila mbeez, ghoru igham uli tonowen ighau pa nagho, ve yesuru Yoova tisavsaav.

35 Mbeez patabuaŋ to Yoova ighaze yes Israela tigharaata lesu inim ina to nepooŋ, ye tau isavia ŋgara pa Mose pataghaaŋ wa. Ve Yoova ighur tamtoghon ru, izadi Besalel ve Oliap, timuuŋ pa uraat to mbeez tonowen. Ve igham Avuvu izeev yesuru, ve igham ledi ŋgar, lesu tigham poian uraat tonowen. Tovenen yesuru timuuŋ pa uraat, ve yes Israela timaliim pa mbeez tonowen.

Yes Israela tipayoon mbeez patabuaŋ to Maaron

40 ¹Ghoru Yoova isaav pa Mose ighaze: ²“Ndaman to naghood, kaiyo to ivot muuŋ, ve ndag inim mata, ghoru upayoon mbeez patabuaŋ. Lesu inim inag to nepooŋ, ve itiŋa taluplup ghiit tonowe pa savsaveeŋ. Ugham tovene: ³Bokis to Saveeŋ Mbuaaŋ to tutuuŋ tiou ineeŋ ila lolo, ughuri imuuŋ ilooŋ ila mbeez suruvu to muŋgaŋ we. Tutuuŋ tonenen isavia ataam to ataghoni lesu lupuuŋ toit ineeŋ tuŋia. Ghoru undaad uli tiina ila mbeez lolo, lesu ipoon bokis tonowen. Mbeez suruvu tiina to ineeŋ potla, nene patabuaŋ. Ve suruvu kainanŋen to bokis tonenen ineeŋ pani, nene patabuaŋ le patabuaŋ kat.

⁴“Undaad uli le isob, ghero ughur toj to mberet patabuan iloong ila mbeez suruvu tiina to ineep potla, ve ughur mberet patabuan izala.

“Le isob, ghero upayoon lam aia iloong ila, ve ughur lam liim ve ru tila inadi.

⁵“Ghero ugham artaal gol kainanen to tunuun mbeb to vuzidi popoia, ve ughuri iloong ila mbeez suruvu tiina. Ve utoora le nagho injarua Bokis to Saveen Mbuaan. Uyou mburuguun to mbeez lolo tiloong tila le isob, ghero undaad uli tiina ite ipoon mbeez nagho.

⁶“Ghero ughur artaal tiina to watoonrau ineep sagan ris pa mbeez nagho, ⁷ve ughur oon tiina to ririwaan ineep bodbodaan pa mbeez nagho ve artaal tiina, ve ulij ya ila lolo. ⁸Ghero undaad uli mamala iluvut mbeez, ve undaad uli ariana ila sirsir avo inim ataam pani.

⁹“Upasob uraat naol tonenen le isob, ghero ugham ngoreen, ve ulij izala mbeez toman mburuguun to tineep ila lolo, leso ughur di tinim leg. Mbeb naol tonanan, patabuan. ¹⁰⁻¹¹Le isob, ghero ulij ngoreen izala artaal tiina to watoonrau, toman mburuguun to artaal, ve oon to ririwaan, toman toj to oon tonanan ineep izala pogho ne paam. Leso ughur di tinim leg. Artaal tonanan, patabuan le patabuan kat.

¹²“Upasob uraat naol tonenen le isob, ghero ugham Aron toman ndinatu nditamoot tila tigharau ataam avo to mbeez patabuan, ve urughuuz di. ¹³Urughuuz di le isob, ghero undud Aron pa nonogiina toni patabuan to uraat, ve ulij ngoreen izala daba pa ughuri inim leg. Leso inim ngeu to watoonrau ve imbees payou. ¹⁴Ghero ugham ndinatu anadi tinim, ve undud di pa nonogiina todi to uraat paam. ¹⁵Ve ulij ngoreen izala dabadi inimale ugham pa tamandi. Leso tinim ndiran to watoonrau ve timbees payou. Yesna papaghu todi to muri pale tivot, pale tikis uraat tonene, itaghoni taghoni gha ila.”

¹⁶Yoova isavsav le isob, ghero Mose ipamundigin uraat. Ye igham mbeb tisob tonowen uraata itaghon saveen to Yoova isavia pani. ¹⁷Tovenen sawa to yes Israela tivoool pa ndaman paghu, kaiyo to ivot pa ndaman tonenen muun, ve ndag inim mata, ghero tipayoon mbeez patabuan to Yoova.^p ¹⁸⁻¹⁹Tighur mbeb pa pos tiyoon izala, ghero tipayoon pos tizala poghodi. Ve tizeev ngaltereniin itaghon saambu to tikir di pataghaan ila pos ne, leso ikis pos tiyoon tunja. Ve tipayoon gungun mamala paan ila pa mbeez nagho, ve tiraav uli tintina pida izala mbeez pogho, itaghon Yoova aliya to isavia ila to Mose.

²⁰Ghero Mose igham yaam ru to tutuun to Yoova ineep ila, ve ighur di tila Bokis to Saveen Mbuaan lolo. Yaam ru tonowen, nene pa ipalot yes Israela, leso

p 40:17 Yes Israela tipul Isip, ve tilaagh tila le kaiyo inim tol pani, ghero tivot izi lolooz Sinai. Tineep tonowe irau kaiyo liim ve paan, ghero tivoool pa ndaman paghu. Sawa kat to ndaman paghu tonenen imundig, yes tipayoon mbeez patabuan.

matadi kisin saveerj mbuaarj todi toman Yoova ve titaghoni. Ve Mose izeev sig ru itaghon inadi to ineep Bokis To Saveerj Mbuaarj dige, lesa timbaada. Ve ipakud bokis avo. Bokis avo tonowen, tiwaata tighaze ‘Ndug To Rewaarj Sosor.’^q

²¹ Ghoro Mose ighur Bokis to Saveerj Mbuaarj ilooj ila mbeez lolo, ve indaad uli tiina eez ve ipoona itaghon Yoova aliya.

²²⁻²³ Le isob, ghoru ighur toj to mberet patabuarj ilooj ila mbeez suruvu tiina to ineep potla. Ineep dige ila pa kagu. Ve ighur mberet patabuarj izala, lesa ineep ila Yoova nagho, itaghon Yoova aliya to isavia pani.

²⁴ Ghoro igham lam aia ilooj ila mbeez suruvu tiina, ve ipayoonda ila dige to ila pa daudau, ve itoora le nagho ijarua toj to mberet patabuarj. ²⁵ Ve ighur lam liim ve ru izala, lesa tisul ila Yoova nagho, itaghon Yoova aliya to isavia pani.

²⁶ Ghoro ighur artaal gol kainanjen to tunuuj mbeb to vuzi popoia ne ila igharau uli tiina to irab motin mbeez lolo. ²⁷ Ve itun mbeb to vuzi popoia izala, itaghon Yoova aliya to isavia pani.

²⁸ Mose igharaat mbeez toman mbeb tisob to tineep ila lolo ne le isob, ghoru indaad uli tiina ila ipoon ataam avo, ve igham uraat to pumuri. ²⁹ Ighur artaal igharau sirsir to mbeez patabuarj ataama, ve igham watoonjrau pida itaghon Yoova aliya to isavia pani. Ye ighur ngai toman wit pida tizala artaal, ve yab ighan suvun di tinim watoonjrau. ³⁰⁻³² Le isob, ghoru ighur oon tiina ineep bodbodaarj pa mbeez nagho ve artaal tiina, ve ilij ya ila lolo. Lesa sawa to ye tau, ma Aron, ma Aron ndinatu tilooj tila mbeez lolo, ma tigharau artaal, ghoru timen nimadi ve aghedi pa ya tonowen. ³³ Igham uraat tonenen le isob, ghoru indaad uli mamala tiluvut mbeez toman artaal tiina tinim sirsir pani, ve indaad uli ariarja eez inim sirsir ataama.

Tovenen uraat naol to Yoova isavia di, Mose igham di le tisob.

Yoova ipatoonj nguruba pa yes Israela

³⁴⁻³⁵ Ghoro yaghur tae to Yoova ineep ila, izi inim le itatab mbeez patabuarj, ve Yoova nguruba isul toman tapiri tiina irau mbeez lolo. Tovenen Mose irau ilooj ila maau.^r

³⁶⁻³⁷ Sawa to yes Israela tilaghlaagh izi ndug balim, matadi ilala pa yaghur tae tonowen. Ighaze ipul mbeez patabuarj pogho ve induur ila, nene yes paam timundig, tiyouyou, ve tilaagh titaghoni. Ve ighaze ineep tunja izala mbeez pogho, nene irau tilaagh maau. Tineep ve tisananjen le tighita yaghur tae induur muul, ghoru timundig tilaagh.

³⁸ Tovenen sawa to yes Israela tilaghlaagh izi ndug balim, matadi ilala pa yaghur tae tonowen ve titaghoni. Ighaze ndag, ghoru tisob tighita yaghur tae to Yoova ineep ila, inepneep izala mbeez patabuarj pogho. Ve ighaze mboj, ghoru tighita yaghur tae tonowen isul inimale yab iyaryaar.^s